

წ. ო. კაკაბაძე

ბიოგრაფიული მონაგრო
(ზეპელოვანი)



წიგნი ეძღვნება გამოჩენილ
ქართველ რევოლუციონერს,
პუბლიცისტსა და საზოგადო მო-
ღვაწის გიორგი მაიაშვილის (ზდა-
ნოვიჩის) ცხოვრებასა და მოღვა-
წეობას.

წინასიტყვაობა

გიორგი ფელიქსის ძე მაიაშვილის (ზდანოვიჩი) ცხოვრება და შემოქმედება, მისი მდიდარი მემკვიდრეობა დიდი ხანია იმსახურებს მონოგრაფიულ შესწავლას.

გ. მაიაშვილი ცნობილი წარმომადგენელია გასული საუკუნის 70-იანი წლების რევოლუციონერთა იმ თაობისა, რომელთაც ვ. ი. ლენინი რუსეთის სოციალ-დემოკრატიის წინამორბედად თვლიდა და რომლებმაც პირდაპირ თუ არაპირდაპირ საგრძნობი სამსახური გაუწიეს რუსეთის ხალხთა რევოლუციურად აღზრდის საქმეს.

გ. მაიაშვილმა როგორც რევოლუციონერმა და პუბლიცისტმა ჯერ კიდევ რუსეთში მოიხვეჭა სახელი. იგი იყო „სრულიად რუსეთის სოციალურ-რევოლუციური ორგანიზაციის“ გამოჩენილი წარმომადგენელი, რომელმაც თავისი რევოლუციური მოღვაწეობით თვალსაჩინო წვლილი შეიტანა რუსეთის რევოლუციური მოძრაობის ისტორიაში.

გ. მაიაშვილის მოღვაწეობის შესახებ ცოტაა დაწერილი. ავტორები მას მხოლოდ გაკვრით თუ იხსენიებენ, ისიც მაშინ, როდესაც საკითხი მისი პერიოდის ამა თუ იმ მოღვაწის დახასიათებას შეეხება.

სასიამოვნო მოვალეობად მიგვაჩნია აღვნიშნოთ, რომ უკანასკნელ წლებში მკვლევარები შედარებით მეტ დაინტერესე-

ბას იჩენენ გ. მაიაშვილის პიროვნებისადმი. გამოქვეყნდა რამდენიმე საჟურნალო სტატია, რომელიც მისი ცხოვრებისა და მოღვაწეობის (კალკულური საკითხის შესწავლას ეძღვნება. ასეთია გ. ბენდიანიშვილის „გიორგი მაიაშვილის სოციალ-ეკონომიური შეხედულებანი“ (ჟურნ. „საქართველოს ეკონომისტი“, 1960, № 2); ა. ნორაკიძე „70-იანი წლების რევოლუციონერთა ღირსეული წარმომადგენელი“ (ჟურნ. „საქართველოს ეკონომისტი“, 1962, № 9). ცალკე აღნიშვნის ღირსია მ. ი. კანდელაკის საყურადღებო გამოკვლევა „გ. მაიაშვილი (ზდანოვიჩი) როგორც ჟურნალისტი და კრიტიკოსი“, რომელიც ერთვის გ. მაიაშვილის „რჩეული ნაწერების“ II ტომს (ორივე ტომი მოამზადა და გამოსცა თბილისის სახელმწიფო უნივერსიტეტის ჟურნალისტიკის კათედრამ).

წინამდებარე ნაშრომში ჩვენ მიზნად არ ვისახავთ გ. მაიაშვილის ცხოვრებისა და მოღვაწეობის ყოველმხრივ გაშუქებას. ჩვენი მიზანი უფრო მოკრძალებულია: გვინდა მკითხველ საზოგადოებას ძირითად ხაზებში გავაცნოთ ზოგიერთი მხარე ამ შესანიშნავი ადამიანის ცხოვრებიდან.

წიგნის დაწერის დროს, არსებული წყაროების გარდა, ვსარგებლობდით განსვენებული რევოლუციონერის უახლოესი მეგობრების, მასთან ახლო ურთიერთობაში მყოფი პირების მოგონებებით. მათ შორის გვინდა მოვიხსენიოთ ს. დ. ნაზარაშვილი (პედაგოგი), რომლის ოჯახშიც კარგა ხანს იმალებოდა მეფის მთავრობისაგან დევნილი გ. მაიაშვილი; გ. მაიაშვილის უახლოესი პირის ა. დ. დარახველიძის (კრინიციის) ქვრივი ე. ი. ბურჯანაძე, გ. მაიაშვილის ძმისწული ე. ლ. ქორქაშვილი-ფაღავა და მისი ქალიშვილი თ. ბ. ფაღავა, რომელთაც საოჯახო აღ-

ბომიდან მოგვაწოდეს გ. მაიაშვილთან დაკავშირებული მეტად საგულისხმო ფოტოსურათების ნაწილი.

წინამდებარე ნაშრომი არ იქნება, ალბათ, დაზღვეული ხარვეზებისაგან. ჩვენ მივიღებთ მკითხველის ყველა საქმიან შენიშვნას, რაც, ვფიქრობთ, მხოლოდ ხელს შეუწყობს გ. მაიაშვილის პიროვნების უკეთ შესწავლას.

გიორგი ფელიქსის ძე მაიაშვილი (ზდანოვიჩი) დაიბადა 1855 წელს¹ ქ. ქუთაისში, სამხედრო ექიმის ოჯახში.

გ. ზდანოვიჩის მამა — ფელიქს ზდანოვიჩი, ეროვნებით პოლონელი,² მსახურობდა მეფის არმიაში ექიმ-სტომატოლოგად. სამხედრო სამსახურის მიტოვების შემდეგ შტაბსკაპიტნის ჩინით დასაბლდა ქუთაისში. იგი თავის დროისათვის ფართო განათლების მქონე ადამიანი იყო. მას კარგად ჰქონდა შესწავლილი საქართველოს ისტორია, ლიტერატურა და ქართველთა შორის პატივისცემითა და ნდობით სარგებლობდა. ფ. ზდანოვიჩს გულს უკლავდა ქართველი და პოლონელი ხალხის ერთნაირი ისტორიული ბედი და ღრმა სიძულვილით იყო გამსჭვალული მეფის რუსეთის თვითმპყრობელური რეჟიმის წინააღმდეგ.

1874 წელს ფელიქს ზდანოვიჩმა ცოლად შეირთო მარიამ (მაია) მანუჩარის ასული მიქელაძე. ამ ქორწინებიდან მათ შეეძინათ ერთადერთი ვაჟი გიორგი — შემდეგში ცნობილი რე-

1874 წელს ფელიქს ზდანოვიჩმა ცოლად შეირთო მარიამ (მაია) მანუჩარის ასული მიქელაძე. ამ ქორწინებიდან მათ შეეძინათ ერთადერთი ვაჟი გიორგი — შემდეგში ცნობილი რე-

¹ აღსანიშნავია, რომ სენატის განსაკუთრებულმა საკრებულომ 1877 წელს მისი ასაკი 20 წლით განსაზღვრა. (იხ. Роч и биография, М., 1907, стр. 20.

² დეიჩს, რატომღაც ეს გვარი შეცდომით ოსური წარმოშობის ჰგონია (იხ. იქვე, ზემოთდასახელებული ნაშრომი).

ვოლუციონერი და გამოჩენილი ქართველი პუბლიცისტი, რომელიც ჩვენს მწერლობაში მაიაშვილის გვართაა ცნობილი. ეს ფსევდონიმი გ. ზდანოვიჩმა აირჩია დედის გარდაცვალების შემდეგ მისი ხსოვნის პატივისცემის ნიშნად და მთელი სიცოცხლის მანძილზე ატარებდა.

გ. ზდანოვიჩს მამა ადრე გარდაეცვალა. მაშინ იგი 4 წლისა იყო.

გ. ზდანოვიჩის დედა მარიამ მიქელაძე, რომელიც საზოგადოებაში მაიას სახელით იყო ცნობილი, საკმაოდ განათლებული და ერუდირებული ქალი იყო. მართალია, მან კლასიკური განათლება არ მიუღია, მაგრამ კარგად იცნობდა და შესწავლილი ჰქონდა თავისი ქვეყნის ისტორია, ლიტერატურა, ერკვეოდა საზოგადოებრივი მნიშვნელობის საკითხებში. მან შეაყვარა პატარა ზდანოვიჩს გენიალური „ვეფხისტყაოსანი“. თავის დროის საზოგადოება მაიას ჰქვიან, განვითარებულ და ნიჭიერ ადამიანად იცნობდა. ამასთანავე მაია მიქელაძე გარეგნობითაც ულამაზეს ქალად ითვლებოდა. ყველა ამ სიკეთესთან ერთად, იგი იყო შესანიშნავი დიასახლისი, შრომისმოყვარე, კეთილშობილი დედა, რომლისთვისაც უცხო იყო ყოყმობა და ქედმაღლობა. ამ მხრივ იგი მკვეთრად განსხვავდებოდა მისი დროის მაღალი წრის მანდილოსნებისაგან¹.

მეუღლის — ფელიქს ზდანოვიჩის გარდაცვალების შემდეგ მაია მიქელაძემ თავისი ბედი დაუკავშირა ქუთაისის გუბერნიის პროკურორს ლევან ნიკოლოზის ძე ქორქაშვილს, განათლებულ და ლიბერალურად მოაზროვნე ადამიანს. ლ. ქორქაშვილთან

¹ ცნობები გ. ზდანოვიჩის ბავშვობის პერიოდთან დაკავშირებით მისმა ძმისშვილმა ქეთევან ვასილის ასულმა ფაღავამ, რისთვისაც მადლობას მოგახსენებთ.

მას შეეძინა ოთხი ვაჟიშვილი — ნიკოლოზი, მიხეილი, კონსტანტინე და ვასალი. ამრიგად გ. ზდანოვიჩი დედის ხაზით ძმებს შორის ყველაზე უფროსი იყო.

მაია მიქელაძემ თავის ხუთივე ვაჟიშვილს მისცა კარგი განათლება და საზოგადოებას, მათი სახით, შესანიშნავი მოქალაქეები და რადიკალურად მოაზროვნე ადამიანები აღუზარდა.

ლ. ქორქაშვილის გარდაცვალების შემდეგ მაია მიქელაძე აღარ გათხოვილა. მან მთელი თავისი სიცოცხლე შვილების აღზრდის კეთილშობილ საქმეს შესწირა. მის ზნეობრივ სახეს ჩრდილ არასოდეს მისდგომია.

როგორც აღვნიშნეთ, გ. ზდანოვიჩი ბავშვი იყო, როდესაც მამა გარდაეცვალა. მცირეწლოვანი გიორგი მთლიანად დედის მზრუნველობის ქვეშ მოექცა. დედა-შვილს თავდავიწყებით უყვარდათ ერთმანეთი. დედა თავს არ იზოგავდა, რომ ობლად დაჩაჩენილ პატარა გიორგისათვის კარგი აღზრდა მიეცა.

მაია მიქელაძის ოჯახი ცნობილი იყო ხელგაშლილობითა და გულღია სტუმარ-მასპინძლობით. იქ ხშირად იკრიბებოდა ქუთაისის მოწინავე ინტელიგენციის წარმომადგენლები. იმართებოდა ცხოველი საუბრები და კამათი როგორც მიმდინარე საჭირობო საკითხებზე. ასევე ისტორიულ თემებზეც. ამ საუბრებს პატარა გიორგი მთელი გულისყურით ისმენდა და გებულობდა თავისი ხალხისა და ქვეყნის ბეჩავ მდგომარეობას. მათ თავზე დატეხილ ისტორიულ უსამართლობას. ასეთი შეხვედრები და საუბრები წარუშლელ შთაბეჭდილებას ახდენდა პატარა ზდანოვიჩზე და ბავშვობიდანვე განაწყობდა მას არსებულ წყობილებისადმი შეურიგებელი დამოკიდებულების სულისკვეთებით.

გ. ზდანოვიჩისა და მის ძმებს შორის ყოველთვის კარგი და

გულთბილი დამოკიდებულება იყო. დედა არცერთს არ აკლებდა თავის ზრუნვასა და ამაგს. მისთვის ბავშვების სიყვარული და მათ მომავალ ბედზე ზრუნვა ყველაფერზე მაღლა იდგა. განსაკუთრებით კი ეს იგრძნობოდა პატარა გიორგისადმი დამოკიდებულებაში.

გიორგი ზდანოვიჩის რადიკალურად აღზრდას ისიც უწყობდა ხელს, რომ გუბერნიის პროკურორი ლ. ქორქაშვილი მტრულად იყო განწყობლი მეფის რუსეთის კოლონიალური პოლიტიკის მიმართ საქართველოში. მისივე სასახლოდ უნდა ითქვას, რომ იგი გიორგის თავის ოთხ შვილში არ არჩევდა და ზრუნვასა და ამაგს არ აკლებდა მას.

დაწყებითი განათლება გ. ზდანოვიჩმა მიიღო ოჯახში დედის ზედმძღვანელობით. დედამ შეასწავლა მას ქართული წერა-კითხვა; უკითხავდა ისტორიულ მოთხრობებს, აცნობდა „ვეფხისტყაოსნის“ ზოგადსაკაცობრიო იდეებს, მის ჰუმანიზმს, რაც პატარა გიორგის ძალიან მოსწონდა. გ. ზდანოვიჩმა რუსული ენაც ოჯახში შეისწავლა.

გ. ზდანოვიჩს ბავშვობიდანვე იტაცებდა ბუნებისმეტყველება და ყვავილების მოშენება. იგი დიდ მიდრეკილებას იჩენდა აგრონომიულ მეცნიერებისადმი. ეს თვისება მან სიცოცხლის უკანასკნელ დღემდე შეინარჩუნა.

ბავშვობაში გ. ზდანოვიჩი მჭიდროდ იყო დაკავშირებული თავისი თანატოლ გლეხის ბავშვებთან და ღარიბთა შვილებთან. იგი თავისი თვალთა ხედავდა და განიცდიდა მათ ღუბჭირ ცხოვრებას, მათი მშობლების უუფლებობასა და დამცირებულ მდგომარეობას. ცხოვრებისაგან მიღებული და ნახული სურათები ღრმა შთაბეჭდილებას ახდენდნენ მომავალ რევოლუციონერზე.

როდესაც გ. ზდანოვიჩმა სასკოლო ასაკს მიაღწია, იგი ქუთაისის კლასიკური გიმნაზიის მოსამზადებელ განყოფილებაზე შეიყვანეს.

გიმნაზიაში გ. ზდანოვიჩი ბეჭითად სწავლობდა და რუსული და ქართული ენების კარგ ცოდნას ამჟღავნებდა. იყო მეტად მეგობრული და სიცოცხლით სავსე ყმაწვილი. უყვარდა თამაში, მხიარულება, თუმცა ხშირად რალაც ფიქრები შეიპყრობდა და ამ დროს სიტყვაძვირი ხდებოდა ხოლმე.

იმ დროს გიმნაზიაში გამოდიოდა მოწაფეთა გაზეთი, არსებობდა მოწაფეთა სხვადსხვა წრეები. გ. ზდანოვიჩი გიმნაზიის საზოგადოებრივი ცხოვრების აქტიური მონაწილე იყო. გამოირჩეოდა ორატორული და ორგანიზატორული ნიჭით.

მისი მთავარი გატაცება მაინც წიგნები იყო. კითხულობდა უმთავრესად ისტორიული და სოციალურ-ეკონომიური ხასიათის ლიტერატურას. მან ადრევე შეიცნო სოციალური ბოროტება და ის ეროვნული ჩაგვრა, რასაც მეფის რუსეთის კოლონიალური უღლის ქვეშ მგმინავი ხალხები განიცდიდნენ.

მშრომელებს მბრძანებლობდა მთელი არმია ისპრავნიკებისა, ურიადნიკებისა, ჟანდარმებისა, პოლიციელებისა, ჩაფრებისა, რომლებიც იცავდნენ მეფეს, კაპიტალისტებსა და მემამულეებს მშრომელთა წინააღმდეგ.

ამას ემატებოდა ისიც, რომ საქართველოში ყველა ან თითქმის ყველა სახელმწიფო თანამდებობანი რუს ჩინოვნიკებს ეჭირათ. მთელი საქმეები დაწესებულებებში, სასამართლოებში რუსულ ენაზე წარმოებდა. იკრძალებოდა ეროვნულ ენაზე გაზეთებისა და წიგნების გამოცემა, სკოლებში აკრძალული იყო დედაენაზე სწავლა. მეფის მთავრობა მიისწრაფოდა ჩაეხრჩო ეროვნული კულტურის ყოველგვარი გამოვლინება, ატარებდა:

არარუს ეროვნებათა ძალდატანებითი „გარუსების“ პოლიტიკას. ცარიზმი არარუს ხალხთა ჯალათად და მტანჯველად გამოდიოდა. ირგვლივ გამეფებულ სოციალურ ბოროტებას გ. ზდანოვიჩი საკუთარი თვალთ ხედავდა. ცარიზმის ბეც მოხელეთა თვითნებობა მასში მრისხანე გულისწყრომას ბადებდა. სწორედ ამ ორმა ძირითადმა ფაქტორმა — ირგვლივ გამეფებულმა აუტანელმა სოციალურმა ბოროტებამ და ქართველი ხალხის ეროვნულმა ჩაგვრამ მოახდინა გადამწყვეტი გავლენა ჭაბუკი ზდანოვიჩის მსოფლმხედველობის ჩამოყალიბებაზე.

1871 წელს გ. ზდანოვიჩმა დაამთავრა ქუთაისის კლასიკური გიმნაზიის სრული კურსი. 17 წლის ზდანოვიჩი გატაცებული იყო უმაღლესი განათლების მიღების სურვილით, რომ უკეთ გამოდგომოდა თავის ხალხს და ემსახურა მისი ინტერესებისათვის. ოჯახში, ბევრი ფიქრისა და კამათის შემდეგ, გადაწყდა, რომ გაეგზავნათ იგი რუსეთში უმაღლესი განათლების მისაღებად. დედა დაჟინებით ურჩევდა, რომ გაპყლოდა მამის კვალს და შესულიყო პეტერბურგის სამხედრო-სამედიცინო აკადემიაში, თუმცა თვითონ ჭაბუკ გიორგის უფრო ისტორიული და ფილოლოგიური მეცნიერებების შესწავლა იზიდავდა, მაგრამ მოხდა ისე, რომ იგი ჯერ პეტროგრადის პოლიტექნიკური ინსტიტუტის სტუდენტად ჩაირიცხა, ხოლო შემდეგ, 1873 წელს პეტროგრადის სამხედრო-სამედიცინო აკადემიაში გადავიდა ქირურგიული განხრით.

1871 წელს გ. ზდანოვიჩი გაემგზავრა შორეულ პეტერბურგში — მაშინდელი რუსეთის კულტურულ და პოლიტიკურ ცენტრში. მან იქ თან ჩაიტანა მეფის კოლონიური რეჟიმის სიძულვილით ანთებული გული. რომელიც მხოლოდ ნაპერწყალს

ელოდა, რომ აფეთქებულიყო და იგი აფეთქდა კიდეც, როგორც ამას ქვემოთ დავინახავთ.

II

სტუდენტობის წლები.

რევოლუციური მოღვაწეობის დასაწყისი

სატახტო ქალაქმა თავისი ღირსშესანიშნავი ადგილებით, განსაკუთრებით კი თავისი ხალისიანი ახალგაზრდობით დიდი შთაბეჭდილება მოახდინა ჭაბუკ ზდანოვიჩზე. იგი მაშინვე ჩაება ამ ახალგაზრდობის მშფოთვარე ცხოვრებაში და თავი ისე ეჭირა თითქოს იგი პატარა პროვინციულ ქუთაისში კი არა, არამედ აქ, რუსეთის სატახტო ქალაქში ყოფილიყოს დაბადებული და აღზრდილი. ეს თავდაპირველობა, მოხერხებულობა, თანდაყოლილი ნიჭიერება, რომლითაც იგი უხვეად იყო დაჯილდოებული, აგრეთვე ერთგვარად კანდიერი სითამამეც, დიდად ეხმარებოდა მას შემოეკრიბა თავის გარშემო ნაცნობ-მეგობართა ფართო წრე.

გ. ზდანოვიჩის პეტერბურგში ჩასვლა დაემთხვა იმ პერიოდს, როდესაც რუსეთის რადიკალურად განწყობილი ახალგაზრდობა გატაცებული იყო „ხალხში გასვლის“ რევოლუციური იდეით, რომელიც ეპიდემიასავით ვრცელდებოდა.

მე-19 საუკუნის 70-იანი წლების დასაწყისში ხალხოსნურმა მოძრაობამ რუსეთში მეტად ფართო ხასიათი მიიღო. ასეთი რევოლუციური აღტკინების მიზეზი მაშინ ბევრი იყო. პირველ რაგში უნდა დავასახელოთ თვით რუსეთის დამყაყებელი სოციალური ურთიერთობანი, მისი ჩამორჩენილობა და აუტანლობა, რასაც ემატებოდა გარედან დასავლეთ ევროპის

პროგრესული იდეების გავლენა. ყირიმის ომში მეფის რუსეთის დამარცხების მძიმე შთაბეჭდილებანი, საზოგადოებრივი აზრის თანდათანობით გამოღვიძება, პროტესტები არსებული რეჟიმის წინააღმდეგ, 40-იანი წლების დასავლეთ ევროპის „უტოპიური სოციალიზმის“ გამოძახილი, ბრძოლა ადამიანის პიროვნების ელემენტარული უფლებებისათვის სულ უფრო და უფრო იქცინებოდა პოლიტიკური ხასიათის მოტივებითა და მოთხოვნებით. ბრძოლა აზროვნებისა და პიროვნების თავისუფლებისათვის ყოველი ფეხის ნაბიჯზე ააშკარავებდა და ნათელს ხდიდა არსებული პოლიტიკური წყობილებისათვის დამახასიათებელ წინააღმდეგობებსა და თვით ამ პოლიტიკური წყობილების სრულ უეარგისობას. მწიფდებოდა ძირეული პოლიტიკური რეფორმის აუცილებლობის შეგნება.

ამ მოძრაობამ უპირველეს ყოვლისა მოიცვა რუსეთის რაზნოჩინული ინტელიგენცია, სტუდენტობა და მოსწავლე ახალგაზრდობა. ამას ემატებოდა დასავლეთისა და იქ ემიგრაციაში მყოფი რუსეთის პროგრესულად განწყობილი პირების, განსაკუთრებით კი ბაკუნინის ანარქისტული შეხედულებათა გავლენა. მოძრაობა სულ უფრო სოციალისტურ ხასიათს ღებულობდა. „ინტერნაციონალიზმისა“ და საერთოდ ევროპული სოციალიზმის წარმატებებმა, ბაკუნინის მოძღვრების „ამბოხურმა“ სულმა, პარიზის კომუნის იდეების უდიდესმა გავლენამ ამ მოძრაობის მესვეურნი აიძულა „ბურჟუაზიულ პოლიტიკიდან“ სოციალისტურ პროპაგანდაზე გადასულიყვნენ. მოითხოვდნენ, რომ უახლოეს ხანში განვითარებულიყო სოციალური რევოლუცია.

1873 წლიდან იწყება მასიური „გასვლა ხალხში“, რევოლუციური სულისკვეთებით გაქცენილი ახალგაზრდობა ატო-

ვებდა ოჯახებს, თავს ანებებდა სწავლას, უარს ამბობდა ყოველგვარ მატერიალურ უზრუნველყოფაზე, რაიმე თვალსაჩინო საზოგადოებრივი მდგომარეობის მოპოვებაზე.

მაშინ მათ მოქმედების ნათელი პროგრამა არ გააჩნდათ, თვით მოძრაობაც არ იყო ერთიანი და მიზანმსწრაფვი. წრეები იქმნებოდა სპორადულად. მათ შორის ხშირად პრინციპული ხასიათის განსხვავებაც კი იყო. როგორც წესი, ისინი ერთმანეთისაგან სრულიად დამოუკიდებლად მოქმედებდნენ¹.

ამ რევოლუციურ მოძრაობაში ფართოდ მონაწილეობდა რუსეთში უმაღლესი განათლების მისაღებად წასული ქართველი ახალგაზრდობა. მათ საამისოდ, შეიძლება ითქვას, ორმაგი საბაბი გააჩნდათ. თავიანთი სამშობლოს დამონებული და უუფლებო მდგომარეობა, საქართველოში გამეფებული აუტანელი სოციალური ჩაგვრა, ეროვნული ენისა და კულტურის შევიწროება და გამოდევნა, მეფის მოხელეთა სიბეცე, ცარიზმის მიერ საქართველოში ქართველი ხალხის გარუსების პოლიტიკის გატარება, მათ არსებული რეჟიმისადმი უარყოფითად განაწყობდა. ისინი განსაკუთრებით მძიმედ განიცდიდნენ ეროვნულ ჩაგვრას — ეროვნული ენის, ეროვნული კულტურისა და ეროვნული დაწესებულებების უგულვებელყოფას. არა ერთი და ორი მაგალითის მოტანა შეიძლება იმის საილუსტრაციოდ თუ რადიკალურად განწყობილი ქართველი მოსწავლეთა ახალგაზრდობა როგორ უსწორდებოდა მეფის რეჟიმის ამა თუ იმ თავგასულ მოხელეს და ამით გამოხატავდა თავის პროტესტს არსებული დამყაყებელი წყობილების წინააღმდეგ. როდესაც ასეთი პროტესტანტული სულით გამკვეალუ-

¹ Речь и биография, стр. 1—7.

ლი ქართველი ახალგაზრდობა რუსეთში მიდიოდა უმაღლესი განათლების მისაღებად, მათ თან მიჰქონდათ ეროვნული შეურაცხყოფის გრძნობა და სიძულვილი სოციალური ბოროტებისადმი.

უკეთესი მდგომარეობა მათ არც რუსეთში ხედებოდათ. აქაც სტუდენტობა და მოსწავლე ახალგაზრდობა იმავე პროტესტანტული სულით იყო გამსჭვალული არსებული რეჟიმის წინააღმდეგ. კიდევ მეტიც: მათ უკვე ჩამოყალიბებული ჰქონდათ არალეგალური პოლიტიკური ორგანიზაციები, რომლებიც რევოლუციურ პროპაგანდას ეწეოდნენ მასებში.

ქართველი ახალგაზრდობა ღრმად ეცნობოდა მაშინდელი რუსეთის ცხოვრებას. აქაც, როგორც თავის სამშობლო საქართველოში, ესმოდათ უფლებაყრილი რუსი მშრომელი ხალხის კენესა, რასაც უერთდებოდა რუსეთის ახალგაზრდობის მგზნებარე ყიფინა, რომელიც ამ ხალხს ბრძოლისაკენ მოუწოდებდა.

ქართველი სტუდენტობისათვის ნათელი ხდებოდა, რომ გარდა ცარიზმისა, რომელიც ერთნაირად ჩაგრავდა რუს და ქართველ ხალხებს, არსებობდა მეორე რუსეთიც, მისი მოწინავე და პროგრესულად განწყობილ შვილთა სახით, რომელიც შეურიგებელ ბრძოლას აწარმოებდა სოციალური ბოროტებისა და ხალხთა ეროვნული ჩაგვრის მოსპობისათვის.

ქართველი და რუსი ახალგაზრდა რევოლუციონერები იმ რწმენით იყვნენ გაელენთილნი, რომ მომავალი სოციალური რევოლუცია შეუბრალებლად დალეწდა მონობის ბორკილებს, მოსპობდა ისტორიულ უსამართლობას და ხალხებს თავისუფლებასა და ბედნიერებას მოუტანდა. ისინი მზად იყვნენ პი-

რადი ბედნიერება მსხვერპლად მიეტანათ ხალხის კეთილდღეობისათვის და საფრთხის წინაშე არასოდეს უკან არ იხევდნენ.

ამრიგად, როდესაც გ. ზდანოვიჩი პეტერბურგში ჩავიდა, იქ ხალხოსნურ-რევოლუციური მოძრაობა უკვე საკმაოდ ფართოდ იყო გაშლილი. ვერც ქართველი სტუდენტობა აცდა ამ გზას.

სტუდენტი ზდანოვიჩის წინაშე თვითონ ცხოვრებამ დააყენა ასეთი კითხვა: გაპყლოდა უმაღლესი ცოდნის მიღების გზას და როგორც ექიმს ემსახურა თავისი ხალხისათვის, თუ ჩაბმულიყო რევოლუციურ ბრძოლაში მეფის თვითმპყრობელობის წინააღმდეგ.

რადგანაც გ. ზდანოვიჩი ყოველთვის თავისი ხალხისა და ქვეყნის ინტერესებს ყველაზე მაღლა აყენებდა, ამიტომ მან ხანგრძლივი ფიქრისა და მეტყუების შემდეგ, თავისი უსაყვარლესი დედის სურვილის საწინააღმდეგოდ გადაწყვიტა: თავისი მომავალი მოღვაწეობის ასპარეზად პროფესიონალი რევოლუციონერის ეკლიანი გზა აერჩია და შეეწირა ამ საქმიანობის ყველაფერი, რაც კი გააჩნდა — პირადი კეთილდღეობა. დაუშრეტელი ენერჯია და ნიჭი.

ამ პერიოდში რუსეთში არსებობდა ქართველი სტუდენტობის რამდენიმე რევოლუციური წრე, რომლებიც, სხვა ერის მოწინავე შვილებთან ერთად, ეწეოდნენ რევოლუციურ საქმიანობას. ერთ-ერთი ასეთი წრე იყო პეტერბურგში, რომელიც ჟანდარმერიის საიდუმლო დოკუმენტებით „ქართულ წრედ“ იწოდებოდა. ამ წრის აქტიური მონაწილე იყო ტექნოლოგიური ინსტიტუტის სტუდენტი ლევან აბღუშელიშვილი¹. „ქარ-

¹ ლ. აბღუშელიშვილი ბრალდებულად გადიოდა „193“-ის ცნობილ პროცესში, მაგრამ იგი აღარ გაუსამართლებიათ. ციხეში გარდაიცვალა.

თული წრის“ გარდა არსებობდა კიდევ „კავკასიის რევოლუციური წრე“, რომელსაც საკმაოდ ცნობილი რევოლუციონერი ეგნატე იოსელიანი ხელმძღვანელობდა.

სტუოენტიმა გ. ზდანოვიჩმა სწორედ „კავკასიის რევოლუციურ წრესთან“ დაამყარა კავშირი. გ. ზდანოვიჩისა და ე. იოსელიანის გარდა, ამ არალეგალურ წრეში შედიოდნენ: ლ. კვიციანიძე, კ. ბაქრაძე, პ. კვიციანიძე, ი. ბაქრაძე, ი. ქიქოძე და სხვები.

არალეგალური წრეების საქმიანობა შეუმჩნეველი არ დარჩენია ეანდარმერიას. მან შესწლო ამ წრეების განადგურება და ზოგიერთი მისი წევრის დაპატიმრება. ვინც გადარჩა, სხვადასხვა ქალაქებში გაიფანტნენ და ისევე თავდავიწყებით ჩაებნენ სხვადასხვა რევოლუციური წრეების საქმიანობაში.

როგორც ცნობილია, რუსეთის ბურჟუაზია ისტორიულ სტენაზე გვიან გამოვიდა, ეს მაშინ, როდესაც დასავლეთ ევროპაში მას უკვე გაბატონებული მდგომარეობა ეკავა როგორც ეკონომიკაში, ასევე პოლიტიკაში. ის ისტორიული როლი, რომელიც მას უნდა ეთამაშა რუსეთის სინამდვილეში, დიდ ბნანია ითამაშა ბურჟუაზიამ დასავლეთში. ამიტომ როდესაც იგი ასპარეზზე გამოვიდა რუსეთში, მისი საუკეთესო ხანა წარსულს ეკუთვნოდა, ამიტომაც მის პოლიტიკურ იდეალებს უკვე თითქმის აღარავინ შეეძლო მოეხიბლა. ამიტომაც მე-19 ს.-ის 70-იან წლების ხალხოსანი რევოლუ-

¹ სხვათაშორის, ამის შესახებ მიუთითებდა გ. ზდანოვიჩი თავის ბრწყინვალე სიტყვაში „50-ის პროცესზე“, რომლის შესახებაც უფრო ვრცლად ჩვემოდ გვექება საუბარი.

ციონერები დღეს წესრიგში აყენებდნენ არა ბურჟუაზიულ ლიბერალურ ლოზუნგებს, არამედ უშუალოდ სოციალისტურ მოთხოვნებებს, რომელთა განხორციელებასაც ისინი სოციალური რევოლუციის გზით აპირებდნენ. როგორც ცნობილია, ხალხოსნები მუშათა კლასს არ თვლიდნენ მოწინავე კლასად რევოლუციაში. ხალხოსნური მოძრაობის დასაწყისში ეს კიდევ გაააგები იყო. რადვანაც, მართალია, ბატონყმობის გაუქმების შემდეგ რუსეთში საკმაოდ სწრაფად მიმდინარეობდა კაპიტალიზმის განვითარება, მაგრამ რუსეთი მაინც ძალიან ჩამორჩებოდა თავისი ეკონომიური განვითარებით სხვა ბურჟუაზიულ ქვეყნებს. მოსახლეობის უდიდესი უმრავლესობა ჯერ კიდევ სოფლის მეურნეობას მისდევდა. რუსეთი კვლავ რჩებოდა აგრარულ, ეკონომიურად ჩამორჩენილ ქვეყნად, რომელშიც სჭარბობდა წვრილ-მესაკუთრული, მცირედნაყოფიერი ერთპიროვნული გლეხური მეურნეობა.

მაგრამ უკვე გასული საუკუნის 70-იანი წლებიდან მუშათა კლასმა რუსეთში გამოღვიძება დაიწყო. ამ დროიდან იწყება, მათი ბრძოლაც კაპიტალისტების წინააღმდეგ. მუშებმა დაიწყეს ერთმანეთთან შეთანხმება და ფაბრიკის, ქარხნის პატრონისათვის ერთად მოთხოვნის წარდგენა თავისი აუტანელი მდგომარეობის გაუმჯობესების შესახებ.

რუსეთის რევოლუციურმა ახალგაზრდობამ, რომელიც მანამდე იმედს მხოლოდ გლეხობაზე ამყარებდა, და ამიტომ მარცხს მარცხზე განიცდიდა, გადაწყვიტა შეეცავალა მოქმედების ტაქტიკა. მათ უკვე მიაჩნდათ, რომ სოციალური რევოლუციის გამარჯვებისათვის აუცილებელი იყო აგრეთვე კავშირის დამყარება ფაბრიკა-ქარხნების მუშებთან. მათ იწყეს მუ-

შებთან მასობრივად დაკავშირება და მათი არალეგალურ მუ-
შაობაში ჩაბმა.

რევოლუციური მოქმედების ცენტრი პეტერბურგიდან
მოსკოვში იქნა გადატანილი. 1874 წელს აქ დაარსეს ახალი წრე
„სრულიად რუსეთის სოციალ-რევოლუციური ორგანიზაცია“,
რომელიც შემდეგ რუსეთის რევოლუციური მოძრაობის ისტო-
რიაში შევიდა „მოსკოვის წრის“ სახელწოდებით. ორგანიზაცი-
ის ცენტრალურ ორგანოდ ითვლებოდა „ადმინისტრაცია ანუ
მმართველობა“.

ამ ორგანიზაციის შექმნაში თვალსაჩინო ღვაწლი მიუძღვის
ცნობილ ქართველ რევოლუციონერს ივანე სპირიდონის ძე
ჯაბადარს¹. ეს ის პერიოდია, როდესაც იწყება სოციალისტურ
პროპაგანდიდან „ბუნტარობაზე“ გადასვლა.

ამ წრის წევრთა უმრავლესობა თავდაპირველად ციურიხ-
ში იმყოფებოდა სასწავლებლად. ციურიხის უნივერსიტეტის
მიტოვების შემდეგ ისინი კვლავ რუსეთში ბრუნდებიან და
ხალხში გადრან. ამ წრეს ეკუთვნოდნენ, ჯაბადარის გარდა, ზდა-
ნოვიჩი, კარდაშევი, ჩიკოიძე. გამყრელიძე, ზლობინა, ბარდინა,
ციციშვილი, იოსელიანი და სხვა მრავალი.

ი. ჯაბადარის დამსახურება იმაშია, რომ მან ციურიხში ყოფ-
ნისას გააერთიანა ცალ-ცალკე არსებული წრეები, როგორც
იყო ციურიხის ქალთა არალეგალური წრე, რუსი სტუდენტ-

¹ ჯაბადარი ივანე სპირიდონის ძე (1852 — 1913 წწ.) საშუალო განათ-
ლება მიიღო თბილისში, შემდეგ სწავლობდა პეტერბურგში სამედიცინო-ქი-
მურჯიულ აკადემიაში. 1874 წელს მიდის პარიზში სწავლის გასაგრძელებ-
ლად. ერთი წლის შემდეგ ბრუნდება მოსკოვში. რევოლუციური მოღვაწე-
ობისათვის გააპაშარტლეს და მიუსჯეს 5 წლით კატორღა.

მედლეების ე. წ. „ფრიჩის“¹ წრე და რევოლუციურად განწყობილი შვეიცარიის ქართველი სტუდენტების წრე.

შვეიცარიიდან რუსეთში გადმოსვლის შემდეგ მათ შეუერთდნენ სხვებიც. პეტერბურგში ყოფნისას ი. ჯაბადარი დაუკავშირდა რევოლუციურად განწყობილ მუშებს. მათ შორის აღსანიშნავია პეტრე ალექსის ძე ალექსეევი, წარმოშობით გლეხი, რომელიც სხვებისაგან გამოირჩეოდა დიდი ორგანიზატორული ნიჭით, მკვერმეტყველებით, მოხერხებითა და თაოსნობით.

აღსანიშნავია ისიც, რომ „მოსკოვის ორგანიზაციისა“ და მისი ცენტრის „ადმინისტრაციის“ ჩამოყალიბებაში განსაკუთრებული დეაწლი მიუძღვით ზემოდჩამოთვლილ ქართველ ახალგაზრდა რევოლუციონერებსაც.

„მოსკოვის ორგანიზაციის“ პროპაგანდისტები მუშაობდნენ ფაბრიკა-ქარანებში, სახელოსნოებში, ეცნობოდნენ გლეხობის ცხოვრებას, ლაპარაკობდნენ მათთან მათ აუტანელ ცხოვრების პირობებზე, დაბალ ხელფასზე, მეპატრონეთა მხრივ ექსპლოატაციაზე, არსებული რეჟიმის პირობებში მათი მდგომარეობის გაუმჯობესების შეუძლებლობაზე, ავითარებდნენ მათ შორის სოციალისტურ იდეალებს. ისინი არ ჯერდებოდნენ მხოლოდ ზეპირ პროპაგანდას, აგრეთვე ცდილობდნენ გაეცრელებინათ მასებში რევოლუციური ბროშურებიც.

რუსეთში კაპიტალიზმის განვითარებასთან ერთად მუშათა კლასი ხდებოდა მძლავრ მოწინავე ძალად, რომელსაც შესწევ-

¹ ეს სახელწოდება ამ წრემ მიიღო მათ მიერ დაჭირავებული ბინის მეპატრონის გვარის მიხედვით.

და ორგანიზებული რევოლუციური ბრძოლის უნარი. მიუხედავად ამისა, სოციალ-რევოლუციური ახალგაზრდობა მუშათა კლასს არ სთვლიდნენ მოწინავე კლასად რევოლუციაში, ისინი ოცნებობდნენ სოციალიზმის მიღწევაზე უპროლეტარიატოდ. მთავარ რევოლუციურ ძალად ისინი სთვლიდნენ გლეხობას, ინტელიგენციის ხელმძღვანელობით და გლეხურ თემს, რომელსაც ისინი უყურებდნენ, როგორც სოციალიზმის ჩანასახსა და საფუძველს. მაგრამ თემი არ იყო და არც შეიძლებოდა ყოფილიყო სოციალიზმის არც ბაზა, და არც ჩანასახი, ვინაიდან თემში ბატონობდნენ კულაკები, „სოფლიჭამიები“, რომლებიც ექსპლოატაციას უწევდნენ ლარიბებს, მოჭამაგირეებს, ხელმოკლე საშუალო გლეხებს.

ხალხოსნებს მტკიცედ სწამდათ, რომ მეფისა და მემამულეთა ძალაუფლების დამხობა შეიძლებოდა ძირითადად გლეხური „ბუნტების“ გზით. მათი უბედურება ის იყო, რომ ისინი კარგად არც მუშებს იცნობდნენ და არც გლეხებს და არ ესმოდათ მათი ნამდვილი საჭიროებანი, ამიტომ გლეხობა არ გაჰყვა მათ, ხოლო მუშებში რომ დიდი პოპულარობა ვერ მოიპოვეს ამის საილუსტრაციოდ გვინდა მოვიყვანოთ ზდანოვიჩის სიტყვები ტუნის ნაშრომიდან: „სამხრეთიდან უნუგეშო ცნობებია... — წერდა ზდანოვიჩი 1875 წლის 19 ივნისს მოსკოვიდან ივანოვოში, — ორ წევრს აღარ სურს ოდესაში დარჩენა. ტულებები დანაშაულებრივად იქცევიან. მათ ძალიან დიდი ნაცნობობა აქვთ მუშათა შორის და ჭერ კიდევ არცერთი რევოლუციური წიგნი არ წაუკითხავთ...“ წერილი ასე მთავრდებოდა: „გიგზავნით წიგნებს, ვიგზავნით რევოლუციურებს ვაზნებითურთ, დახოცეთ, ესროლეთ, იმუშავეთ, აჭანყდით“.

„სრულიად რუსეთის სოციალ-რევოლუციური ორგანიზაცია“ და მისი „რევოლუციური მოქმედების პროგრამა“

როგორც აღვნიშნეთ, 1874 წელს, ქართველი რევოლუციურად განწყობილი სტუდენტების აქტიური მონაწილეობით, შეიქმნა სოციალ-რევოლუციონერთა ფარული საზოგადოება, ეგრეთწოდებული „მოსკოვის ორგანიზაცია“. ეს საზოგადოება თავდაპირველად შესდგებოდა ერთი წრის ადამიანებისაგან. იგი შექმნეს იმ პირებმა, რომლებმაც მიატოვეს რუსეთი, გადასახლდნენ საზღვარგარეთ, უპირატესად შვეიცარიაში, და შემდეგ რუსეთში იმ ერთადერთი მიზნით დაბრუნდნენ, რომ ხელი მიეყობათ რევოლუციური იდეების პროპაგანდისათვის მოსახლეობაში. მათ შორის იყვნენ ზდანოვიჩი, ჯაბადარი, კარდაშევი, ჭიკოიძე, თავადი ციციანოვი, ბარდინა, ალექსანდროვი, ფინგერი, დები სუბოტინები და სხვები.

1875 — 76 წლებში ასეთივე ფარული ორგანიზაციები ანუ წრეები დაარსებული იქნა მოსკოვში, ვლადიმირისა და სარატოვის გუბერნიებში, ქალაქებში — ტულაში, კიევში და ოდესაში. ეს ორგანიზაციები, მეფის ჟანდარმერიის სიტყვებით რომ ვთქვათ, მონად ისახავდნენ „მმართველობის არსებულ სისტემის დამხობასა და ანარქიის გამეფებას რუსეთში“.¹

პოლიცია მათ ყველგან ღვენიდა. ისინი, ვინც 1875 წელს და-

¹ Тух, истории революционного движения в России, Петроград, 1917, с. 117.

პატიმრებას გადაურჩნენ, გაიფანტნენ სხვადასხვა გუბერნიებში, დაიყვნენ ცალკე წრეებად ანუ იგივე „თემებად“. მათ მოსკოვში დაასრეს თემების ცენტრალური მმართველობა ადმინისტრაციის სახელწოდებით. თუ როგორი იყო ამ თემების სტრუქტურა, მათი ორგანიზაციული საფუძვლები და თემის წევრთა უფლება-მოვალეობანი, ამასე ქვემოთ გვექნება საუბარი, როდესაც მათი „რევოლუციური მოქმედების პროგრამას“ განვიხილავთ. თემები მოქმედებდნენ პროგრამისა და წესდების საფუძველზე, რაც თემის ყველა წევრისათვის უპირობად სავალდებულო იყო შესასრულებლად. ჰქონდათ სალარო. რომელშიც 10 ათას მანეთამდე თანხა ინახებოდა. თემების განყოფილებანი იქმნებოდა უმთავრესად დიდ ქალაქებში: კიევში, ტულაში, ოდესაში, ივანოვო-ვოზნესენსკში და ა. შ. სადაც ბევრი ფაბრიკა-ქარხანა და სახელოსნო იყო. თემის განყოფილებანი იქმნებოდნენ უმუშალო რევოლუციური იდეების პროპაგანდის მიზნით, ხოლო თვით თემთა შორის საერთო კავშირს და სხვა რევოლუციურ თემებთან ურთიერთობას „მმართველობა“ ანუ „ადმინისტრაცია“ ახორციელებდა. პროპაგანდას, რასაც ჩვეულებრივ „მუშაობას“ უწოდებდნენ, უმთავრესად თემის წევრებს აკისრებდნენ. თემის ეს წევრები „მუშებად“ იწოდებოდნენ. ეს „მუშები“ ეწყობოდნენ ფაბრიკა-ქარხნებში, სახელოსნოებში. რიგით მუშებად. თან ცდილობდნენ არაფრით არ ყოფილიყვნენ გამორჩეულნი სხვებისაგან — არც გარეგნულად ჩაცმა-დასურვით, არც ცხოვრების წესითა და ჩვევებით. ისინი ყოველნაირად ცდილობდნენ დაემყარებინათ კავშირი მუშებთან, გაცნობოდნენ მათ, გაეგოთ თუ რას ფიქრობდნენ ისინი, როგორც იყო მათი რწმენა თვითთულისა ცალ-ცალკე. შემდეგ თვითთული მუშის ან შე-

გირდის უნარისა და ინდივიდუალური თავისებურებათა გათვალისწინებით. იწყებდნენ მათ შორის რევოლუციურ მოქმედებას. ჯერ სიტყვას ჩამოუგდებდნენ საერთოდ მუშის ცხოვრების აუტანელი პირობების შესახებ რუსეთში, მცირე ხელფასზე, მათ ექსპლუატაციასზე, მუშათა მდგომარეობის გაუმჯობესების შესაძლებლობაზე. როდესაც დაინტერესებდნენ მუშებს ამ გზით, პროპაგანდისტები გადადიოდნენ იმ საშუალებათა დასახელებაზე, რაც, მათი აზრით, გააუმჯობესებდა მათ მდგომარეობას. თან მუშებს განუმარტავდნენ, რომ მიწა ეკუთვნის ხალხის უბრალო კლასებს, რომ იგი თანასწორად უნდა იყოს განაწილებული ყველას შორის. საკუთრება საერთო უნდა იყოს, არწმუნებდნენ ისინი მსმენელებს. არ უნდა არსებობდნენ მემარტლები, ვაჭრები და საერთოდ მდიდრები და ღარიბები. საფაბრიკო შრომამ სარგებლობა მხოლოდ მუშებს უნდა მოუტანოს და სხვ. მსგავს ახსნა-განმარტებებს თან მოჰყვებოდა მტკიცება, რომ ამისათვის აუცილებელია დამხობილი იქნეს მემარტლების, ვაჭრების, ფაბრიკანტებისა და ყველა მჩაგვრელის ხელისუფლება. პროპაგანდა მთავრდებოდა მოწოდებით არსებული წყობილების შეიარაღებული აჯანყების გზით დამხობისა და არსებული საზოგადოებრივი წყობილების ნანგრევებზე მუშათა სასუფეველის აღმართვის შესახებ¹.

რათა უფრო ხათელი წარმოდგენა შეგვექმნას სოციალ-რევოლუციონერთა ორგანიზაციების საქმიანობაზე, მათ მიზნებზე და ამოცანებზე, საჭიროდ მიგვაჩნია გადმოვიცეთ მათი „რევოლუციური მოქმედების პროგრამის“ მოკლე შინაარსი. ეს მითუმეტეს საჭიროდ მიგვაჩნია, რომ ეს პროგრამა მკიდროდ არის

¹ «Процесс 50-ти» издание В. М. Саблина, М., 1906 г., стр. 40, 121.

დაკავშირებული ჩვენი სახელგანთქანი თანამემამულის გ. ზდანოვიჩის მიხედვით სახელგანთქანი.

აღნიშნული პროგრამას მეფის იუსტიცია მიაწერდა გ. ზდანოვიჩს. იგი მის მიერ შედგენილად მიაჩნდა. ჩატარებული ექსპერტიზის შედეგად დადგინდა, რომ პროგრამა ნამდვილად გ. ზდანოვიჩის ხელით იყო გადაწერილი. თვით გ. ზდანოვიჩი ამ პროგრამის ავტორობას უარყოფს. ლიტერატურაში არსებობს ისეთი აზრები, რომელიც ამ პროგრამის შედგენას ი. ჯაბაღარიას მიაწერს. ასეა იგი ისე. იგი ისტორიული მნიშვნელობის დოკუმენტია, რომელიც მეფის განდარმერიათ გ. ზდანოვიჩთან აღმოაჩინა და რომელიც შემდეგ საფუძვლად დაედო „50-ის პროცესის“ სახელწოდებით ცნობილ პოლიტიკურ პროცესს. მაგრამ ამის შესახებ ქვემოთ.

თუ რაგორ შეფასებას აძლევდა მეფის მართლმსაჯულება აღნიშნულ დოკუმენტს: «Отобращающая у Здановича программа революционной деятельности... является... документом особенно важным и существенным. Документ этот представляет отчетливую характеристику образа действий пропагандистов и основанниц, на которых учреждено было тайное общество с целью ниспровержения существующего порядка управления. Документ этот служит самой убедительной улыбкой к обвинению всех... лиц, преступная деятельность которых вполне согласовалась с началами, проложенными в основе этой программы... Сама программа не представляется одним только проектом, но была осуществлена и применена на деле»¹.

¹ «Процесс 50 тл», стр. 23.

„რევოლუციური მოქმედების პროგრამა“ შესდგებოდა 12 თავისაგან. თავები თავის მხრივ პარაგრაფებად იყოფოდა. მასში ლაპარაკი იყო ორგანიზაციის პრინციპებზე, ორგანიზაციის წესზე, თემის წევრად მიღების პირობებზე, თემის წევრთა უფლებებსა და მოვალეობებზე, თემების ადმინისტრაციაზე, პროპაგანდის დროს მოქმედების წესზე, აგიტაციაზე როგორც მშვიდობიანობის დროს ასევე აჯანყებათა მსვლელობაში, ორგანიზაციის ფულად სახსრებზე, წიგნების საკითხზე, თემების კრებებზე და თემთა შორის ურთიერთობის პირობებზე.

თემები ეწყობოდნენ ორგანიზაციის საქმეში თემის ყველა წევრის აბსოლუტური თანასწორობის, სრული სოლიდარობის, სრული ნდობის და პირდაპირობის საფუძველზე; ყოველი ახალი თემი არსდებოდა უკვე არსებული თემების წევრთაგან, ამ თემების პროგრამათა მიხედვით; თემის წევრებად მიიღებოდნენ მხოლოდ ის პირები, რომლებიც მთლიანად და გულწრფელად იწამებდნენ რევოლუციურ საქმიანობას, საჭიროების შემთხვევაში თემის ყველა წევრს საზოგადო საქმისათვის უნდა ენაცვალებინა ყოველგვარი პირადი კავშირურთიერთობა. მათთვის დამახასიათებელი უნდა ყოფილიყო თავგანწირვა და საიდუმლოების შენახვის უნარი. საიდუმლოების დაცვის აუცილებლობა ყველგან და ყველადღერში წითელ ზოლად გასდევს ამ პროგრამას თავიდან ბოლომდე. წევრად მიღებამდე პირი აუცილებლად უნდა გამოეცადათ პრაქტიკულად. თემის წევრები თავიანთი რევოლუციური საქმიანობის შესახებ ანგარიშს აბარებდნენ თემს. მათ არ შეეძლოთ საცხოვრებელი ადგილის შეცვლა თემის თანხმობის ვარჯშე. მათვე ეკრძალებოდათ დაემყარებინათ ხელშეკრულებითი კავშირი სხვა პიროვნებებთან, წრებთან ან პარტიებთან. მათ უყოყმანოდ უნდა შეესრულე-

ბიხათ თემის ყოველგვარი დავალება.. თემის ყველა წევრი თანასწორი უფლებებით სარგებლობდა, უფლება ჰქონდათ მოეთხოვათ ყველა ცნობა თემის მმართველობისაგან; განეხორციელებინათ კონტროლი და მოეწვიათ თემის საგანგებო კრება.

თემის მიმდინარე საქმეებს ხელმძღვანელობდა თემის აღმინისტრაცია. მმართველობის წევრები ინიშნებოდნენ რიგის მიხედვით წევრთა ურთიერი: -შეთანხმების საფუძველზე. აღმინისტრაციის შემადგენლობაში ყოველთვის უნდა ყოფილიყო როგორც ინტელიგენციის, ასევე მუშათა წარმომადგენელი. აღმინისტრაციის შემადგენლობა სამი კაცით განისაზღვრებოდა. ინიშნებოდა ერთი თვის ვადით. თემის მმართველობა მუდმივ კავშირში იყო სხვა თემებთან, განსაკუთრებით წიგნებისა და ფულადი სახსრების საკითხთან დაკავშირებით. იგი აწარმოებდა ბინების დაქირავებას პროპაგანდისტებისათვის, თემის საქმეებთან დაკავშირებით აწარმოებდა მიწერ-მოწერას სხვა თემებთან, ამარაგებდა რევოლუციურ წრეებს ფულითა და წიგნებით. ყალბი პასპორტებით. ტანსაცმლით, ბინებით და ყველა სხვა საშუალებით.

თემის წევრს ენიჭებოდა რევოლუციური მოქმედების სრული თავისუფლება, თუ იგი ორგანიზაციის საზიანოდ არ იმოქმედებდა. პროპაგანდის დროს იგი თავისი სახელით გამოდიოდა და არა ორგანიზაციისა. პროპაგანდა გამოიხატებოდა რევოლუციური ხასიათის წიგნების კითხვაში, მას უნდა აღეძრა მსმენელში რევოლუციური სულისკვეთება და განეწყო რევოლუციის სასარგებლოდ. მიეზიდა ისინი წრეებში. პროგრამა განასხვავებდა ურთიერთისაგან პროპაგანდასა და აგიტაციას. კერძოდ. მათ შორის განსხვავებას იმაში ჰხედავდა, რომ

«Пропаганда служит для выяснения взглядов на ре-

волюციონიზმის დელო, ი აგიტაცია იმეო პებუდით ლიქნოოტი ილი კრუჟკი პრემო ია აქტიური რეოლუციონური დეაქტელონოოტი».

აგიტაცია უნდა იაეკარებინათ ორგანიზებულ ჯგუფებს, მათ შიშის ზარი უნდა დაეკათ მთავრობისა და პრივილიგიებულ კლასებისათვის, აემადლებინათ ხალხის სულიერი განწყობილება. მათი საქმიანობა წმინდა სოციალურ-რეოლუციური უნდა ყოფილიყო. აქანყებების დროს სააგიტაციო ჯგუფებს ევალეობდათ მისი ხელმძღვანელობა. თვით თემის წევრთა მონაწილეობა აქანყებაში ან მოძრაობაში დაიშვებოდა იმდენად. რამდენადაც იგი საფრთხეს არ შეუქმნიდა ორგანიზაციის გამომყდავენებას.

ყველა თემს გააჩნდა თავისი დამოუკიდებელი ფონდი. მისი შევსება ხდებოდა ისეთი საშუალებებით, რაც ზიანს არ მიაცენებდა ორგანიზაციის უშიშროებასა და ავტორიტეტს. თემის ყოველი წევრი მოვალე იყო ეზრუნა თემის სახსრების შეგროვებისათვის, მაგრამ ეს არ უნდა ყოფილიყო მისი ერთადერთი გატაცება.

შემდეგ პროგრამაში ლაპარაკი იყო წიგნების საკითხზე, მათი საზღვარგარეთიდან შემოტანისა და გატანის წესზე. თემის კრება იკრიბებოდა თვეში ერთხელ, განიხილავდა მიმდინარე საკითხებს. სავალდებულო იყო ყველა წევრის დასწრება. საპატიო მიზეზით არ დასწრება აუცილებლად უნდა სკნობებოდა თემს. ასეთი იყო ძირითადად „რეოლუციური მოქმედების პროგრამის“ შინაარსი¹.

როგორც პროგრამიდან ჩანს, ახლა „სრულიად რუსეთის სოციალ-რეოლუციური ორგანიზაციის“ ორგანიზატორები გა-

¹ «Процесс 50-ти», стр. 23—54.

მარჯვების იმედებს მხოლოდ გლახობაზე აღარ ამყარებდნენ და დიდ ანგარიშს უწევდნენ მუშებს, მათთან კავშირის დამყარების აუცილებლობას.

გვინდა შევჩერდეთ ერთ საინტერესო დეტალზე: პროგრამა, როგორც დავინახეთ, თემის წევრებს ანიჭებდა ფულის მოპოვების თავისუფლებას, განსაზღვრული პირობების დაცვით. როგორც ვიცით. ამ რევოლუციური ორგანიზაციების წევრთა უდიდესი უმრავლესობა გამოსული იყო მაღალი წრეებიდან. ისინი ხშირად თავიანთ სამკვიდრო ქონებას ჰყიდდნენ და აღებული ფული ორგანიზაციის სალაროში შექქონდათ. სხვა მრავალ გზებთან და საშუალებებთან ერთად, რომელთა მეშვეობითაც ხდებოდა თემისათვის სახსრების შეგროვება, აღსანიშნავია ეგრეთწოდებული ფიქტიური ქორწინებები თემის წევრთა შორის. სასიძო ამ შემთხვევაში საცოლეს მშობლებისაგან ღებულობდა მზითვების ღირებულებას და აღებული თანხა ორგანიზაციის სალაროში შექქონდა. მაგალითად, ცნობილი ხალხოსანი რევოლუციონერი ა. ციციშვილი სპეციალურად ჩამოვიდა თავის მშობლიურ გორის მაზრაში, მიიღო კუთვნილი სამკვიდრო ქონება, გაჰყიდა იგი და აღებული თანხა მთლიანად შეიტანა ორგანიზაციის სალაროში. ფიქტიურ ქორწინებებიდან აღსანიშნავია ქორწინება ა. გამყრელიძესა და ე. თუმანოვს (თუმანიანი) შორის, აგრეთვე ა. ციციშვილსა და ა. სორევესკაიას შორის. ორივე შემთხვევაში მზითვის სახით აღებული თანხა რამოდენიმე ათას მანეთს შეადგენდა და იგი უკლებლივ იქნა შეტანილი რევოლუციონერთა ორგანიზაციაში.

როგორც ვხედავთ ასეთი ფიქტიური ქორწინებები საიმედო წყაროს წარმოადგენდა ფულის მოპოვებისათვის.

„სრულიად რუსეთის სოციალ-რევოლუციური ორგანიზა-

ციის“ ადმინისტრაცია ანუ მმართველობა იმყოფებოდა ქ. მოსკოვში. ყველა რევოლუციური თემი ემორჩილებოდა მოსკოვის ცენტრს, როგორც ხელმძღვანელ ორგანოს.

თემის წევრთა შორის, უნარისდა მიხედვით, განაწილებული იყო თუ რა სამუშაო უნდა შეესრულებინათ მათ. თემების რევოლუციური მუშაობის საერთო ხელმძღვანელობას ახორციელებდა ი. ჯაბადარი. მისი დაპატიმრების შემდეგ ხელმძღვანელობა გადავიდა ა. გამყრელიძის ხელში.

პროპაგანდისტული მუშაობის ხელმძღვანელობა დავალებული ჰქონდათ აქტიურ რევოლუციონერებს ს. ბარდინას, ე. გამყრელიძეს, თუმანოვს (თუმანიანი), ო. ლიუბატოვიჩს, ვ. ლიუბატოვიჩს, დ. ვამინსკისა და სხვებს. თუ რაში გამოიხატებოდა მათი პროპაგანდისტული მუშაობა, ამის შესახებ საკმაოდ გვაქვს აღნიშნული ზემოთ.

რევოლუციონერთა სალაროს ხელმძღვანელობდა ს. კარტაშოვი (კარტაშიანი). ფაბრიკა-ქარხნების მუშებთან კავშირის გაბმის მუდმივი ხელმძღვანელობა დავალებული ჰქონდა პ. ალექსეევს.

ყველაზე რთული, ხიფათით სავსე და საპასუხისმგებლო საქმე დავალებული ჰქონდა გ. ზდანოვიჩს. მას ეკისრებოდა უცხოეთიდან ფარულად ლიტერატურის შემოტანა.

ამ დავალების შესასრულებლად გ. ზდანოვიჩი დაკავშირებული იყო უცხოეთში მყოფ რევოლუციონერ ემიგრანტებთან. მათ შორის ს. მ. კრაფჩინსკი-სტეპნიაკთან, რომელიც შვეიცარიაში ცხოვრობდა და დიდი ავტორიტეტით სარგებლობდა ემიგრანტთა შორის. იგი დიდ დახმარებას უწევდა ზდანოვიჩს არალეგალური ლიტერატურის შექმნის საკითხში.

გ. ზდანოვიჩს კავშირი ჰქონდა აგრეთვე მაშინ ენევაში

მცხოვრებ ცნობილ რევოლუციონერებთან ვარლამ ჩერქეზი-
შვილთან, ელენცთან, ყუკოვსკისთან და სხვებთან. ისინი უხვად
ამარაგებდნენ ზდანოვიჩის არალეგალური ლიტერატურით, რომელიც
მას ფარულად შემოჰქონდა რუსეთში და უნაწილებ-
და რევოლუციურ თემებს. ეს ლიტერატურა შემდეგ მუშებს
შორის ვრცელდებოდა.

ცხადია, აკრძალული ლიტერატურის ფარულად შემოზიდვა
რუსეთში დიდ სიძნელებთან იყო დაკავშირებული. ეს მე-
ტად სარისკო საქმე გახლდათ.

გ. ზდანოვიჩი სრულიად რუსეთის სოციალ-რევოლუციური
ორგანიზაციის წევრთა შორის დიდი გავლენით სარგებლობდა.
ითვლებოდა ხალხის განთავისუფლებისათვის თაღდადებულ
მებრძოლად. იყო შესანიშნვი ორატორი, კარგი აგიტატორ-
პროპაგანდისტი, დიდი ნიჭისა და რკინისებური დისციპლინის
აღამიანი, მაღალი მორალური თვისებებით დაჯილდოებული
მოღვაწე, მგზნებარე ტემპერამენტის რევოლუციონერი. ეს
თვისებები მას რევოლუციონერთა შორის წინა პლანზე აყენებ-
და. მისი გავლენა ყველგან იგრძნობოდა.

მეფის ჟანდარმერიამ და საიდუმლო პოლიციამ კარგად
იცოდნენ გ. ზდანოვიჩის ასეთი დიდი გავლენა რევოლუციურ
მოძრაობაზე. ყოველნაირად ცდილობდნენ მის ხელში ჩაგდე-
ბას, მაგრამ მარჯვე და მოხერხებულ კონსპირატორთან ვერა-
ფერი გააწყვეს.

ბოლოს და ბოლოს მეფის ჟანდარმერიამ და საიდუმლო პო-
ლიციამ მაინც შესძლო მიეგნო რევოლუციური ორგანიზაცი-
ისათვის და დაეპატიმრებინა მისი მოთავეები.

რევოლუციური ორგანიზაციების მასიური ჩავარდნა იწყება
1875 წლის მარტის თვიდან. ეს ჩავარდნები და დაპატიმრებანი

დაიწყო არა ვინმეს გამცემლობის გამო, არამედ სრულიად შემთხვევით. თანაც საქმე გახსნა ადამიანმა, რომელსაც არავითარი კავშირი არ ჰქონდა რევოლუციური ორგანიზაციების საქმიანობასთან.

ეს ასე მოხდა: ვინმე ნ. ვასილევს, წარმოშობით გლეხს, მოსკოვის მცხოვრებს, საყვარლად ჰყავდა ასევე ვინმე დ. სკვორცოვა. ამ ვასილევს თემის წევრები უგზავნიდნენ რევოლუციურ წიგნებს, მიაჩნდათ რა საიმედო ადამიანად. და აი ერთხელ პოლიციამ გაიგო ამ წიგნების შესახებ. მათ 1875 წლის 29 მარტს დააპატიმრეს ნ. ვასილევი. დ. სკვორცოვამ იფიქრა ამაში დამნაშავენი არიან ის პირები, რომელთაც ჩემს საყვარელს არალეგალური ლიტერატურა მიაწოდესო, ადგა და დააბეზლა ისინი მოსკოვის საგუბერნიო ქანდაკმერიაში. მან გასცა მისამართი, სადაც რევოლუციონერები ცხოვრობდნენ. ქანდაკმერია დაუყოვნებლივ გამოცხადდა აღნიშნულ მისამართზე, მოახდინა ჩხრეკა და დააპატიმრა იქ მყოფი რევოლუციონერები ი. ჯაბადარი და პ. ალექსეევი.

ამას შემდეგ მოჰყვა ფარული ორგანიზაციების წევრთა საყოველთაო დაპატიმრებანი, არალეგალური ბინების ჩაყარვანი კიევში, ოდესაში, ხარკოვში, ივანოვო-ვოზნესენსკში და სხვაგან.

საიდუმლო თემების აღმოჩენით მეფის მთავრობისათვის ნათელი გახდა, რომ მთელი რუსეთის იმპერიის უზარმაზარ ტერიტორიაზე ფართოდ იყო გაშლილი კარგად ორგანიზებული შეთქმულება. რომელიც მიზნად ისახავდა არსებული რეჟიმის დამხობას.

ამ პირველ დაპატიმრებებს გ. ზდანოვიჩი გადაურჩა, მაგ-

რამ ხათქვამია: კოკა წყალს ყოველთვის ვერ მოიტანსო. ასე დაეპართა ამ ცნობილ რევოლუციონერსაც.

1875 წლის სექტემბრის თვეში გ. ზდანოვიჩმა უცხოეთიდან ქ. კიშინოვში გამოგზავნა არალეგალური წიგნებით სავსე სამი ყუთი, ტვირთის წონა შეადგენდა 131,5 კგ. საბუთები ისე იყო გაფორმებული თითქოს ტყავს აგზავნიდა. როდესაც ტვირთი დანიშნულების ადგილზე მოვიდა, ზდანოვიჩმა იგი გამოიხსნა და გადასცა იქვე მოსკოვში გადასაგზავნად. ამის შემდეგ ზდანოვიჩი კიშინოვიდან მოსკოვში გაემგზავრა, დაბინავდა მოქ. გურევის სასტუმროში ვინმე ვერნერის სახელზე. იგი ღარწმუნებული იყო, რომ ტვირთს მშვიდობიანად მიიღებდა მაგრამ მოხდა პირიქით. კიშინოვის ვაგზალზე მწონავენს მოუპარა ერთი ყუთი, რადგან უფიქრიათ, შიგ მართლაც ტყავიაო. მაგრამ შწარედ მოტყუდნენ. დანაშაულის კვალის დასაფარად მათ ყუთი აგურებიო, ნაგვითა და შეშით აუვსიათ. ხოლო წიგნები კი გაუყიდიათ.

ეს ამბავი შეიკრთა უანდარმერიამ და მაშინვე შეუდგა დამნაშავე პირის ძებნას. გ. ზდანოვიჩი, რომელმაც არაფერი იცოდა მომხდარი ფაქტის შესახებ. 1875 წლის 19 სექტემბერს დაშვილებული გამოცხადდა მოსკოვ-კურსკის სადგურზე ტვირთის მისაღებად. სადგურზე მან ექვი აიღო, რომ საქმეს კარგი პირი არ უჩანდა და გაიქცა, მაგრამ მალე დაიჭირეს. ჩამოართვეს ყალბი პასპორტი, გაცემული ვერნერის სახელზე. გ. ზდანოვიჩმა უარყო თავისი ვერნერობა, განაცხადა რომ ეს პასპორტი მან ბახარში იპოვა, ხოლო თვითონ კი არის ივანე ანდრეევი. უანდარმერიამ ყუთების გახსნისას შიგ აღმოაჩინა 2400 ცალი რევოლუციური ხასიათის წიგნი, ხოლო ამ ანდრეევის ბინის გაჩხრეკვისას, გატენილი რევოლვერი, ხელნაწერე-

ბა: „მოქმედების პროგრამა“, „რევოლუციონერის წესდება“, „საიდუმლო საზოგადოების ორგანიზაცია“, მისამართების სია შვეიცარიაში, სერბიაში. ვენაში, მორავიაში და ა. შ. აგრეთვე მრავალი დოკუმენტი, შიფრები და სხვ. აღმოჩენილი იქნა აგრეთვე თმის შესადები სიჯხე. დაპატიმრების მომენტში ზდანოვიჩს თმები და წვერ უღვაში შავად ჰქონდა შეღებილი. ეს ძიებმაც დაადგინა. საერთოდ ზდანოვიჩს მწითური თმები ჰქონდა, რისთვისაც მას მეტსახელად „რიჟას“ ეძახდნენ. გ. ზდანოვიჩი უარყოფდა ჩამორთმეული ხელნაწერების კუთვნილებას და ჯიუტად ძალავდა თავის ვინაობას, მაგრამ ძიებით მაინც დადგენილ იქნა, რომ იგი იყო კავკასიის მკვიდრი, გადამდგარი შტაბს-კაპიტნის ფელიქს ზდანოვიჩის შვილი. ადგილობრივ კავკასიაში დაკითხულმა პირებმაც დაადასტურეს ეს ფაქტი. ისიც დადგენილი იქნა, რომ „რიჟასა“ და „ანდრეევის“ ქვეშ ერთი და იგივე პირი — გ. ზდანოვიჩი იმალებოდა. ერთ-ერთმა მოწმემ ძიებას განუცხადა, რომ იგი იცნობდა ზდანოვიჩს 1871 წლიდან, ხვდებოდა მას პეტერბურგში ი. ჯაბადარის ბინაზე, სადაც ხშირად იმყოფებოდა აგრეთვე ჭიკოიძეც. ზდანოვიჩის ამხანაგები და მეგობრები ვიცნობდით „რიჟას“ მეტსახელითო. ეს მეტსახელი ზდანოვიჩს არ სწყინდა. პირიქით, იგი მის მეტსახელად გადაიქცა და თვითონაც წერილებს ხელს აწერდა, როგორც „გიორგი რიჟა“. მან გაიხსენა ფაქტი, როდესაც იგი 1874 წელს, ჯაბადართან და ჭიკოიძესთან ერთად, პარიზში იმყოფებოდა და იქ მიიღეს პეტროგრადიდან გამოგზავნილი ზდანოვიჩის წერილი მისამართით: „მოქალაქე ძმებს“, რომელსაც ხელს აწერდა „რიჟა“. ამ მოწმის დახასიათებით ზდანოვიჩი გამოირჩეოდა ფრაზიორობით, ლიბერალური შეხედულებებითა

და იმით, რომ თავის თავს პირდაპირ აღიარებდა რუსეთის მთავრობის მოწინააღმდეგედო¹.

ბოლოს თვითონ „ივანე ანდრეევიც“ იძულებული გახდა ელიარებინა რომ იგი ზდანოვიჩი იყო. ამაში განსაზღვრული როლი ითამაშა მისმა შეღებილმა თემებმაც, რომლებმაც დროთა განმავლობაში თავისი ბუნებრივი მოწითალო ფერი მიიღეს.

ამრიგად, ფარული ორგანიზაციების აღმოჩენიდან 7 თვის გასვლის შემდეგ ჩავარდა გ. ზდანოვიჩიც. მეფის უნდარმერია გამარჯვებას ზეიმობდა. ცდილობდა ეს ფაქტი ხალხის დასაშინებლად გამოეყენებინა და სასტიკად გაესწორებინა ანგარიში „შეაქმულათვის“, გაეტეხა სახელი მათთვის და მათი საქმიანობისათვის საზოგადოების თვალში. თუ როგორ შესძლო მან ეს, ამას ქვემოთ ლავინახავთ.

IV

„50-ის პროცესი“. გ. ზდანოვიჩის სიტყვა

„50-ის პროცესი“ უტყუარი დადასტურებაა რუსი და ქართველი ხალხის შეგობრობისა. პროცესზე ბრალდებულ პირთა შორის განსაკუთრებით გამოირჩეოდა ჩვენი თანამემამულე გეორგი ფელიქსის ძე ზდანოვიჩი-მიააშვილი, რომელმაც თავისი გამბედაობით, ნიჭითა და რევოლუციის საქმისადმი თავდადებით ღირსეულად დაიკავა საპატიო ადგილი რუსეთის რევოლუციური მოძრაობის ისტორიაში.

დიდია ამ პროცესის მნიშვნელობა. 90 წლის გასვლის შემდეგაც არ დაუკარგავს მას თავისი მიმზიდველობა და შთავგა-

¹ «Процесс 50-ти», стр. 22—23.

გონებს თუ როგორი შემართებაა საქირო იდეისათვის, რწმენისაივის ბრძოლაში.

„50-ის პროცესზე“ ბრალდებულად გამოდიოდა ხუთი მოწინავე ქართველი სტუდენტი — ხუთივე მგზნებარე რევოლუციონერი და დაუცხრომელი მებრძოლი მეფის თვითმპყრობელობის წინააღმდეგ. ესენი არიან:

1. გიორგი ველიქსის ძე ზდანოვიჩი, 22 წლის (მეტსახელად „რიჟა“);

2. ივანე სპირიდონის ძე ჯაბადარი, 22 წლის (მეტსახელად „მიხეილი“);

3. ალექსანდრე კონსტანტინეს ძე ციციშვილი, 25 წლის (მეტსახელად „სანჩო“);

4. ანთიმოზ ევდოვის ძე გამყრელიძე, 23 წლის (მეტსახელად „გამკა“);

5. მიხეილ ნიკოლოზის ძე ჭიკოიძე, 24 წლის (მეტსახელად „თედორე“)¹.

ისინი რუსეთში უმაღლესი განათლების მისაღებად იყვნენ წასულნი და სწავლობდნენ სხვადასხვა პროფილით.

თვით პროცესმა 50-ის სახელწოდება მიიღო იქედან, რომ მასში ორმოცდაათი ბრალდებული მონაწილეობდა.

საერთოდ 1874 წლის ივლისიდან დაწყებული არა ერთი და ორი პოლიტიკური პროცესი გაიმართა. მაგრამ მათ შორის მანც აღსანიშნავია ეს „50-ისა“ და „193-ის“ პროცესები. პირველი შედგა 1877 წლის თებერვალ-მარტში, ხოლო მეორე კი — 1877 წლის ოქტომბრიდან 1878 წლის იანვრამდე გაგრ-

¹ აღსანიშნავია, რომ ფარული ორგანიზაციების ყველა წევრი ატარებდა მეტსახელს კონსპირაციის დაცვის მიზნით.

ძეულდა. მეფის მთავრობა მიზნად ისახავდა ძირფესვიანად ამოქვირკვა რევოლუციური მოძრაობა. დაპატიმრებულთა რიცხვმა 1873 — 74 წლებში ორი ათას კაცს გადააჭარბა. გამოძიებამ თითქმის 37 გუბერნიის მოიცვა. ამ პროცესების გამართვის დროისათვის პატიმართა რიცხვი საგრძნობლად იყო შემცირებული. ბევრი პატიმარი საშინელი მოპყრობის გამო გასამართლებამდე გარდაიცვალა, ბევრი ფსიქიურად შეიშალა, მათგან მრავალი ადმინისტრაციული წესით ციმბირში გადაასახლეს. მიუხედავად ამისა, პატიმართა რიცხვი მაინც საგრძნობი იყო. ამიტომ საქმე გაჰყვეს ორ ნაწილად. პირველ საქმეში გადიოდა 50 ბრალდებული, ხოლო მეორეში 193. ზოგი პატიმარა ერთსა და იმავე დროს ორივე საქმეში გადიოდა ბრალდებულად.

ვიდრე უშუალოდ პროცესს შევეხებოდეთ. გვინდა მოკლედ შევჩერდეთ იმ უდიდეს გამონხაურებაზე და წარუშლელ შთაბეჭდილებაზე, რომელიც პეტერბურგში გამართულმა ამ პროცესებმა დასტოვეს ხალხში.

50-ისა და 193 პროცესების დიდი მნიშვნელობა იმაშია, რომ მათ პირველად მიაპყრეს რუსეთის საზოგადოების ფართო ფენების ყურადღება რევოლუციურ ახალგაზრდობაზე, რომელთა საქმიანობაც მანამდე, აუცილებლობის გამო, კონსპირაციულ ხასიათს ატარებდა. ამ ახალგაზრდობას აქამდე არ ჰქონდა შესაძლებლობა გამოეთქვა თავისი შეხედულებანი და მიზნები არც პრესაში და არც საზოგადოებრივ კრებებზე. ახლა კი მათ გადაწყვიტეს სასამართლო პროცესი გამოეყენებინათ ტრიბუნად და თავიანთ სიტყვებში გადმოეცათ ხალხის ბეჩავი მდგომარეობის გამომწვევი მიზეზები, აეხსნათ საზოგადოებისათვის მათთვის ლეგალურად მოქმედების შეუძლებლობა,

ისიც, რომ მათთვის გარდუვალაი შეიქნა დასდგომოდნენ რე-
ვოლუციურ გზას, რათა მიედწიათ სოციალიზმის გამარჯვები-
სათვის. საზოგადოება გაოცებული იყო. აქამდე მან ცოტა რამ
იცოდა სოციალიზმის შესახებ და ნაკლებად აინტერესებდა
იგი. მეფის მთავრობა, რომელიც დათანხმდა ამ საქმის საჯა-
როდ განხილვაზე, ასეთ შედეგებს არ ელოდა. იგი ფიქრობდა
„წითელი აჩრდილით“ დაეშინებინა საშუალო ფენები, მათ
შიშზე დაეფუძნებინა თავისი რეაქციული პოლიტიკა და მთე-
ლი საზოგადოების თვალში მოეხდინა ამ მოძრაობის დისკრე-
დიტირება. იგი იმედოვნებდა, რომ როდესაც დამსწრე საზო-
გადოება თავისი ყურით მოისმენდა ბრალდებულთა რევოლუ-
ციურ სიტყვებს ტახტისა და მეფის წინააღმდეგ, ეკლესიისა და
რელიგიის წინააღმდეგ, მემამულეთა საკუთრებისა და შეძლე-
ბულთა პრივილეგიების წინააღმდეგ, მათ გამოსვლებს მეფის
ხელისუფლებას დამხობისა და მდიდართა შეუბრალებელი გა-
ნადგურების, ეკლესიების დანგრევის და ეკლესიის მსახურთა
რეპრესირების შესახებ, მათ მოწოდებებს ამ ქვეყნად აღამიან-
თა შორის თავისუფლებას თანასწორობის, ძმობის, მშრომელ-
თა შორის მიწა-წყლის თანაბრად განაწილების შესახებ, გამო-
იწვევდა ზიზღსა და სიძულვილს მათ მიმართ და სამუდამოდ
გაუტეხდა სახელს ამ მოძრაობას საზოგადოების თვალში.
მოხდა კი პირიქით. ამ ახალგაზრდობის თავგანწირვამ, კეთილ-
შობილურმა ენათუზიანობამ, მათმა ტანჯვამ საყოველთაო თანა-
გრძნობა გამოიწვია. აი, საზოგადოება ისმენს ბრალდებულთა
მგზნებარე სიტყვებს, რომლებშიც მხილებულია არსებული
რეჟიმის მთელი უვარგისობა და სისაძაგლე...

პროცესმა ყველას ნათლად დაანახვა, თუ ვინ იყვნენ ეს
ბრალდებულები, რისთვის ან ვისთვის წირავდნენ ისინი თავს.

პროცესზე ნახულმა და მოსმენილმა საზოგადოების უმრავლესობაში იდეისათვის ამ წამებულთა მიმართ გულწრფელი თანაგრძნობა და არსებული რეჟიმისათვის ზიზღი და სიძულვილი დაჰბანდა. ეს იყო მეფის მთავრობის სრული პოლიტიკურა მარცხი, მისი სიბეცის კიდევ ერთი დადასტურება. მთავრობა უკვე ცდილობს შეზღუდოს საჯაროობის პრინციპი, მაგრამ გვიანლაა. ეს იწვევს დამსწრე საზოგადოების გულისწყრომას, რომელმაც ბრალდებულთა გულწრფელ სიტყვებიდან უკვე იგრძნო, რომ იბადებოდა ახალი ძალა.

განსაკუთრებით თანაგრძნობით სარგებლობდნენ რევოლუციონერი ქალიშვილები ს. ბარდინა. დები ლუბატოვიჩები და სხვები. მათი გაბედულება და სიმტკიცე, მათი თავგანწირვა ხალხს ბედნიერებისათვის აღელვებდასა და განცვიფრებას იწვევდა როგორც ახალგაზრდობაში, ასე საზოგადოების ფართო ფენებში, როგორც რუსეთში, ასევე საზღვარგარეთაც.

აი რას წერდნენ მაშინ „50-ის პროცესთან“ დაკავშირებით. „ამ პროცესამდე სოციალისტებს მხოლოდ ახალგაზრდობა იცნობდა, რაც შეეხება საზოგადოებას, მასებს, მათ არ იცოდნენ და არც სურდათ ცოდნოდან თუ ვინ არიან ეს ადამიანები, როგორი იყო მათი მიზნები და მისწრაფებანი. მათ კანტიკუნტად ესმოდათ, რომ ამ ადამიანებს იჭერენ, აპატიმრებენ, ასახლებენ... ხანდახან საზოგადოება... თანაგრძნობითაც კი ეკიდებოდა მათ, როდესაც გაიგებდა რომ ვიღაც მოკვდა ან შეიშალა. ახლა გაიგებდა პატიმართა მიმართ ჩადენილი მხეცობის შესახებ... უფრო შორს, მასებში, არ მიდიოდა ამ ადამიანთა... თანაგრძნობა... და აი, დაიჭუხა „50-ის პროცესმა“. განცვიფრებული საზოგადოება ჰხედავს ქალიშვილთა გაციისკროვნებულ სახეებს, რომლებიც მშვიდი გამოხედვით და ბაგეებზე

ბავშვური უწყინარი ღიმილით მიდიან იქ, საიდანაც აღარ ბრუნდებიან, სადაც იმედისათვის არავითარი ადგილი არ რჩება -- მიდიან ცენტრალური ციხეში, მრავალწლიან კატორღაში. საზოგადოება ისმენს ბარდინას შესანიშნავ სიყვარულთა და რწმენით აღსავსე სიტყვას, ისმენს ზდანოვიჩის უღრესად მწყობრ გამოსვლას, რომელშიც მოაზროვნის ცივი და მკაცრი განსჯიდან ფანატიკოსის შეურყეველი და შეუპოვარი რწმენა გამოსჰვივის, დაბოლოს, როდესაც ამ განცვიფრებულმა და შეძრწუნებულმა საზოგადოებამ აღარ იცის რა თქვას და მოიფიქროს, მას თავს ატყდება გლეხის, უშუალოდ ხალხის წარმომადგენლის პ. ალექსიევის მძლავრი, მქუხარე სიტყვა, რომელშიც ზუსტად ისძოდა იმ მრავალრიცხოვანი და მრავალეროვანი მასის ხმა, რომელიც თავის წიაღში შეუტნობ, მრისხანე, შესაძლოა სისხლიან მომავალს ატარებს¹.

ამ პროცესს. პროცესში მონაწილე ბრალდებულთა გმირულ შემართებას, იდეისათვის მათ თავგანწირვას დაღებითად გამოეხმაურა მთელი პროგრესული მსოფლიო. მას მიუძღვნეს თავიანთი შესანიშნავი ქმნილებანი გამოჩენილმა რუსმა პოეტებმა და მწერლებმა. მათ შორის აღსანიშნავია ტურგენევის შესანიშნავი ლექსი „ზღურბლზე“. ლექსში დახატულია მორალური სახე რუსი ქალიშვილისა, რომელიც ხალხის ეთილდღეობისათვის უარს აცხადებს პირად ცხოვრებაზე, სახელის მოხვეჭაზე და მზად არის არ შეუშინდეს ტანჯვა-წამების ეკლიან გზას.

ეს პროცესი იძლეოდა მდიდარ მასალას მეფის რუსეთში არსებულ სავესებით უვარგის ბიუროკრატიულ-ჩინოვნიკურ

¹ «Процесс 50-ти», стр. V—VIII.

აპარატის შესახებ, იქ გამეფებული ეროვნული ჩაგვრისა და აუტანელი სოციალური ურთიერთობათა შესახებ, ეკონომიური და კულტურული ჩამორჩენილობის შესახებ.

პროცესმა კიდევ უფრო გააღრმავა და გააძლიერა რუსეთის ახალგაზრდობის რევოლუციური სულისკვეთება, რასაც მეფის მთავრობამ ნაცადი ხერხი—რეპრესიების გაძლიერება და უპირისპირა.

მსოფლიო პრესა, რომელიც მსოფლიო საზოგადოებრივ აზრს გამოხატავდა, მთლიანად წამებულთა მხარეზე იყო.

„50-ის პროცესი“ შესდგა, როგორც აღნიშნეთ, 1877 წლის თებერვალ-მარტში. პროცესის ჩასატარებლად შეიქმნა სპეციალური სასამართლო—„მმართველი სენატის საგანგებო საკრებულოს“ სახელწოდებით. თვით საქმეს ეწოდებოდა ასე: „საქმე სხვადასხვა პირთა შესახებ, რომელთაც ბრალი ედებათ სახელმწიფოებრივ დანაშაულში კანონსაწინააღმდეგო გაერთიანების შექმნისა და დანაშაულებრივ თხზულებათა გავრცელებისათვის“.

საქმე გაიჩნა ღია სხდომაზე. პროცესზე ბრალმდებლად გამოდიოდა მშართველი სენატის სისხლის სამართლის საკაცაციო დეპარტამენტის ობერ-პროკურორის ამხანაგი კ. ყუჟოვი. პროცესში მონაწილეობას ღებულობდა 15 დამცველი, მათ შორის ცნობილი ადვოკატი სპასოვიჩი (იგი იცავდა ი. ჭაბადარისა და სხვათა ინტერესებს). ბევრმა ბრალდებულმა საერთოდ უარი განაცხადა დამცველის ყოლაზე. საბრალმდებლო დასკვნის თანახმად მათ ბრალი ედებოდათ: 1. მთავრობის საწინააღმდეგო ღარული საზოგადოების დაარსებასა და მასში აქტიურ მონაწილეობაში; 2. არსებული მთავრობის დამხობის მიზნით მთავრობის წინააღმდეგ ხალხის ამხედრებაში და უზე-

ნავსი ხელისუფლებისადმი დაუმორჩილებლობაში; 3. ნაწილობრივ მოსკოვის არალეგალურ სტამბებში დაბეჭდილ და ნაწილობრივ საზღვარგარეთიდან შემოტანილი დანაშაულებრივი ლიტერატურის გავრცელებაში; 4. რევოლუციური პროგრამის განსახორციელებლად მოქმედების წესდების შედგენაში.

ბრალდებულ ციციშვილს დამატებით ბრალი ედებოდა ეანდარმერთა ოფიცრის მკვლელობის მცდელობისათვის, რომელსაც მან ორჯერ ესროლა, მაგრამ მიზანს ააცილა.

საბრალმდებლო დასკვნა მათ მიაწერდა შემდეგი არალეგალური ლიტერატურის გავრცელებას: „ფრანგი გლეხის ისტორია“, „ემელიან პუგაჩოვი“, „ზღაპარი ოთხ ძმაზე“, „თავსატეხი მექანიკა“, „საგლეხო არჩევნები“, „ახალი ლექსებისა და სიმღერების კრებული“, „ჰეი-ჰეი, ძმებო“, „პარიზის კომუნა“, „ღმერთიცაა და ღმერთიც“ და ა. შ. საბრალმდებლო დასკვნა აღნიშნულ ნაშრომებს „დანაშაულებრივი შინაარსის“ მქონე წიგნებს უწოდებდა.

პროცესის მონაწილე 45 ბრალდებული გადაჭრით უარყოფდა წარუგენილ ბრალდებას. გ. ზდანოვიჩმა საერთოდ უარი განაცხადა დამცველის ყოლაზე. პროცესზე ბრალდებულებს თავი ამაყად და უშიშრად ეჭირათ. როგორც აღვნიშნეთ, მათ ფაქტიურად სასამართლო პროცესი გამოიყენეს ტრიბუნად თავიანთი იდეების პროპაგანდისათვის. ისინი კონკრეტულად ფაქტებით ააშკარავებდნენ მეფის ხელისუფლების დესპოტიზმს, მათ მიერ ქვეყნის მართვის უუნარობას, გამოთქვამდნენ ღრმა რწმენას სოციალური რევოლუციის გარდაუვალობის შესახებ.

ბრალდებულთა ასეთი მკაცრი და მოულოდნელი გამოსვლებით გაოგნებული პროცესის თავმჯდომარე წონასწორობის

ბას კარგავდა და მუქარით აწყვეტილებდა მათ სიტყვებს. ერთხელ საქმე სკანდალამდეც კი მივიდა და თავმჯდომარემ უანდარმერებს მიმართა, რომ ორი უკანასკნელი ორატორი სხდომის დარბაზიდან გაეყვანათ.

მეფის სასამართლოს თვითნებობა და მისი რეაქციული არსი განსაკუთრებით შესამჩევნი გახდა მას შემდეგ, როდესაც პეტრე ალექსეევმა თავისი მგზნებარე სიტყვა დაამთავრა ასეთი გაფრთხილებით. „აღდგებიან მუშათა მილიონები, რომლებიც თავიანთი კუნთმაგარი ხელებით ნაცარტუტად აქცევენ თვითმპყრობელობას...“

კარგად დაახსიათა მეფის სასამართლოს არსი პროცესის ერთ-ერთმა მონაწილემ, როდესაც საქვეყნოდ განაცხადა: „ეს სასამართლო არ არის. ეს წმინდა წყლის კომედიიაა, უფრო სამარცხვინოც კი, ვიდრე საროსკიპო სახლი. იქ ქალები გაჭირვების გამო იძულებულნი არიან გაჰყიდონ თავიანთი სხეული. აქ კი სენატორები ფლიდობის, მლიქვნელობის, ჩინებისა და მსხვილი შემოსავლის მიღების გამო, ვაჭრობენ სხვათა სიცოცხლით, ჭეშმარიტებითა და სამართლიანობით. ვაჭრობენ ყველაფრით, რაც ასე ძვირფასია კაცობრიობისათვის...“¹

პროცესი დამთავრდა იმით, რომ მმართველი სენატის საგანგებო საკრებულომ გამოიტანა განაჩენი. რითაც ყველა აქტიური რევოლუციონერი მკაცრად იქნა დასჯილი. ეს იყო არა მართლმსაჯულების, არამედ ანგარიშსწორების აქტი ბრალდებულთა მიმართ.

„50-ის პროცესი“ წარმოადგენს ნათელ დადასტურებას იმისა, თუ როგორ ხელიხელჩაკიდებული იბრძოდნენ რუსეთისა და საქართველოს მოწინავე შვილები ცარიზმის წინააღმდეგ

¹ История революционного движения, стр. 128.

კერ კიდევ რუსეთში რევოლუციური ბრძოლების დაწყების გარიჟრაჟზე.

ჩვენთვის განსაკუთრებით საამაყოა ის ფაქტი, რომ ამ შესანიშნავ მებრძოლთა ავანგარდში ვხედავთ საქართველოს სახელოვან შვილებს გ. ფ. ზდანოვიჩის, ვ. ნ. ციციშვილის, ი. ს. ჯაბადარის, ა. ე. გამყრელიძის, მ. ნ. ჭიკოიძისა¹ და სხვათა სახით.

მათ ამ მოძრაობაში შეასრულეს თვალსაჩინო როლი, თავი გამოიჩინეს ორგანიზატორული უნარით, სიმამაცით, იდეურობითა და გმირული შემართებით, რითაც წარუშლელი კვალი დასტოვეს რუსეთის რევოლუციური მოძრაობის ისტორიაში და ხელი შეუწყვეს ქართველი და რუსი ხალხის საუკუნოვანი მეგობრობის კიდევ უფრო მეტად განმტკიცებას.

პროცესზე განსაკუთრებით გამოირჩეოდა გ. ზდანოვიჩი. მას ღირსეულად ეჭირა თავი, როგორც ეს პროფესიონალურ რევოლუციონერს შეეფერებოდა. ზდანოვიჩმა პროცესზე წარმოიქვა სიტყვა, რომელშიც მოცემული იყო ღრმა ანალიზი არსებული წყობილების უვარგისობისა. მან თავის სიტყვაში ამაყად განაცხადა, რომ სოციალური რევოლუცია ბოლოს მოუღებდა ხალხთა ჩაგვრასა და დაამყარებდა დედამიწაზე ძმობას, მეგობრობასა და კეთილდღეობას. აღნიშნული სიტყვა ელვის სისწრაფით გავრცელდა ხალხში იგი ხელიდან ხელში გადადიოდა და დიდი ინტერესით იკითხებოდა. აი ეს სიტყვა, რომელსაც დღემდე არ დაუკარგავს თავისი მიმზიდველობა.

¹ სხვათა შორის მ. ნ. ჭიკოიძე, რომელსაც მეფის სასამართლომ კატორღა მიუსაჯა, 1831 წელს ვაშოიქცა გადასახლებიდან და შეუერთდა „ხაროდოვოლებს“ მოძრაობას. იგი ხელმეორედ დაიპირეს და გადაასახლეს იაკუტის ოლქში, სადაც გარდაიცვალა ქლეჩით 1897 წელს.

„ბატონო მოსამართლენო, თქვენ მოისმინეთ ბრალდება, მოისმინეთ დაცვა, ახლა მოუსმინეთ ერთ-ერთ იმათგანს, რომელიც ბრალდების მტკიცებით გაკიცხვას იმსახურებს. ხოლო დაცვის — სოველ შემთხვევაში ზოგიერთის დამცველის განცხადებით, — შებრალებას. შებრალებას! მე არ ვიცი, ვსაჭიროებთ კი ჩვენ, საერთოდ ბრალდებულები, ვინმეს შებრალებას, მაგრამ რაც შემეხება პირადად მე, განკიცხვას უფრო დავთანხმდებოდი, ვიდრე შებრალებას. შებრალება საჭირო არ არის — იგი შეურაცხმყოფელია. ერთი ძველი ფილოსოფოსი, თუ არ ვცდები, დემოკრიტე, ამბობდა: „დამცინეთ, მაგრამ ნუ შემობრალებთ!“...ჩემი დაცვა მოკლე იქნება, ლაპარაკით თავს არ შეგაწყენთ. მე სავსებით უკუვაგდებ საქმის ფაქტიურ მხარეს, თუმცა შეშეძლო ზოგი რამ ჩემს სასარგებლოდ მეთქვა. მაგალითად, შეშეძლო თქვენი ყურადღება მიმეპყრო იმ გარემოებაზე, რომ კიშინიოვში არც ერთ სასტუმროში არავის ვუცვნივარ, არ ვუცვნივარ აგრეთვე კიშინიოვის ვაგზალში მწონავსა და მოლარეს. ამასთანავე დავსძენ, რომ ისინი ყოველთვის ცნობენ ხოლმე იმ პირს, რომელმაც წიგნები გაგზავნა, მაგრამ მე ყოველივე ამას მხედველობიდან ვუშვებ, გვერდს ვუვლი. შესაძლოა, დღეს უკანასკნელადაც მიწივეს ლაპარაკი, და ეს მაძლევს უფლებას იმედი ვიქონიო, რომ ნებას დამრთავენ გამოვთქვა ზოგიერთი საერთო მოსაზრება თანამედროვე მოპრაობაზე ჩვენში ძალიან არის გავრცელებული შეხედულება. რომ რუსეთი მკვეთრად განსხვავდება დასავლეთ ევროპისაგან, რომ ჩვენ მივდივართ და მოვალენიცა ვართ ვიართო, განსხვავებული, საკუთარი გზით. ამ შეხედულებაში ბევრი სიმაართლეა. მაგრამ მას ძალიან ხშირად ბოროტად იყენებენ. არ უნდა დავივიწყოთ, რომ მეცნიერებამ

არ იცის ეროვნულობა, რომ ცივილიზაცია და ადამიანური იდეები საერთაშორისოა. რა თქმა უნდა, კაცობრიობის იდეალები გარდაიქმნებიან ხალხთა ისტორიული ცხოვრების პირობების შესაბამისად. ასე რომ, არსებითად რჩებიან რა ყველა ხალხისათვის საერთოდ, ამავე დროს ისინი, ე. ი. იდეალები, ღეტალებში ესადაგებიან ქვეყნის პირობებს. მაგრამ ევროპის ცივილიზაციის შესწავლამ დაგვანახვა, რომ რუსეთისათვის სრულიადაც არ არის ხელსაყრელი გამოეყოს ევროპის ხალხების ოჯახს, რომ, პირიქით, იგი ვალდებულია საკუთარი ბედი დასავლეთის ბედს დაუკავშიროს და მასთან ერთად იმუშაოს არსებობისათვის საუკეთესო პირობების მისაღწევად. სახალხო ცხოვრების ეკონომიური საფუძველი ყველგან ერთნაირია. როგორც იქ, დასავლეთში, ასევე აქ რუსეთშიც, არსებობს, ერთი მხრივ, მცირე ჯგუფი,—ეწუოდოთ მას თუნდაც პრივილეგირებულთა ჯგუფი, მეორე მხრივ კი—მასა, უმრავლესობა, რომელიც განწირულია გამოუვალი ტანჯვისათვის. მრავალი დიადი გონება და მრავალი კეთილშობილური გული მუშაობდა სოციალური საკითხის გადასაჭრელად. სოციალიზმი ისევე ძველია, როგორც თვით სამყარო. მხოლოდ საკითხის გადაწყვეტის ფორმები და საშუალებანია განსხვავებული სხვადასხვა ისტორიულ პერიოდებში. უკანასკნელ დროს, როდესაც ეგრეთწოდებულმა მოვლენათა ბუნებრივმა მსვლელობამ სრული განვითარება მიიღო, როდესაც გარკვევით და ცხადად გამოემქდავნდა თანამედროვე ცივილიზაციის ბნელი მხარეები, სოციალიზმი პრაქტიკულ ნიადაგზე დადგა და შექმნა თავისი დამოუკიდებელი პარტია... სახალხო პარტიის ძალები, დღითიდღე იზრდება, რაც უფრო შორს მივიღვართ, მით უფრო საშიში ხდება ის უფსკრული, რომელიც უსაქმურ მაძღართა უმცირესობას დამშეუ-

ლი და განძარცული უმრავლესობისაგან ჰყოფს. თანამედროვე ევროპის მუშათა მოძრაობის ერთ-ერთი დამახასიათებელი მხარე იმაში მდგომარეობს. რომ ხალხებმა შეიგნეს თავიანთი ინტერესების სოლიდარობა, თავიანთი მდგომარეობის ერთგვარობა და ერთმანეთს ხელი ხელს მისცეს საერთო ბრძოლისათვის, ასე რომ, სოციალური საკითხის უახლოესი დაყენება კაცობრიობას ჰყოფს არა ეროვნებებად, არამედ მჩაგვრელებად და ჩავრულებად. ადამიანთა საზოგადოების ცალკეულ ჯგუფებმად დაყოფის საზომს წარმოადგენს არა ტერიტორია, არა ენა და ტომობრივი თავისებურებანი, არამედ ეკონომიური საწყისი, რომელიც სახალხო ცხოვრებას უდევს საფუძვლად. ეკონომიური წყობილება ყველგან ერთნაირია. მე გეკითხებით, — შეიძლება თუ არა ამ თვალსაზრისით რუსეთის გამოყოფა მუშათა მოძრაობიდან? განა არ შეიძლება ევროპის ხალხთა მოთხოვნები აქ ისეთივე უფლებით წარმოვიდგინოთ, როგორც იქ არის? არა მგონია ვინმემ გაბედოს მტკიცება, რომ საერთოდ შრომის პირობები რუსეთში მკვეთრადაა განსხვავებული დასავლეთის შრომის პირობებისაგან. რა თქმა უნდა, თითოეულ ქვეყანას თავისი თავისებურებანი გააჩნია, მაგრამ ეკონომიური საკითხის მთავარი ძარღვი ყველგან აბსოლუტურად ერთნაირია და ამის გამოა, რომ შესაძლებელი ხდება, სოციალური საკითხის ერთნაირად დაყენება ყველა ხალხისათვის, რუსეთის ჩათვლით. აი, რატომ ვხედავთ ჩვენ, რომ სოციალიზმის როგორც იდეის განვითარება რუსეთში თითქმის დასავლეთში მისი განვითარების პარალელურად მიმდინარეობდა. საილუტრაციოდ საკმარისია მივუთითოთ ორმოციანი წლების დასასრულზე ევროპაში და სამოციანისა ჩვენში, ანდა საკითხის თანამედროვე დაყენება აქ და იქ. ამასთანავე, სოციალური სა-

კიოხის დაყენების სიმტკიცეს რუსეთში ხელი შეუწყო რუს-ხალხის ისტორიულმა ბედმა. მე მინდა ვთქვა, რომ სახალხო ცხოვრების ელემენტები თავიანთ თავში შეიცავდნენ მრავალ მსგავსებას თეორიულ სოციალიზმთან, ამიტომ იგი არ ყოფილა ჩვენში რაღაც არაჩვეულებრივი და შეუთანხმებელი რუსეთის ცხოვრების პირობებთან — პირიქით, არსებობდა და ნაწილობრივ ახლაც არსებობს შეხედულება, რომლის თანახმად სოციალიზმი დასავლეთში თითქოს რევოლუციურია, ჩვენში კი კონსერვატორული. თუ იქ ეს საკითხი ძალით უნდა გადაწყდეს. აქ მისი გადაწყვეტა შეიძლება მშვიდობიანი გზით. ამ შეხედულებას თავდაპირველად მარტო ჩამორჩენილი ადამიანები როდი უჭერდნენ მხარს. რუსეთის ახალგაზრდობას, რომელმაც სოციალისტური რწმენა გამოიმუშავა, ბუნებრივია, იგი ცხოვრებაში უნდა გაეტარებინა.

მისი პირველი ნაბიჯები ამ მიმართულებით, ე. ი. საკითხის მშვიდობიანად გადასაჭრელად, წარუმარტებელი გამოდგა. ყველა მის ცდას, თუ პირდაპირ მტრულად არა, ყოველ შემთხვევაში, უხდობლად ხვდებოდნენ. ეს უხდობლობა იქამდე მიიზარდა, რომ მოღვაწეები მოულოდნელად საღლაც ქრებოდნენ, ორგანიზაციები იშლებოდნენ, საქმე დაკემისაკენ მიდიოდა. ახალგაზრდობა დაფიქრდა: რა ვაკეთოთ? სანუკვარი მიზნისაკენ მშვიდობიანი გზით სიარული, როგორც ჩანს. შეუძლებელია: გულზეხელდაკრეფილი ჯდომა და ლოდინი—როდის გადაჭრიან ზემდგომნი საკიოხს, რწმენის სიწრფელესა და მიზნის სიღიადეს ვერ ეთვისება... ნუთუ უნდა შევეგუოთ იმას, რომ ბუნებრივი სჯლა გადაწყვეტს საკითხს, რომ ჩვენი მოვალეობაა მხოლოდ თვალყურის დევნება, სახალხო ცხოვრების შესწავლა და ისტორიის კანონების გაცნობა და რადგანაც კედელს შუბ-

ლით ვერ გაანგრევთ, ამიტომ ჩვენი მისწრაფებები და მოთხოვნები არ უნდა ეწინააღმდეგებოდეს არსებულ, ისტორიულად გამოძეუშავებულ სახელმწიფოებრივი ცხოვრების პირობებს? მაგრამ ეს სომ სხვანაირად დოქტორ პანგლოსისათვის ხელის ჩამორთმევას, ანუ, სხვა სიტყვებით, იმის აღიარებას ნიშნავს, რომ თითქოს ჩვენში ყველაფერი უკეთესისაკენ უნდა მიემართებოდეს? არა, ასეთი ორაზროვანი ფილოსოფია არ შეიძლება მოსწონებოდა რუსეთის ახალგაზრდობას. ერთი მხრივ, სოციალისტურ მოძღვრებათა პროგრესმა დასავლეთში, მეორე მხრივ, რუსეთის შინაურმა პირობებმა რუსეთის ახალგაზრდობის სოციალიზმი, მწვიდობიანი სახელმწიფოებრივი სოციალიზმი, რევოლუციურ სოციალიზმად გარდაქმნა. მან, ახალგაზრდობამ. მიუსედავად მთელი საფრთხისა, გადაწყვიტა, რომ მიზნისაკენ რევოლუციური გზით ივლის. ამიტომ, რომ თანამედროვე მოძრაობა უპირატესად სოციალურ-რევოლუციურია. იგი არ წარმოადგენს შემთხვევით, გარდამავალ მოვლენას. მან თითქმის მთელი ახალგაზრდობა, მთელი მისი სიცოცხლისუნარიანი ძალები მოიკვია. არ შეიძლებოდა იგი მეც არ შემხებოდა. მეც იმავე გზით წავედი, მთელი შესაძლებლობისა და ძალღონის დაუზოგავად ხალხის განთავისუფლების დიადი მიზნისათვის ვმუშაობდი და კვლავაც იმავე სულისკვეთებით ვიმუშავებდი. პატიმრობაში რომ არ ვიმყოფებოდე.

მაგრამ რა არის სახალხო აღორძინება და რაში მდგომარეობს იგი? იგი მდგომარეობს-იმაში, რომ სახალხო შრომას არავითარი ექსპლოატაცია არ უნდა ეწეოდეს, რომ ხალხის შეგნება არ უნდა იჩრდილებოდეს უმეტრების ცრურწმენებით, რომელსაც უკიდურესი სილატაკე ჰბადებს, და არ უნდა ვცე-

ზოდეს ხალხის ზნეობა, რაც გარდუვალა სახალხო ცხოვრების მომაცვდინებელ ვითარებაში. ამის მიღწევა შესაძლებელია თემების სრული დამოუკიდებლობისა და ავტონომიის დროს, რომლებიც ერთობლივად ფლობენ მიწასა და საწარმოო იარაღებს; თავისუფალი შრომის პირობებში, როდესაც იგი სავალდებულო იქნება ყველა ინდივიდუალისათვის. აი ჩემი მისწრაფებები. მათი განხორციელების საშუალებას, ჩემი აზრით, წარმოადგენს ხალხში მათი ინტერესების სოლიდარობის შეგნების შეტანა, ხალხის უკმაყოფილების გააზრება, დაქსაქსული ძალების გაერთიანება და არსებობის უფრო სამართლიანი პირობების ვრთობლივად მიღწევა. ხალხის მდგომარეობა რომ აუტანელია, ხალხის უკმაყოფილება რომ დიდია, ყოველივე ეს უდავო ფაქტია და ექვს არ იწვევს. მაგრამ ეს ფაქტი უნდა გამოვიყენოთ არა უხაკოფო, ცალკეული ბუნტისა და ამბოხებებისათვის. არამედ საკითხის უფრო მეტი სერიოზულობით და მტკიცედ გადაჭრისათვის. ასეთია საერთო ხაზებში ჩემი რწმენა და ესაა, რომ მიიძღვლებს რამდენიმე სიტყვა ვთქვათ იმ პროგრამის ირგვლივ, რომელიც მე ჩამომართვეს. ვაღიარებ, რომ ბრალდებისა და დაცვის მიერ ამ დოკუმენტზე არაერთგზის მითითების შემდეგ, უფრო მიზანშეწონილად მიმაჩნია არ შევეხო ამ საკითხს, მაგრამ არ შემიძლია დუმილით ავუარო გვერდი ერთ ფაქტს; პროკურორმა, დაახასიათა რა ჩვენი მოძრაობა, მას პოლიტიკური მოძრაობა უწოდა და არა სოციალისტური, ხოლო ჩვენ კი პოლიტიკური რევოლუციონერები და არა სოციალისტები. მას არც კი შეეშინდა შეედარებინა თანამედროვე მოძრაობის პრინციპები ინტერნაციონალის პრინციპებთან. მართალი მოგახსენოთ, ვერ გამიგია რისთვის დასჭირდა მას ასეთი შედარება, მაგრამ ამ შედარებიდან ჩემთვის ერთი რამ ნათე-

ლია: ან პროკურორი საკმაოდ არ იცნობს სოციალურ და ზნეობრივ მეცნიერებებს, ანდა იგი რაღაც სხვა მოსაზრებებით ხელმძღვანელობს, რასაც საქმის არსთან კავშირი არა აქვს. მაგრამ ამ საგანს არ შევეხები, რადგანაც ეს წერილმანამდე მიმიყვანდა, რაც აქ, სასამართლოს სხდომაზე, შესაძლოა, უადგილო იყოს. თუმცა მიმაჩნია, რომ თვით პროგრამას შეეძლო შეეთითებინა პროკურორისათვის მისი შეხედულების მკლარობაზე. მაგრამ მან, ეტყობა, არ მოისურვა სათანადოდ ჩაწვდომოდა მას. სხვათაშორის, პროკურორმა განსაკუთრებული ყურადღება მიაქცია ამ პროგრამის ერთ განყოფილებას. მინდა სწორედ ამ განყოფილებაზე ვილაპარაკო ახლა. მაგრამ უპირველს ყოვლისა უნდა განვაცხდო, რომ ეს პროგრამა ჩემს კლამს არ ეკუთვნის, მე არა ვარ მისი ავტორი. ყოველივე ამას იმიტომ კი არ ვამბობ, რომ ასე ვთქვათ, თავიდან ბრალდების ცილება მსურდეს. არა! მე სოლიდარობას ვუცხადებ მის საერთო მიმართულებას, მაგრამ ჩემი რწმენა ნებას არ მძალევს დავეთანხმო ზოგიერთ განყოფილებას. ასეთია, მაგალითად, განყოფილება, ეგრეთწოდებული, წმინდა აგიტაციის შესახებ. ამავე განყოფილებაზე უთითებდა პროკურორიც და ცდილობდა მოეცა ასეთი განმარტება, რომელიც მიზნად ისახავდა დაემტკიცებინა, რომ ჭგუფები ძარცვა-გლეჯისათვის იქმნებიან. თუ მას პირდაპირ ასეთი დასკვნა არ გაუკეთებია, ყოველშემთხვევაში, გადაკვრით მაინც გულისხმობდა ამას. პროგრამა ამ ჭგუფს მიზნად უსახავს სახსრების მოპოვების ანოცნასი, მაგრამ არ მიუთითებს თუ როგორი გზით შოულობენ ეს ჭგუფები ამ სახსრებს. ძარცვა-გლეჯაზე იქ კრინტიც არ არის დაძრული. თუმცა იმავე პროგრამაში არის პარაგრაფი, რომელიც ორგანიზაციის წევრებს, პროპაგანდისტებს, უკრძა-

ლავს მისდიონ მხოლოდ სახსრების მოპოვებას. აი, როგორი აზრი აქვს ამ საკითხს. მაგრამ, გვერდს ვუვლით რა საკითხის ამ ნაწილს, თვით პროექტის შესაძლებლობა ჯგუფების შესახებ საერთოდ აიხსნება არა სოციალური საკითხის დაყენების ხასიათით რუსეთში, არამედ იმ დევნითა და შევიწროებით, რომელსაც რუსეთის ახალგაზრდობა გაწიციდის. უკიდურესობა ყოველთვის წარმოშობს საწინააღმდეგო თვისების მქონე უკიდურესობას, დაწოლა ყოველთვის იწვევს საწინააღმდეგო ძალას, ეს მექანიკის კანონია. მართლაც ძნელია დამშვიდებით იყო, როდესაც ახალგაზრდობის დარწმუნების ერთადერთ საშუალებას (იხე და კატორღა წარმოადგენს, როდესაც ყოველგვარი პატიოსანი გზა უხეში ძალით იხშობა, მაგრამ თუ რაოდენ ნაკლებსარწმუნოა ასეთი საშუალებანი, ნათლად ჩანს რუსეთის ახალგაზრდობის მწარე ისტორიიდან. თითქმის ყოველდღე კარგავს იგი რამდენიმე მეგობარს, ამხანაგს. ერთს აცილებს კატორღაში. სხვებს კი, რომლებმაც ტანჯვა ვერ აიტანეს — საფლავში, მაგრამ მას არასდროს უღალატია თავისი მიზნებისა და რწმენისათვის. ბატონო მოსამართლენო, მხოლოდ ბავშვური გატაცებისა თუ თავმოყვარეობის და, მით უმეტეს, ბინძური ქვენა გრძნობის გამო, ადამიანები იშვიათად სწირავენ თავს და მიდიან ნებაყოფლობით ტანჯვამდე. ადამიანებს სარისკო საქმეების ჩასადენად ამოძრავებს მხოლოდ ის რწმენა, რომელიც ბუნებრივ მოთხოვნებიდან იქცა. ამჟამად ახალგაზრდა ძალას, რომელმაც ჯერ კიდევ ვერ მოასწრო პრაქტიკული ცხოვრების წუმბეში ამოსვრა; აბსოლუტურად არ ესმის თუ როგორ შეიძლება არ იმუშავო ხალხის ინტერესებისათვის, როგორ შეიძლება იჯდე გულზე ხელდაკრეფილი, ანდა გეშინოდეს თუ რა შედეგი მოჰყვება წენს პატიოსან მისწრაფებებს. თავის განწირვა ჩვეულე-

ბრივ მოვლენად იქცა, შეიქმნა, ასე ვთქვათ, სოციალისტური ატ-
მოსფერო, სწორედ ისეთი პირობა, რომელიც თანამედროვე
მოძრაობის წარმატებას გვიწინასწარმეტყველებს. იმ მიზნების
გარდა, რომლებიც ზემოთ აღვნიშნე, ე. ი. გარდა იმისა, რომ
რუს ზალხში ცოცხლობს სოციალიზმის, თანასწორობის იდეა,
რამელიც სათემო მიწის მფლობელობაში გამოიხატება, გარ-
და რუსეთის ახალგაზრდობის თავგანწირვისა და თავისი რწმე-
ნისადმი ერთგულებისა, ახლანდელი მოძრაობის მომავალი
კიდევ საერთო ისტორიული პირობებითაცაა უზრუნველყო-
ფილი. რუსეთის ცხოვრების ელემენტების განვითარების ის-
ტორია ბევრად განსხვავდება დასავლეთ ევროპის განვითარე-
ბის ისტორიისაგან. ჩვენ იქ ვხედავთ მძლავრად განვითარე-
ბულ პოლიტიკურ ცხოვრებას, მრავალგვარ პარტიებს და
სხვადასხვა საზოგადოებრივ ჯგუფთა ინტერესების ბრძოლას.
ასეთი რამ რუსეთში არ არსებობს და ამას თავისი ისტორი-
ული მიზეზები აქვს. დასავლეთში პარტიების შექმნა აუცილე-
ბელი იყო: წარმოიშობოდნენ განსაზღვრული ინტერესები, იდე-
ები, რომლებიც ადამიანებს მჭიდრო, ორგანიზებულ პარტი-
ებად რაზმავდნენ. ბრძოლა იქ უხსოვარი დროიდან დაიწყო და
ამგვარად მიმდინარებოდა: პირველად იქმნებოდა საზოგადო-
ებრივი, წოდებრივი ინტერესები, შემდეგ კი ისინი ლებულობ-
დნენ ჩამოყალიბებულ სისტემებს, იქცეოდნენ თეორიად. ევ-
როპის ეოველი პარტია თავის დროს წინ უძღვოდა მოძრაო-
ბას, წარმოადგენდა პროგრესულ ძალას და ფლობდა მოწინავე
აზრებს. არც ერთ პარტიას არ შეიძლება ჰქონდეს მომავალი,
თუ მას უნარი არ შესწევს საერთო ინტერესებისათვის ადამი-
ანთა მსხვერპლი გაიღოს. არც ერთი პარტია არ შეიძლება
იყოს ძლიერი და ცოცხალი პარტია, თუ მისი წევრები თავ-

ვანწირვით არ ემსახურებიან პარტიის საქმეს. გარდა ამისა, პარტია ძლიერი იყო და წარმოადგენდა მოწინავე აზრს მხოლოდ იმ დრომდე, სანამ მისი და ხალხის ინტერესები განუყოფელი რჩებოდა. რუსეთში კი მთელი ამ ხნის მანძილზე არავითარი ცხოვრება და არავითარი ბრძოლა არ შეიმჩნეოდა. რუსეთის ისტორიის დასაწყისი, როგორც ჩანს, შეიცავდა თავისი პოლიტიკური ცხოვრების განვითარების ელემენტებს. მაგრამ აი დადგა თაღობის ეპი და ყველაფერი ჩაკედა. ამ მყუდროებაში, ამ ძილის დროს, მუშაობდა მხოლოდ ერთი ძალა—ძალა მონარქიული. თათრების უღლისაგან განთავისუფლების მემდეგ ყველა ინტერესი სახელმწიფო ხელისუფლებაში განსახიერდა, ყველას თვალი მისკენაა მიპყრობილი. თავადაზნაურობა კარგავს თავის დამოუკიდებელ მნიშვნელობას, ამ წოდების წევრები მეფის მსახურები და ყურმოჭრილი მონებია. ბურჟუაზია არ არსებობს. სახალხო პარტია და სახალხო თავისუფლება, რომელიც თათართა დარბევას გადაურჩა, განადგურებულია სახელმწიფო ხელისუფლების მიერ. დიდი ნოვგოროდი და ფსკოვი დაეცა. პარტიები არ შეიძლებოდა არსებულენო. სასულიერო წოდება არ ითვლებოდა განცალკევებულ დამოუკიდებელ კორპორაციად — იგი სახელმწიფო ხელისუფლებისადმი დამორჩილებულ ორგანოს წარმოადგენდა. თავადაზნაურობა ვერ ცხოვრობდა თავის ცხოვრებით, მას პირადი საკუთრებაც კი არ გააჩნდა, ყველაფერი—მიწაც, ადამიანებიც, ნეფეს ეკუთვნის და მის ნება-სურვილზეა დამოკიდებული უწყალობოს თუ ჩამოართვას მათ მთელი ქონება. არ არსებობს თავადაზნაურთა ინტერესები, არ არსებობს თვით თავადაზნაურობა, როგორც დამოუკიდებელი ორგანიზებული წოდება.

თ ა ვ მ ჯ დ ო მ ა რ ე ს ე ნ ა ტ ო რ ი პ ე ტ ე რ ს ი: (აწყვეტი-

ნებს ზდანოვიჩს) ეს საქმეს არ შეეხება: ზ დ ა ნ ო ვ ი ჩ ი: მე კი მიმაჩნია, რომ სწორედ საქმეს შეეხება. მე მინდოდა ამ ისტორიულ ფაქტებზე მითითებით დამედგინა ის დებულება, რომ რუსეთში, ასე ვთქვათ, წოდებათა, პრივილეგიებულთა პარტიების შექმნა უაზრობაა. მათ ხელიდან გაუშვეს ხელსაყრელი ისტორიული წუთი. მინდოდა მეჩვენებინა სოციალურ-რევოლუციური მოძრაობის მთელი კანონიერება და განსაკუთრებით ის, რომ მხოლოდ სახალხო პარტიას აქვს მომავალი. ეს იმიტომ, რომ გამოხატავს უმრავლესობის ინტერესებს, და იმიტომაც, რომ მართო ის დგას ჩვენი დროის მოწინავე იდეების განვითარების სიმაღლეზე. იგი ძლიერია, ძლიერია თავისი ერთიანობით, პრინციპების სიწმინდით, საკუთარ წევრთა თავგანწირვით. თისი გამარჯვება უეჭველია. პირველი მსხვერპლი, მრავალი მისი წევრის დაღუპვა, უფრო მეტ ძალასა და ზნეობრივ ღირსებას ჰმატებს მას. მე ღრმად მწამს ხალხის გამარჯვება, სოციალური რევოლუციის ზეიმი!

ამ სატყუას უდიდესი გამოხმაურება ჰქონდა როგორც რუსეთში, ისე მის ფარგლებს გარეთაც. ამ დოკუმენტს თავისი დიდი ისტორიული მნიშვნელობა დღესაც არ დაუკარგავს¹.

მეფის სასამართლომ გ. ზდანოვიჩს მიუსაჯა 6 წლითა და რვა თვით საკატორლო მუშაობა ყველა უფლების ჩამორთმევით. განაჩენი წარედგინა მის უდიდებულესობას შერბილების მიზნით, მაგრამ იმპერატორმა, ენდარმერჩის შეფის რჩევით, იგი უცილებლად დასტოვა ძალაში.

არსებული წესის თანახმად კატორღამისჯილ პატიმრებს

¹ Речь и биография, стр. 107—118.

² ქართულად გ. ზდანოვიჩის სატყუა პირველად ქვეყნდება.

ჯერ ცენტრალურ ციხეში აგზავნიდნენ, ხოლო იქედან შემდეგ საკატორლო ადგილებზე ანაწილებდნენ.

გ. ზდანოვიჩი, როგორც ერთ-ერთი ყველაზე საშიში სახელმწიფო დამნაშავე, ხარკოვის გუბერნიის პენიტენციის ცენტრალურ ციხეში გადააგზავნეს გაძლიერებული ბადრაგის თანხლებით.

ცახის რეჟიმი პოლიტიკური პატიმრებისათვის, შეიძლება ითქვას, პირდაპირ აუტანელი იყო. გ. ზდანოვიჩი, რომელსაც მტკიცედ სწამდა სოციალური რევოლუციის გამარჯვება, მსხედ იტანდა ყველა გაქირვებას.

გ. ზდანოვიჩის დედამ მწარედ განიცადა შვილის მძიმე ხვედრი. იგი მეფის სახელზე თხოვნას-თხოვნაზე აგზავნიდა, მაგრამ ამაოდ. მეფის მთავრობას გაგონებაც კი არ უნდოდა ზდანოვიჩის მდგომარეობის რაიმე შემსუბუქებაზე, ბოლოს მოხუცმა დედამ გადაწყვიტა თვითონ წასულიყო ხარკოვში. მან გუბერნატორ ლორის-მელიქოვის დახმარებით შესძლო ორჯერ ენახა ციხეში თავისი სათაყვანებელი ვაჟიშვილი. გ. ზდანოვიჩისათვის შელაცაების მიცემაზე და მისთვის მდგომარეობის შემსუბუქებაზე მოხუც დედას უარი უთხრეს. მათი მიქელაძისათვის უცდიდესი ბედნიერება იყო კატორლამისჯილ შვილთან შეხვედრა. გ. ზდანოვიჩმა ბოდიში მოუხადა დედას მიყენებული წყენისათვის, იმ სულიერი ტანჯვისათვის, რასაც იგი ასე ღრმად განიცდიდა შვილის დაპატიმრების გამო. იგი თავს არ იმართლებდა დედის წინაშე, არწმუნებდა მის მიერ არჩეული გზის სამართლიანობაში, რომელიც კაცობრიობის უმაღლესი იდეალებისათვის თავდადებულ ბრძოლაში გამოიხატებოდა. დედა თანაუგრძნობდა თავის ვაჟს და ამხნევებდა

მას ყოველმხრივ. ეს იყო დედა-შვილის მეტად ამაღელვებელი შეხვედრა.

1875 წლიდან 1881 წლამდე გ. ზდანოვიჩმა თავისი პატიმრობა ნოსკოვის, ხარკოვისა და ბორისოგლების ცენტრალურ ციხეებში გაატარა. 1882 წელს იგი გადაასახლეს კარაში. აქ მანიფესტმა მოუსწრო და სასჯელის ვადა ერთი მესამედით შეუმცირეს. 1884 წელს გადასახლებული იქნა ვერხოლენსკში, სოლო შენდევ ტომსკში ცხოვრობდა.

1889 წელს გ. ზდანოვიჩს აღუდგინეს სამოქალაქო უფლებები. იგი საქართველოში დაბრუნდა და მშობლიურ ქუთაისში დასახლდა¹.

მეთის საპრობილეებში ხანგრძლივმა ყოფნამ ოდნავადაც ვერ გასტეხა მისი მებრძოლი, შეუდრეკელი გული, იგი ბოლომდე ეროგული დარჩა რევოლუციური იდეალებისადმი.

შემორჩენილია ზოგიერთი ცნობა, ზოგიერთი დეტალური ცენტრალური ციხეში მისი ცხოვრებიდან.

ვისმე ვიტაშევსკის გადმოცემით ახლად დანიშნულმა ციხის უფროსმა კოპინმა პატიმრებს აუკრძალა კედლებზე კაკუნით ლაპარაკი. ზდანოვიჩი არ დაემორჩილა ამ აკრძალვას. იგი არ უჭერებდა ზედამხედველს და იმანაც ზდანოვიჩის ეს თავგასულობა კიბის უფროსს აცნობა. გამოცხადდა ციხის უფროსი კოპინი — მეტად მკაცრი და უემური ხასიათის მქონე ადამიანი. მან ზდანოვიჩს „თქვენობით“ მიმართა, რომ ამიერიდან კედლებზე კაკუნი აკრძალულიაო.

— ვაკაკუნებდი და კვლავაც დავაკაკუნებ, — მიუგო ზდანოვიჩმა. აქ კოპინი მოთმინებიდან გამოვიდა, ტონს აუწია და ყვარულზე გადასულმა, სხვათაშორის, თქვა:

¹ Речь и биография, стр. 20—21.

— შენ გავიწყდება ვინა ხარ. შენ კატორღელი ხარ და ვალდებული ხარ უფროსთა ბრძანება უსიტყვოდ შეასრულო¹.

ეს ფაქტი ნათლად მეტყველებს გ. ზდანოვიჩის შეუპოვრობაზე.

ცნობილია ასეთი ფაქტიც: სვიტიჩი თავის „პოლიტიკური კატორღელის მოგონებებში“ მოგვითხრობს ციხეში ზდანოვიჩის ქსევისა და იქ გამეფებული წესების შესახებ:

ციხეში მოკლეს პოლიტიკური პატიმარი კროპოტკინი. ამასთან დაკავშირებით გ. ზდანოვიჩმა ამხანაგებს მიმართა ბარათი, თუ რაგორ გამოხმაურებოდნენ ისინი ამ ფაქტს. „ჩვენ ვალდებულნი ვართ, — წერდა ზდანოვიჩი, — გამოვთქვათ პროტესტი რაიმე ფორმით ყველა იმ სისაძაგლის წინააღმდეგ. ჩვენ რომ გვეპყრობიან, მაგრამ იმისათვის, რომ პროტესტი რაღაც განყენებული არ გამოვვივადეს, თავდაპირველად ჩვენ უნდა მივმართოთ „ბაბუას“, გავიგოთ მისი აზრი და ისიც თუ რა ზომების მიღებას დააპირებს ამის შემდეგ“. „ბაბუას“ ქვეშ იგულისხმებოდა სოციალ-რევოლუციონერთა; პარტიის ცენტრალური ორგანო „ვოლია“. ბარათი ხელში ჩაუვარდა ციხის ადმინისტრაციას, რამაც დიდი განგაში გამოიწვია. მიუხედავად მუქარისა, ზდანოვიჩს ვერაფრით ვერ ააქმევეინეს თუ ვინ იგულისხმებოდა ამ „ბაბუას“ ქვეშ. ციხის ადმინისტრაციამ დასაშინებლად ბრძანება გასცა, რომ ზდანოვიჩისათვის ბორკილები დაედოთ, თავი გადაეპარსათ და წაერთმიათ ნათესავებთან მიმოწერის უფლება.

ამის შემდეგ ციხეში თვითონ გუბერნატორი ვალი გამო-

¹ «Былое», 1905, июль, стр. 131—132.

ცხადდა. გენერალი სასწრაფოდ გაეშურა №25 საკანისაკენ, რომელშიც ზდანოვიჩი იმყოფებოდა.

--- „აზა რას ფიქრობ? ნუთუ სრულებით არ გინდათ გვითხრაოთ ვინ არის ეს „ბაბუა“?“

— არა, არ მინდა!

— „აი ხომ ხედავ, შენ ბორკილებში ხარ, თავგადააპარსული, ჩამორთმეული გაქვს დედასთან მიმოწერის უფლება, არ გაგაჩნია საწერი მოწყობილობა; საკმარისია ერთი სიტყვა გვითხრა და ახლავე მიიღებ შემსუბუქებას. თქვი!“

--- არა, არ ვიტყვი.

გენერალი ვალი მხრებს იჩეჩს და აღარ იცის კიდევ რა უთხრას. ზდანოვიჩი ელაპარაკება, გუბერნატორს იმ სასჯელის უსამართლობაზე, რომელიც მას დაადეს, უმტკიცებს ამ ღონისძიებათა უკანონობას, სასჯელთა შესახებ დებულების თვალსაზრისითაც კი. გენერალი ღელავს. ტუჩებს იკვნეტს. მხრები უთრთის...

— „ოჰ, როგორ არ იცი, როგორ არ იცი?“—წამოიყვირა გენერალმა. „მიეცით მას წესდება გადასახლებულთა შესახებ“— მიმართავს იგი ზედამხედველს და საკანიდან გადის.

გუბერნატორის წასვლიდან ორი კვირის შემდეგ ზდანოვიჩის საკანში შედის ზედამხედველი და აძლევს მას დედის წერილს, რომელსაც თან ოფიციალური ქალაქი ახლავს. ზდანოვიჩს წერილის შინაარსი ეუცნაურა. დედა წერდა, რომ გამოტეხილიყო, დაეჭვრებინა უფროსებისათვის, არ ეწყენინებინა დედისათვის, რომელმაც ამდენი ხანია არაფერი იცის, შვილის შესახებ; ნუ იტანჯავს თავს ზედმეტად. დედა ურჩევს, რომ დაჰყვეს უფროსთა სურვილს და გათქვას ყველა ის პირი, რომელიც ბარათში იყო მოხსენიებული...

ოფიციალურ ქაღალდში, რომელსაც გუბერნატორი ვალე აწერდა ხელს, ლაპარაკი იყო იმაზე, რომ თუ ზღანოვიჩი შეასრულებდა დედისა და უფროსთა სურვილს, მას მიენიჭებოდა უფლება მიმოწერა ეწარმოებინა დედასთან, გადაეცემოდა საწერი მოწყობილობა, ახსნიდნენ ბორკილებს და აღარ გადაპარსავდნენ თავს.

მთელი ეს ისტორია შეთითხნილი იყო გენერალ ვალის მიერ. ერთხელ ზღანოვიჩის დედამ მაია მიქელაძემ ხარკოვის გუბერნატორისაგან მიიღო ოფიციალური ქაღალდი, რომელშიც გუბერნატორი მას წინადადებას აძლევდა მიეწერა შვილისათვის წერილი და ერჩია გამომტყდარიყო. გუბერნატორი იმუქრებოდა, რომ წინააღმდეგ შემთხვევაში მისი შვილის საქმე ცუდად წავიდოდა. შეშინებული დედა იძულებული გახდა მართლაც მიეწერა შვილისათვის აღნიშნული წერილი.

დედის წერილის მიღებიდან ორი კვირის შემდეგ გ. ზღანოვიჩთან საკანში სრულიად მოულოდნელად შედის ვილაც გეხერალი და თავაზიანი ღიმილით ეკითხება, მიიღო თუ არა მან დედისაგან გამოგზავნილი წერილი და აქვს თუ არა განზრახვა მისწეროს პასუხი. ამაზე გ. ზღანოვიჩს მიუგია, რომ, რა თქმა უნდა, მას დიდი სურვილი აქვს მისწეროს დედას წერილი, მაგრამ ვალის მიერ შემოთავაზებული პირობების მიღება კი არავითარ შემთხვევაში არ შეუძლია.

„იციტ რა, ეს ჩემთვის სულერთია. — განაცხადა გენერალმა. — მე ამაში არც ჩავერეოდი, მაგრამ გენერალმა ფონ-ვალმა მოხოვა მოვლაპარაკებოდით და აი მეც ვასრულებ მის თხოვნასო“ და საკანთან გავიდა.

მაგრამ ბარათთან დაკავშირებული ისტორია ამით არ დამთავრებულა. ვალი არ მშვიდდებოდა. როდესაც დაინახა, არა-

ფერი გამოუვიდა, მან უკანასკნელ საშუალებას მიმართა — ზდანოვიჩის აუკრძალა ჟურნალის მიღების უფლება, მაგრამ ეს ლონისძიებაც უნაყოფო აღმოჩნდა. გ. ზდანოვიჩმა ამჯობინა ბორკილდადებული ყოფილიყო, დაეკარგა ჟურნალის წაკითხვისა და დედასთან მიმოწერის უფლება, ვიდრე დაეკმაყოფილებინა კიხის ადმინისტრაციისა და თვით ხარკოვის გუბერნატორის მოთხოვნა — გაეცა, პირადი კეთილდღეობისათვის, თავისი ამხანაგები¹.

ეს ფაქტი კარგად ახასიათებს გ. ზდანოვიჩის შეუპოვრობას, მის უდრეკ ხასიათსა და რევოლუციური საქმისათვის თავგანწირვას.

თოთხმეტი წლის განმავლობაში ციხეებში, საკატორლო სამუშაოებზე და გადასახლებებში ყოფნის შემდეგ (1875 – 1889 წწ.) ზდანოვიჩს, როგორც იქნა, ეღირსა თავის მშობლიურ საქართველოში დაბრუნება. დაბინავდა ქ. ქუთაისში თავის მოხუც დედასთან. მაგრამ დედა-შვილს ერთად დიდხანს არ უცხოვრიათ. მათა მიქელაძე მალე გარდაიცვალა. ეს მოხდა 1891 წელს. დამწუხრებულმა შვილმა ღრმად განიცადა დედის გარდაცვალება. მისი ხსოვნისადმი ღრმა პატივისცემის ნიშნად გვარად აირჩია ფსევდონიმი „მაიაშვილი“. ამ გვარს ზდანოვიჩი სიკვდილამდე ატარებდა. ამავე გვარითაა იგი ცნობილი ქართულ მწერლობასა და პუბლიცისტიკაში.

¹ «Воспоминания политического каторжника», «В каменном мешке. Надгробное слово» (Книгоизд. «Народная воля» С.-Петербург. 1908, стр. 17—18, 20—22).

გ. მაიაშვილის (ზდანოვიჩის) მოღვაწეობა საქართველოში

გ. მაიაშვილის (ზდანოვიჩის) მებრძოლი ბუნება ვერაფერ-
მა გასტეხა. მის მიერ განვლილი გზა მას მიაჩნდა სამშობ-
ლოს წინაშე თავისი მოქალაქეობრივი მოვალეობის შესრულე-
ბად. იგი საქართველოში მორალურად გამარჯვებული, სული-
ერად მხნე და იმაზე ფიქრით დაბრუნდა, თუ როგორ გამოეყე-
ნებინა თავისი მომავალი ცხოვრება ხალხისა და ქვეყნის სამსა-
ხურისათვის.

ჯერ კიდევ ციხეში ყოფნისას ის მუდამ იმის ცდაში იყო,
რომ კავშირი დაემყარებინა ხალხთან და თავისი ფიქრები გა-
ეზიარებინა მისთვის. ამ მიზნით მან აირჩია პუბლიცისტის
მახვილი კალამი. რომელიც სიკვდილამდე არ გაუშვია ხელი-
დან. ატიმარმა გ. მაიაშვილმა მოახერხა ეთანამშრომლა არა
მარტო ციხის ხელნაწერ ჟურნალში, არამედ კავშირი დაე-
მყარებინა „ივერიის“ რედაქციასთანაც. 1888 წელს, გადასა-
ხლებაში მყოფი, „სიბირსკაია გაზეტას“ აქტიური თანამშრო-
მელი ხდება, ხოლო საქართველოში დაბრუნების შემდეგ სის-
ტემატურად თანამშრომლობდა თბილისისა და ქუთაისის ქარ-
თულ და რუსულ პრესაში. იგი ჩვეული ენერგიითა და მგზნე-
ბარე ტემპერამენტით ჩაება საზოგადოებრივ საქმიანობაში.
ამას ზეელი შეუწყო იმ გარემოებამაც, რომ საქართველოში და-
ბრუნების შემდეგ იგი უკეთ გაეცნო საქართველოს საზოგადო-
ებრივ ცხოვრებას, მის ხასიათს და ვითარებას; გაშალა მეტად
საინტერესო პუბლიცისტური და კრიტიკული მოღვაწეობა.

მან, როგორც ფართო განათლებისა და მაღალი გემოვნე-

ბის პუბლიცისტმა. მალე მოიხვეჭა სახელი მკითხველთა შორის და ერთ-ერთი ცნობილი ჟურნალისტი გახდა.

გ. მაიაშვილის დიდი ერუდიციის დამადასტურებელია ისიც, რომ იგი შესანიშნავად ასამებდა ერთმანეთში პრაქტიკულ საქმიანობას და მწერლობას, საზოგადოებრივ მოღვაწეობას. მან მეტად მდიდარი კრიტიკულ-პუბლიცისტური მემკვიდრეობა დაგვიტოვა.

ჩვენ წინამდებარე ნაშრომში მიზნად არ ვისახავთ გადმოცემთ ამ მდიდარი მემკვიდრეობის ანალიზი¹, გავაშუქოთ ყველა მისი ასპექტი. ჩვენი მიზანი უფრო მოკრძალებულია. გვინდა მკითხველებს გავაცნოთ ზოგიერთი ძირითადი მომენტი გ. მაიაშვილის ცხოვრებიდან, მისი პრაქტიკული საქმიანობიდან და, რა თქმა უნდა, ის ძირითადი პროგრამა, რომლის განსორციელებისათვის იღწვოდა იგი მთელი თავისი სიცოცხლის მანძილზე.

როგორც აღვნიშნეთ, ჯერ კიდევ გადასახლებაში მყოფი გ. მაიაშვილი ხშირად თანამშრომლობდა „ივერიაში“. მან 1922 წელს გამოაქვეყნა თავის დროისათვის მეტად საინტერესო ტრაქტატი „წერილი ჩვენ საზოგადოებრივ მოღვაწეთა მიმართ“, რომელმაც ქართულ პუბლიცისტულში დიდი კამათი და ცხოველი ინტერესი გამოიწვია. გ. მაიაშვილის სტატიას ფართოდ გამოესმაურნენ გაზეთ „შრომის“ ირგვლივ შემოკრებილი პუბლიცისტები გრ. კოლსკი (უმწიფარიძე), ე. მჭედლიძე (ბოსლუჯელი) და სხვ.

ჩვენ გვინდა ამ სტატიაზე შედარებით ვრცლად შევიჩერ-

¹ ამის შესახებ უფრო ვრცლად იხ. გიორგი მაიაშვილი (ზდანოვიჩი) რჩეული ნაწერები. ტ. 11. თბ., 1968 წ., გვ. 624—625.

დეთ, რადგანაც იგი წარმოადგენს საპროგრამო ხასიათის დოკუმენტს, რომელშიც ნათლად ჩანს თუ რა სურდა და რისთვის იბრძოდა ეს დაუცხრომელი და უანგარო მოღვაწე ქართველი ერისა. სტატია საინტერესოა იმ მხრივაც, რომ გ. მაიაშვილი მარქსის მოძღვრებაზე დაყრდნობით ცდილობს მკითხველებს გააცნოს ისტორიის მატერიალისტური გაგება.

გ. მაიაშვილის „წერილს ჩვენ საზოგადოებრივ მოღვაწეთა მიმართ“ თავიდან ბოლომდე წითელ ზოლად გასდევს „ეკონომიური წყობილების და ვითარების გამოკვლევისა და გამორკვევის“... აუცილებლობა. რათა მეტი დამაჯერებლობა მისცეს თავის არგუმენტებს, იგი ფართოდ მიმოიხილავს დასავლეთ ევროპის სამი წამყვანი სახელმწიფოს — ინგლისის, საფრანგეთისა და გერმანიის სოციალურ-ეკონომიურ ცხოვრებას, ამ სახელმწიფოთა პოლიტიკასა და მათ დამოკიდებულებას ეროვნულ-განმათავისუფლებელ მოძრაობისადმი. გ. მაიაშვილი სტატიაში მიმოიხილავს ცნობილ ირლანდიის საკითხს, ეხება ირლანდიელთა ეროვნულ ჩაგვრას, რასაც ისინი განიცდიდნენ ინგლისელებისაგან. ამჟღავნებს საკითხის ღრმა გაგებას. გ. მაიაშვილის აზრით „მანცა და მანც არა სურვილი ეროვნული დამოუკიდებლობისა შეადგენს მთავარს... ირლანდიელთა მოძრაობისას, არამედ ხალხის ეკონომიური ურთიერთობის გადაკეთება“. მისი აზრი „ცვლილება მარტოოდენ გარეგან პირობათა, გადაძრობა მარტოოდენ პოლიტიკური სამოსელისა გარეშე ღრმა ეკონომიური ცვლილებათა. ცხოვრების დედა-ბურჯთა შეუცვლელად, თავის დღეში ვერ მოსწევს ხალხს სასურველ თავისუფლებას... მხოლოდ ღრმა ეკონომიური ცვლილებებისათვის ბრძოლა არის გზა ნამდვილი თავისუფლებისადმი, მხოლოდ საუკეთესო ეკონომიურის წეს-წყობილების დამყარება

ეროვნული დამოუკიდებლობითურთ, რასაკვირველია, ნამდვილათ გაანთავისუფლებს ხალხს და მისცემს მას ჭეშმარიტ თავისუფლებას“.

გ. მაიაშვილს ღრმად სწამს, რომ მართო ეროვნული დამოუკიდებლობის მოთხოვნით გატაცება საკმარისი არ არის. იგი სამართლიანად შენიშნავს, რომ არ დაერქმევა სამშობლო იქ ქვეყანას, სადაც არ შეიძლება იცხოვრო შრომით, თუნდ წელებზე ფეხს იდგამდე. მოჰყავს მაგალითები აგრეთვე იტალიის, ბულგარეთის და სერბიის სინამდვილიდან.

გ. მაიაშვილის აზრით „ჭეშმარიტნი მებრძოლნი ხალხის სიკეთისათვის, პატრიოტნი... მოყვარენი თავისი სამშობლოსი, თავისავე საკუთარი ხელით უთხრიან ორმოს ძვირფას თავის ქვეყანას, უკეთუ ივიწყებენ ხალხის ეკონომიურ ინტერესებს. უკეთუ ვამოსდგომიან მხოლოდ ეროვნულს იდეებს და ტრადიციებს“.

სტატია ყურადღებას იმსახურებს იმითაც, რომ მასში შესანიშნავადაა მოცემული ბურჟუაზიული დემოკრატიზმის სიყალბე და ფარისევლობა. მისი პოლიტიკური ლოზუნგების ნამდვილი არსი. ათასჯერ მართალია გ. მაიაშვილი როდესაც წერს, რომ „ყოველივე თავისუფლება და მისი პოლიტიკურად მინიჭებული უფლებანი და პოლიტიკური თავაზიანობაც დავიწყებულ და უგუტყორცნილ იქნებიან ხოლმე თვით თავისუფლების მომხრეთა და მოყვარეთა მიერ, როდესაც საასპარეზოდ გამოდის სცენაზე ეკონომიური და არა პოლიტიკური საგანი... პოლიტიკური თავისუფლება და ეკონომიური მონობა-დაჩაგრულობა ადვილად თავსდებიან ერთად ერთსა და იმავე ქვეყანაში... მოისურვებს თუ არა ხალხი ეკონომიურ დაჩაგრულობას თავი დაახწიოს, მაშინვე ყოველსავე პოლიტიკურს თავ-

ვისუფლებას შორს ისვრიან. როგორც მტერს, ისინივე, ვინც გუშინ და გუშინწინ მაღლა აფრიალებდა პოლიტიკური თავისუფლების დროშას... თავისუფლება უსაჭიროესი საგანია, მაგრამ ამ საგნით სარგებლობა ეთავაზება ეკონომიურად ძლიერს თავის ინტერესების დასაცავად. ასეთი გახლავთ ეს ქებული პოლიტიკური თავისუფლება ბურჟუაზიისა! ასეთია მისი სიღრმე და სიგანე, მისი ხატება“.

აქვე ეხება ეროვნული სიმდიდრის ზრდის საკითხს ბურჟუაზიულ ქვეყნებში და სამართლიანად შენიშნავს. რომ „მრეწველობის აღორძინება აწინდელ ხალხთა ეკონომიური ცხოვრების ვითარების მეოხებით ნიშნავს მეტი უფლების მჭონეთა გამდიდრებასა და ხალხის გაღარიბებას... ბატონყმობის დროს არავინ არ განსჯიდა ყმის კეთილდღეობაზე ბატონის სიმდიდრის მიხედვით“ ასკვნის იგი. გ. მაიაშვილი იძლევა რუსეთში 60-იან წლებში გატარებული რეფორმების შესანიშნავ კრიტიკას, აღნიშნავს, თუ ვისთვის იყო სინამდვილეში სასარგებლო ამ რეფორმის გატარება. მისი აზრით „ყოველი რეფორმა, ცხოვრების რომელ მხარესაც გინდა შეეხებოდეს, დარჩება უქმად და ნაყოფს ვერ გამოიღებს, თუ იგი მტკიცედ შემეცნებული და ცხადად გამოთქმულ პრინციპზე არ არის დამყარებული“. ამის საილუსტრაციოდ მას მოჰყავს ისტორიული მატერიალიზმის არსის გენიალური ფორმულირება, მოცემული მარქსის მიერ 1859 წელს ისტორიულ „წინასიტყვაობაში“ თავისი განთქმული წიგნისა— „პოლიტიკური ეკონომიის კრიტიკისათვის“. როგორც ჩანს ეს „შესავალი“ გ. მაიაშვილს გადმოთარგმნილი აქვს რუსული გამოცემიდან. აღსანიშნავია, რომ იგი არსად არ ახსენებს მარქსის სახელს, თუმცა უდიდეს შეფასებას აძლევს მას. გ. მაიაშვილის სიტყვებით მარქსი არის

„უდიდესი და უაღრესად შემეცნიერული კაცი ჩვენის დრო დასაუკუნისა, კაცი ისეთი, რომლის სრულიადმა და მტკიცე — მეცნიერულმა წარმოდგენამ მსოფლიოზე (Мирозозерцание) ქმნა დიდი ძლევა“. შემდეგ ამას მოჰყვება კ. მარქსის სიტყვები, რომ ადამიანები თავიანთი ცხოვრების საზოგადოებრივი წარმოებისას შედიან განსაზღვრულ, აუცილებელ, მათი ნებისყოფისაგან დამოუკიდებელ ურთიერთობებში—წარმოებით ურთიერთობებში, რომელშიც მათი მატერიალური საწარმოო ძალების განვითარების განსაზღვრულ საფეხურს შეესაბამებოდა. რომ ამ წარმოებით ურთიერთობათა ერთობლიობა შეადგენს საზოგადოების ეკონომიურ სტრუქტურას, რეალურ ბაზისს, რომელზედაც იურიდიული და პოლიტიკური ზედნაშენი აღიმართება; რომ მატერიალური ცხოვრების წარმოების წესი. ჯანაპირობებს საერთოდ ცხოვრების სოციალურ, პოლიტიკურ და სულიერ პროცესებს... რომ ადამიანთა ცნობიერება კი არ განსაზღვრავს მათ ყოფიერებას, არამედ, პირიქით, მათი საზოგადოებრივი ყოფიერება განსაზღვრავს მათ ცნობიერებას... რომ კაცობრიობა ყოველთვის ისეთ ამოცანებს უსახავს, რომელთა გადაჭრაც მას შეუძლია და სხვ. ჩვენ მარქსის ეს ცნობილი ფორმულირება თავიდან ბოლომდე მხოლოდ იმიტომ არ მოგვყავს, რომ იგი კარგადაა ცნობილი ჩვენი მკითხველი საზოგადოებისათვის¹.

¹ ცნობილია, გ. მაიაშვილმა კარგად იცოდა გერმანული ენა. იგი გადასახლებაში მყოფი თავს ირჩენდა რეპეტიტორობითა და იმით, რომ გერმანულიდან თარგმნიდა შრომებს. იგი ნახულობდა დროს ეთარგმნა აკრძალული ლიტერატურაც, კერძოდ მარქსის თხზულებები. ირკვევა, რომ მას უთარგმნია კ. მარქსის „ფილოსოფიის სილატაკე“ ენგელსის წინასიტყვაობით და სხვები.

გ. მაიაშვილი ცდილობს თავისი საპროგრამო დებულებები დააფუძნოს და გამოიყვანოს ამ მარქსისტულ მოძღვრებიდან ადამიანთა საზოგადოების განვითარების შესახებ. თუ რა ღრმად ესმის გ. მაიაშვილს მარქსი, ჩანს მისივე სიტყვებიდან, როდესაც წერს: „მართალია, რომ ეკონომიურ წყობილებას აქვს გავლენა პოლიტიკურს წყობილებაზე და ეს გავლენა მასში ჩანს, რომ პირველი მეორეს მოაწყობს, თავის მოთხოვნილებათა გვარად. მაგრამ ისიც მართალია, რომ პოლიტიკური დაწესებულებანიც, თავის მხრით, როგორც მცველნი ეკონომიური ცხოვრების, საძირკვლისა, ცდილობენ ასე თუ ისე იმოქმედონ მასზე და დაუმორჩილონ პოლიტიკურს ცხოვრებას“. როგორც ვხედავთ აქ გ. მაიაშვილი ბაზისისა და ზედნაშენის ურთიერადამოკიდებულების პრინციპში სწორ გაგებას იძლევა.

ძალია ეს მსჯელობა გ. მაიაშვილს სჭირდება იმის დასასაბუთებლად, თუ როგორ უნდა მოიქცნენ საქართველოს მესვეურნი, მისი წინამძღოლები და ბელადები, თუ მათ ნამდვილად უნდათ დაიხსნან სამშობლო იმ კოლონიურ და დაბეჩავებულ მდგომარეობიდან, რომელშიც იგი იყო ჩავარდნილი. გ. მაიაშვილი საქართველოს „ბედისაგან სასტიკად დასჯილს“ უწოდებს და მოუწოდებს „წინამძღოლთ, რომელთაც უყვართ თავისი სამშობლო, თავისი ხალხი, დაუახლოვდნენ ამ ხალხს, გულმოდგინეთ გაუსინჯონ ბედისაგან დასმული იარები, გამოიკვლიონ მისი სამწუხარო მდგომარეობა და ნამდვილად მეცნიერულად გაიგონ: რა გავლენა ჰქონდა დამოკიდებულებას ხალხის ეკონომიურს ცხოვრებაზე... ეკონომიურ ურთიერთობაზე“.

აქვე ეხება იგი პიროვნების როლს ისტორიაში და ამ სა-

კითხს საკმაოდ დამაჯერებლად აშუქებს. იგი დასცინის ისეთ გმირებს, რომელთაც ჰგონიათ, რომ ხალხთა მოძრაობებს ისინი განაგებენ და რომ ყველაფერი თითქოს მათ ნებასურვილზეა დამოკიდებული. გ. მაიაშვილის შეხედულებით ყოველი პოლიტიკური ან ეროვნული მოძრაობა და ამბოხება დასაწყისს იღებს იმ ეკონომიური წყობილებისაგან, რომელიც ხალხში მოქმედებს. რაც უფრო „გაუფარგისდება“ ეკონომიური წყობილება, მით უფრო გაძლიერდება პოლიტიკური მოძრაობა. „რასაკვირველია, პოლიტიკურ მოქმედ პირთ ჰგონიათ (ეს ცოტა არ არის აკმაყოფილებს იმათ თავმოყვარეობას), რომ პოლიტიკური მოძრაობა და ამბოხება იმათის მოქმედების წყალობით ხდება, მაგრამ ის კი არ იციან, რომ თვითონ ისინი არიან წარმოშობილნი პოლიტიკურის მოძრაობისაგან, რომლის ფესვი და ძირი იმალება ეკონომიური ცხოვრების გაუფარგისებაში და მატერიალური წარმოების შევიწროებაში“. ამასთანავე გ. მაიაშვილი არ უარყოფს პოლიტიკურ ბელადთა როლს და მათ გავლენას მოძრაობაზე, თუ ისინი ღრმად ჩასწვდებიან ამ მოძრაობის არსს და შესძლებენ სათანადო მიმართულებით წარმართონ იგი.

გ. მაიაშვილის ღრმა რწმენით, მხოლოდ ხალხია ისტორიის ნამდვილი შემოქმედი, რომ „არც ერთს საზოგადო მოძრაობას არ ექნება არავითარი მნიშვნელობა, თუ რომ ხალხი იმაში ასე თუ ისე მონაწილეობას არ იღებს, ხალხი აძლევს მოძრაობას დიდ ძალას და მნიშვნელობას“.

პირველ რიგში იგი მოითხოვს მოძრაობაში ხალხის ეკონომიური ინტერესების დაკმაყოფილებას, მერე კი სხვა ინტერესებისაც, როგორც არის პოლიტიკური და ეროვნული. პოლიტიკური და ეკონომიური მოძრაობა რომ მკვიდრო კავ-

შარშია, ამის საილუსტრაციოდ მოჰყავს საქართველოს მაგალითი. მას გულს უკლავს, რომ დიდიხანია ხედავს სამშობლოს გაჩუმებულს და გაყინულს, რომელსაც „თითქოს აღზოცოდეს... კაცები. რომელთაც შეეძლოთ იყისრონ მოვალეობა, გახდნენ ბელადნი მოძრაობისა, რომ ამით გამოაღვიძონ ხალხი იმ ღრმა ძილისაგან, რომელსაც მიეცა ისტორიულის წაშებისა და ტანჯვის შემდეგ“. იგი სამართლიანად შენიშნავს, რომ „მხოლოდ 1860 წლიდან სჩანან მოძრაობის ნიშნები ჩვენის მიმდინარებულის ქვეყნისა, რომელიც „არ მომკვდარა. მხოლოდ სძინავს“. აქ მას მხედველობაში ჰყავს თერგდალეულები, რომლებიც სათავეში ჩაუდგნენ ქართველი ხალხის ნაციონალურ მოძრაობას. იგი აკრიტიკებს იმათ, რომელთაც მიაჩნდა, რომ თითქოს ეს მოძრაობა წარმოიშვა იმის შედეგად. რომ 1860 წელს რუსეთიდან საქართველოში დაბრუნდა რამდენიმე ქართველი განათლებული ყმაწვილი კაცი, და რომ ამ განათლებულმა ყმაწვილკაცებმა, აღტაცებულებმა მამულის სიყვარულით, დაარსეს ქურნალ-გაზეთები, გამოსცეს წიგნები და სხვა. გ. მაიაშვილი ამაში მხოლოდ ფაქტს ხედავს და არა ამ ფაქტის ახსნას; მისი აზრით, ამ მოძრაობის გამომწვევი იყო საქართველოს რუსეთთან შეერთების შემდეგ ცხოვრების მატერიალური პირობების შეცვლა. განსაკუთრებით გლახთა რეფორმის მომდევნო პერიოდში. „რადგანაც ცვლილება ბევრჯერ ხალხის სასარგებლოდ არ არის ხოლმე, ამისათვის ხალხი დიდ სიღარიბეში ჩავარდა... ხალხის ეკონომიური ცხოვრების ახალმა წყობამ მოიყვანა მოძრაობაში თვითონ ხალხიც... აზრმა გაიღვიძა, სამშობლოსათვის მოღვაწენი გამოვიდნენ საზოგადო ასპარეზზედ, საზოგადო საქიროებამ მოითხოვა მათი გა-

მოსვლა. ისინი გამოიწვია დრომ და არა მათ დრო. ეგონებ მათის თავმოყვარეობის საწყენს არაფერს ვამბობ: ეს ყველგან ასე იყო და ასეც იქნება“.

გ. მათაშვილი აკრიტიკებს იმ პირებს, ვინც მხოლოდ კულტურულ-საგანმანათლებლო საქმის მოგვარებაში ხედავდა საქართველოს ბეჩავ მდგომარეობიდან გამოსვლის ერთადერთ გზას, „დალაღება სკოლებში ქართული ენის შემოღებაზედ, სახალხო სკოლების დაფუძნებაზედ, ქართული თეატრის გახსნაზედ, სასარგებლო წიგნების გამოცემაზედ. ჩვენი ენის განვითარებასა და გამშვენიერებაზედ და სხვადასხვა... ყოველივე ესენი ძლიერ საჭირონი და თანაგრძნობის ღირსი საგნები არიან, მაგრამ ამ საგნებზე გაჩერება, მათ გარშემო ტრიალი და ამასთანავე კმაყოფილებით ძახილი, რომ მხოლოდ ამაგებზედ არის დამყარებული ჩვენი ქვეყნის ბედნიერებაო იმასა ნიშნავს. რომ თქვენ მოქმედების პროგრამა ჯერ კიდევ არ გქონიათ შემუშავებული და მტკიცე ნიადაგზე დამყარებული“.

გ. მათაშვილი მოუწოდებს ქართველ საზოგადო მოღვაწეებს პირველ რიგში ახსნან ეკონომიური საგნები, ყოველმსრივ შეისწავლონ ხალხის ეკონომიური ცხოვრება. იგი გულსტკივილს გამოთქვამს, რომ ქართულ ჟურნალ-გაზეთებში თითქმის არაფერი იწერებოდა პოლიტეკონომიის სფეროდან. აქვე იძლევა საკმაოდ ვრცელ საკუთარ პროგრამას თუ როგორ უნდა ყოფილიყო შესწავლილი და გამოკვლეული ქვეყნის ეკონომიური მდგომარეობა. მისი სოციალური შემადგენლობა, ეროვნული შემოსავალი და სხვ.

„თქვენ გიყვართ სამშობლო, თქვენი ენა, ხალხი, — წერს გ. მათაშვილი ქართველ საზოგადო მოღვაწეთა მიმართ, — მაგ-

რამ არ გეტყობათ, რომ თქვენ ცნობიერად მოფიქრებულ-
გქონდეთ პროგრამა საზოგადოებრივი მოქმედებისა, სიყვა-
რული — დიად საქები და პატივსაცემი გრძნობაა, ცხადია,
მაგრამ ცარიელის სიყვარულით ქვეყანას ვერ აღვაშენებთ
და ვერ აღვადგენთ... საჭიროა შემუშავება და გამოკვლევა
საზოგადოებრივის იდეალისა, ხალხთა ცხოვრების ყოველ-
მხრივს დაკვირვებისა და შესწავლის შემდეგ“.

გ. მაიაშვილი საყვედურობს საქართველოს ისტორიით გა-
ტაცებულ პირებს, რომლებიც თავიანთ თხზულებებში მხო-
ლოდ სხვადასხვა ლაშქრობებსა და სამეფო კარის ინტრიგებს
აღწერენ. „იმის მაგიერ რომ დაგვანახოთ ყოფა-ცხოვრება
ხალხისა წარსულს დროს, იმის მაგიერ, რომ გაგვაცნოთ მა-
შინდელი უფლებბრივი, იურიდიული და ეკონომიური ურ-
თიერთობა, თქვენ სულ სხვას მოგვითხრობთ. და თან ამ შეს-
ხმასა და ხოტბის წერას დარბაისლურ შრომას ეძახით!“

ბოლოს გ. მაიაშვილი ამ თავის უდავოდ მეტად საინტე-
რესო წერილში ეხება ქართული ლიტერატურის ბედს და მო-
ითხოვს ხალხისათვის გასაგებ ლიტერატურას ენითაც და ში-
ნაარსითაც, გმობს მაღალფარდოვნებისადმი გამოდევნებას
ლიტერატურაში. და ასე ამთავრებს სტატიას: „წევაწყით და
შეეუთანსძოთ ჩვენი ნაწერების სასიათი და მიმართულება
ხალხის ინტერესებს და მოთხოვნილებათ, ვისწავლოთ და განვ-
ვითარდეთ ხალხთან ერთად, მასთან ერთადვე შევიმუშავოთ
საზოგადოებრივი იდეალები“¹.

როგორც ვხედავთ, გ. მაიაშვილის ეს საპროგრამო დოკუ-
მენტი საგულისხმოა ბევრის მხრივ. ზოგიერთ მის დებულე-
ბას დღესაც არ დაუკარგავს თავისი მნიშვნელობა. ცხადია,

¹ „ივერია“ № 7—9, 1882 წ.

იგი ჯერ კიდევ საკმაოდ შორსაა მარქსიზმის ღრმად წვდომისაგან, მაგრამ მისი ღირსება ისაა, რომ ქართულ პუბლიცისტიკაში ერთ-ერთმა პირველმა გაკვალა გზა მარქსისტული იდეების მიმართულებით.

აღსანიშნავია აგრეთვე გ. მაიაშვილის სტატია ბელინსკზე (დაიბეჭდა „სიბირსკაია გაზეტაში“ 1888 წ.), აგრეთვე სტატეები „ძველი და ახალი თაობა და მათ გამო ლაპარაკი ჩვენში“ („ივერია“, 1889 წ., № 222—238), „მოკლე მიმოხილვა წარმოება-აღებშიცემობისა ჩვენში ძველად და ახლად“ („საქართველოს კალენდარი“, 1890 წ.), „ჩვენი დედაქაცეები და ახალი დრო“ („ივერია“, 1891, № 95—142), „ქუთაისის სათავადაზნაურო ბანკი და მისი მოქმედება“ („მოამბე“, 1896, № 12, 1897 №№ 1, 3, 4), „მსხვილ თავად-აზნაურთა იდეოლოგია“ (გაზ. „ჩვენი მეგობარი“, 1916, № 41) და მრავალი სხვა, რომლებშიც იგი ატარებს და იცავს თავის ზემოდაღნიშნულ შეხედულებებს.

გ. მაიაშვილი არა მარტო ქადაგებდა ზემოდმოყვანილ წერილებში გადმოცემულ იდეებს, არამედ ცდილობდა კიდევაც მათ ცხოვრებაში პრაქტიკულად განხორციელებას. ჭიათურის შავი ქვის მრეწველთა ყრილობის თავმჯდომარედ მისი მოღვაწეობის მთელი პერიოდი (1896—1917 წწ.), რის შესახებაც ქვემოთ გვექნება საუბარი, ნათლად ადასტურებს ამას.

კარგადაა ცნობილი გ. მაიაშვილის საზოგადოებრივ საგანმანათლებლო მოღვაწეობა. მან მთელი თავისი მგზნებარე სიცოცხლე ქართველი ხალხის ეროვნული განთავისუფლებისა და მისი კეთილდღეობის კეთილშობილ საქმეს მიუძღვნა.

გადასახლებიდან დაბრუნების შემდეგ გ. მაიაშვილი ერთხანს ქუთაისის სამიწათმოქმედო ბანკში იწყებს მუშაობას

საზედამხედველო კომიტეტის წევრად. აღსანიშნავია, რომ საქართველოში დაბრუნების შემდეგ გ. მაიაშვილს დაუწესეს პოლიციის ღია მეთვალყურეობა. ეს იმას ნიშნავდა, რომ მას ოფიციალურად ეკრძალებოდა სახელმწიფო ან კერძო სამსახურში შესულიყო, მას სასამართლოში მოწმედ გამოსვლის უფლებაც კი არ ჰქონდა. ცხადია, ეს უარყოფით გავლენას ახდენდა მის მატერიალურ და მორალურ მდგომარეობაზე. გ. მაიაშვილმა ბევრი იბრძოლა, რომ მისთვის პოლიციის მეთვალყურეობა მოეხსნათ. მხოლოდ 1892 წელს შესძლო მან მიეღწია ამისათვის, უშუალოდ ხელმწიფე იმპერატორის უკარგულების საფუძველზე. ამის შემდეგ მას უფლება მიეცა დაეწყო სამსახური. ცნობილია, გ. მაიაშვილის დაუცხრომელი ბრძოლა ბანკის მესვეურთა მომხვეჭველობის წინააღმდეგ. იგი გადაჭრით მოითხოვდა რომ ბანკის მოგება მოხმარებოდა ხალხის საჭიროებათა დაკმაყოფილებას, საგანმანათლებლო საქმეს, ცარიზმის რუსიფიკატორულ პოლიტიკის წინააღმდეგ ბრძოლისათვის დათხოვნილ მასწავლებელთა მატერიალურ უზრუნველყოფასა და სხვ.

საერთოდ გ. მაიაშვილი არავის არ ერიდებოდა და ყოველთვის მკაცრი და პირდაპირი იყო, როცა ამას საერთო საქმე და ქვეყნის ინტერესები მოითხოვდა. ამ ნიადაგზე მას ბევრი მტერი გაუჩნდა.

წლების მანძილზე გ. მაიაშვილი ნაყოფიერ მუშაობას ეწეოდა, როგორც ქართველთა შორის წერა-კითხვის გამავრცელებელი საზოგადოების ქუთაისის განყოფილების თავმჯდომარე. ეხმარებოდა მას მატერიალურადაც.

გ. მაიაშვილის ირგვლივ, სადაც არ უნდა ყოფილიყო იგი, ირავს იყრიდა იმდროინდელი მოწინავე საზოგადოება, იმარ-

თებოდა მსჯელობა და ცხარე კამათიც როგორც ცხოვრებულსა და სპირიტუალურ თემებზე, ასევე ცარიზმის კოლონიურ პოლიტიკაზე, მეფის მოხელეთა თვითნებობაზე, სახავდნენ ღონისძიებებს თუ როგორ გამოეყვანათ საქართველო ამ ბეზარულ მდგომარეობიდან.

განსაკუთრებით დიდ როლს უთმობდნენ ისინი ეროვნულ-განმათავისუფლებელ მოძრაობის საკითხებს. როგორც ცნობილია გ. მაიაშვილი სოციალ-ფედერალისტი და მათი მესვეური იყო. იგი ეკონომიურ საკითხებთან ერთად დიდ ყურადღებას აქცევდა ეროვნული საკითხის მართებულად მოგვარებას. იგი მას ესახებოდა ფედერაციული გაერთიანების სახით, როდესაც საქართველოს შინაურ საქმეებში ექნებოდა ფართო ავტონომია, ხოლო საგარეო პოლიტიკის ხაზით მჭიდრო კავშირში იქნებოდა რუს ხალხთან.

მოითხოვდა რა საქართველოსათვის ეროვნულ-ტერიტორიული ავტონომიის შექმნას, მან სწორად ვერ გაიგო ეროვნული საკითხის გადაჭრის ლენინური თეორია, ალლო ვერ აუღო იმ დიდ ცვლილებებს, რომლებსაც მუშათა კლასი აღწევდა ბოლშევიკური პარტიის ხელმძღვანელობით. პირველმა მსოფლიო ომმა კიდევ უფრო გაზარდა მასში რწმენა ეროვნული ავტონომიის შექმნის აუცილებლობის შესახებ. ამას მოწმობს 1915 წელს გამოქვეყნებული მისი სტატიები „ნაციონალიზმის გამარჯვება“, „ერთი თუ ორი პარტია“, „კვლავ ნაციონალიზმი და ინტერნაციონალიზმი“ და სხვ. ამ სტატიებში ნათლადაა გადმოცემული გ. მაიაშვილის ეროვნული პროგრამა. მას როგორც ფედერალისტს ღრმად სწამდა „გარდაქმნა სოციალური ურთიერთობების სასარგებლოდ მთელი მშრომელი ხალხისა, განურჩევლად პროლეტარიატისა და

გლახობისა. და შემოდება საქართველოში დემოკრატიულ პრინციპებზე აშენებული პოლიტიკური თვითმმართველობისა, რომელიც უნდა მიმდინარეობდეს როგორც ბუნებრივი შედეგი იმ დემოკრატიული ბრძოლისა რუსეთში, რომელსაც მიზნად ექნება რადიკალურად გარდაქმნა პოლიტიკური რეჟიმისა მთელ სახელმწიფოში¹. ერთი სიტყვით, მთელი მისი პოლიტიკური მოღვაწეობა ორ ძირითად მიზანს ისახავდა: სოციალური უსამართლობის მოსპობასა და ეროვნულ თავისუფლებას საქართველოსათვის.

გ. მაიაშვილი განსაკუთრებით ახლო იყო ექიმ დ. ნაზარაშვილს, ვ. ნ. ნიკოლაძისა და ნ. ა. ფურცელაძის ოჯახებთან. აქ ხშირად იკრიბებოდნენ საქართველოს გამოჩენილი შვილები და მსჯელობდნენ საზოგადოებრივ, ლიტერატურის, ხელოვნებისა და სხვა საჭირობო საკითხებზე. მათ შორის აღსანიშნავია გ. წერეთელი, ა. გაბაშვილი, დ. ნაზარაშვილი, ნ. ნიკოლაძე, კ. ლორთქიფანიძე, კ. აბაშიძე, ა. გ. წერეთელი და სხვები.

გ. მაიაშვილი გადაჭრით მოითხოვდა ეროვნული თვითგამორკვევის უფლების აღიარებას ქართველი ხალხისათვის, მხარს უჭერდა რუს ხალხთან გულწრფელ მეგობრულ დამოკიდებულებას ცარიზმის წინააღმდეგ მათ საერთო ბრძოლაში. ხალხების სოციალური და ეროვნული განთავისუფლების გზას გ. მაიაშვილი ხედავდა სოციალურ რევოლუციაში. იგი მჭიდრო ურთიერთობაში იყო გამოჩენილ რევოლუციონერებთან, რომლებიც, სხვა გამოჩენილ და პროგრესულად მოაზროვნე პირებთან ერთად, ხშირად იკრიბებოდნენ მის ბინაზე ქ. ქუთაისში, რომელიც მდებარეობდა ყოფილი

¹ გაზ. „ჩვენი მეჯობარი“, 1915 წ. № 41.

ქართული გიმნაზიის გვერდით, გეგუთის ქუჩაზე, (ამჟამად ალ. წულუკიძის ქუჩა).

საქართველოში დაბრუნების შემდეგ გ. მაიაშვილის რევოლუციური საქმიანობა, მისი ურთიერთობა იმ დროის გამოჩენილ რევოლუციონერებთან და საზოგადო მოღვაწეებთან შეუმჩნეველი არ დარჩენია მეფის ჟანდარმერიას. ეს განსაკუთრებით საგრძნობი გასდა 1905 წლის რევოლუციის დამარცხების შემდეგ გამეფებული რეაქციის წლებში. ამ პერიოდში დასავლეთ საქართველოს ტერიტორიაზე ბობოქრობ და რევოლუციის დაუძინებელი მტერი, პირსისხლიანი გენერალი ალიხანოვ-ავარსკი, რომელმაც ცეცხლითა და მახვილით ააწიოკა მთელი დასავლეთ საქართველო.

ამ ჯალათს წინასწარ ხელთ ჰქონდა იმ პირთა პროსკრიპციული სიები, რომლებიც უნდა შეეპყროთ და სიკვდილით დაესაჯათ. მათ შორის ერთ-ერთი პირველი იყო გ. მაიაშვილი-ზდანოვიჩი. მისი სიცოცხლე ბეწვზე ეკიდა. ალიხანოვ-ავარსკიმ გასცა ბრძანება დაეპატიმრებინათ გ. მაიაშვილი, როგორც ერთ-ერთი ყველაზე საშიში პიროვნება. ბრძანების აღსასრულებლად გ. მაიაშვილის ბინას მოულოდნელად შემოარტყეს ალყა კაზაკებმა და პოლიციელების გაძლიერებულიმა რაზმმა. ეს ამბავი მსახურმა დაუყოვნებლივ აცნობა გ. მაიაშვილს. მან ეზოდან გაპარვა დააპირა, მაგრამ გვიანდა იყო. მაშინ მან მსახურს დაავალა პოლიციის ოფიცრისათვის მოეხსენებინა, ვითომც იგი სოფელში იყო წასული, თვითონ კი საწოლ ოთახში შევიდა და ისე მოხერხებულად ჩაწვა ლოგინში, რომ კაცი ვერ შეამჩნევდა თუ იქ ვინმე იმყოფებოდა. ერთგულმა მსახურმა ოფიცერს ყველაფერი ისე მოახსენა, როგორც გ. მაიაშვილმა აუხსნა, მაგრამ მან, რა თქმა უნდა,

არ ირწმუნა მსახურის სიტყვები და ყველა ოთახი გულმოდ-
გინედ დაათვალიერა, მათ შორის ისიც რომელშიც გ. მაია-
შვილი იმყოფებოდა საბნის ქვეშ გატრუნული. ოფიცერმა
მართლაც ვერაფერი შეამჩნია, შეადგინა ადგილის დათვა-
ლიერების ოქმი და უკან ხელმოცარული გაბრუნდა. მალე,
ამის შემდეგ, გ. მაიაშვილი სოფელში წავიდა, ხოლო იქედან
თბილისში გადავიდა და არალეგალურად ცხოვრობდა კარგა
ხანს. აი რას წერდა ამ ფაქტთან დაკავშირებით გაზ. „ჩვენი
მეგობარი“ (№ 413—1917 წ.): „1906 წელს საშინელი რეაქ-
ციის დროს მსცოვანი გ. ზდანოვიჩი იძულებული იყო უკვა-
ლოდ მიმალულიყო თითქმის ერთი წლის განმავლობაში, რა-
თა სიცოცხლე შეენარჩუნებინა და ხელთ არ ჩავარდნოდა
გამძვინვარებულ გენერალ ალიხანოვს, რომელიც აშკარად
გაიძახოდა: ერთი ზდანოვიჩი ჩამაგდებია ხელში, რომ იგი
ქუჩის პირველ ფარანზე ჩამოვკიდოო“.

ასე მოხერხებულად დაუსხლტა გ. მაიაშვილი მეფის უან-
დარმერიას, რომელიც მას ჩამოხრჩობას უპირებდა. ასეთი
ხიფათით სავსე წუთები არა ერთი და ორი ყოფილა გ. მაიაშ-
ვილის ცხოვრების ამ პერიოდში. საილუსტრაციოდ მოვიყ-
ვანთ კიდევ ერთ საგულისხმო შემთხვევას, რომელიც მას გა-
დანდა თავს: ერთხელ გ. მაიაშვილს თბილისიდან ქუთაისში
პროკლამაციები მიჰქონდა. პროკლამაციებში ლაპარაკი იყო
ტერორისტული აქტების მოხდენის ახალ წესებზე. თან ახლ-
და ორი თანამებრძოლი. როდესაც მატარებელი ხაშურის
სადგურში გაჩერდა, მასთან მივიდა მისი ძველი მეგობარი
დოქტორი ნიკოლოზ ხუდადოვი თავის შვილთან—ვლადიმერ
ხუდადოვთან ერთად. ამ ვლადიმერ ხუდადოვს თურმე პოლი-
ცია აღევნებდა თვალს, როგორც რევოლუციურ საქმიანობა-

ში შემჩნეულს. ჟანდარმერიის აგენტმა ეჭვი მიიტანა გ. მაიაშვილზეც, ალბათ, მისი თანამზრახველიაო და დააკავა კიდეც. გ. მაიაშვილი მიიყვანეს ჟანდარმერიის ოთახში და მცველად კაზაკი მიუჩინეს. აგენტი გაემართა ჟანდარმერიის უფროსთან მოსახსენებლად, რომ დააკავა საშიში რევოლუციონერი. გ. მაიაშვილმა ისარგებლა ამით. კაზაკს თხოვა ეხმო ოფიციალტისათვის ბორჯომის წყლის მოსატანად. ვიდრე კაზაკი ოფიციალტს უხმობდა, გ. მაიაშვილმა მოასწრო გულის ჭიბიდან ფულისა და პროკლამაციების ამოღება. იგი მან ფარულად, ფულთან ერთად, ოფიციალტს გადასცა, რომელმაც ბორჯომის წყალი მოუტანა. პროკლამაციებისაგან კი განთავისუფლდა, მაგრამ მას კიდევ რჩებოდა ხელბარგში გამოსხვეული სხვა საშიში დოკუმენტები — მაგალითად, დებულება პარტიზანული ბრძოლების საწარმოებლად სამხედრო ორგანიზაციის შესახებ. მან მათი განადგურებაც შესძლო: კაზაკს თხოვა ტულეტში წაეყვანა იგი. ხელბარგიც თან წაიღო. იქ მან საექვო დოკუმენტები ტულეტის მილში ჩასჩარა. როდესაც ჟანდარმერიის ოფიცერი და აგენტი დაბრუნდნენ, გ. მაიაშვილს საექვო დოკუმენტები აღარ ჰქონდა. ამის შემდეგ იგი თბილისში გადააგზავნეს. გუბერნიის ჟანდარმერიის სამმართველოს უფროსმა მას საქმის ვითარება გამოკითხა და, როგორც გაუგებრობის ნიადაგზე დაკავებულნი, მალე გაანთავისუფლა¹.

საერთოდ გ. მაიაშვილი (ზდანოვიჩი) დიდი ავტორიტეტით სარგებლობდა. მას ხშირად მიმართავდნენ რჩევა-დარიგები-

¹ ეს ორი ეპიზოდი გ. მაიაშვილის ცხოვრებიდან 1905 წლის რევოლუციის დამარცხების შემდეგ გამჟღავნებულ ჩაქაიის წლებში ჩვენ მოტანილა გვაქვს გ. ლასხიშვილის შემუშავებიდან.

სათვის. იგი ბევრს მატერიალურადაც ეხმარებოდა. მას არ უყვარდა უკან დახევა და საკმაოდ დიდ რისკზეც მიდიოდა ხოლმე. როდესაც საკითხი რომელიმე რევოლუციურ-პოლიტიკურ წამოწყებას შეეხებოდა, ან როდესაც არაღლეგალურად მოქმედ პოლიტიკურ ორგანიზაციებს ჩაეარდნის საფრთხე ემუქრებოდათ. აქ მას, კეთილშობილებისა და ჰუმანიზმის გარდა, თავისი დიდი გამბედაობა და რევოლუციური ბრძოლების გამოცდილებაც შველოდა.

მოვიყვანთ კიდევ ერთ მაგალითს გ. მაიაშვილის ცხოვრებიდან, საიდანაც ნათლად ჩანს, თუ რაოდენ გაბედული სულის პატრონი იყო ეს გამოჩენილი ადამიანი, რომელიც ერთნაირი პატივისცემითა და სიყვარულით სარგებლობდა თვით იდეურად მოწინააღმდეგე არაღლეგალური პოლიტიკური დაჯგუფებებისა და პარტიების წარმომადგენელთა შორისაც კ. საკრთხი შეეხება ქუთაისის ციხიდან 1906 წელს პოლიტიკური პატიმრების გაქცევის ორგანიზაციას. ამ დროს ქუთაისის ციხე სავსე იყო პოლიტიკური პატიმრებით. ბევრს საკატორლო სამუშაოები და სიკვდილით დასჯაც ელოდა. ქუთაისის სოციალ-დემოკრატიულმა არაღლეგალურმა ორგანიზაციამ გადაწყვიტა დაეხსნა პოლიტიკური პატიმრები. გადაწყდა ქუჩიდან ციხის ქვეშ ფარულად გაეყვანათ გვირაბი. საამისოდ ციხის მახლობლად მოსძებნეს შესაფერისი ბინაც, საიდანაც გვირაბის თხრა უნდა დაეწყოთ, მაგრამ აქ ისინი წინააღმდეგობას წააწყდნენ. ბინის პატრონი გადაჭრით ამბობდა უარს მათთვის ბინის მიქირავებაზე იმ მოტივით, რომ კარგად არ იცნობდა მათ და ქირის დროულად მიღებაც ეეჭვებოდა. ეს მთელ ამ წამოწყებას ჩაშლას უქადდა: დასახმარებლად მიმართეს გ. მაიაშვილს. ამ უკანასკნელმა დაუყოვნებლივ იხმო

თავისი ნაცნობი სახლის პატრონი, შესძლო მისი დაყოლიება და წინასწარ მისცა სამი ათასი მანეთის თამასუქი. ამის შემდეგ მუშაობა სწრაფი ტემპით წარიმართა. გვირაბი გადიოდა ქუჩის ქვემოთ, კვეთდა ციხის უზარმაზარ კედელს და იმ საკანთან მიდიოდა, სადაც პოლიტიკური პატიმრები იმყოფებოდნენ. ეს სარისკო წამოწყება, რომელსაც დიდი გამოხმაურება ჰქონდა მაშინ, წარმატებით დამთავრდა. ნაწილი პატიმრებისა, განთავისუფლების შემდეგ, საზღვარგარედ წავიდა არალეგალურად, ნაწილი კი ჯამუშთა დახმარებით კვლავ დააპატიმრა ჟანდარმერიამ. ციხიდან განთავისუფლებულ პოლიტპატიმართა შორის იყო ჩვენი სასიქადულო მწერალი ლეო ქიაჩელიც. აღსანიშნავია ისიც, რომ ამ წამოწყების ინიციატორთა და ხელისშემწყობთა ხელში ჩაგდება პოლიციამ ვერ მოახერხა. შეუმჩნეველი დარჩა თვით გ. მაიაშვილიც.

VI

მარგანეცის მრეწველთა შრილობა და გ. მაიაშვილი (ზღანოვიჩი) (1896—1917 წწ.)¹

საქართველო მდიდარია წიაღისეულით. ცარიზმის პირობებში ხალხი ვერ სარგებლობდა ამ სიკეთით. მათ შორის აღ-

¹ ამ პერიოდის შესახებ მასალები და ცნობები ძირითადად მოგვაწოდა ა. მ. დარახველიძის (კრინიციის) ქერიემა ე. ი. ბურჯანაძემ, რისთვისაც დიდ მადლობას მოვასხენებთ: ნაწილი კი ჩვენს მიერ არის ამოკრეფილი იმ შრილებიდან, რომელსაც სიატემატურად სცემდა მარგანეცის მრეწველთა ყრილობა სახელწოდებით «Труды шоропанских марганцепромышленников», იცემოდა ქუთაისში რევოლუციის გამარჯვებამდე. ამ შრომეში ბევრი ძვირფასი ცნობაა დატული გ. მაიაშვილის შესახებ.

სანიშნავია მთელ მსოფლიოში განთქმული ჭიათურის მარგანეცი.

მარგანეცის მრეწველობასთან მჭიდროდაა დაკავშირებული გ. მაიაშვილის (ზდანოვიჩის) ხანგრძლივი მოღვაწეობა. მან, როგორც მარგანეცის მრეწველთა ყრილობის უცვლელმა ხელმძღვანელმა (1896—1917 წწ) მთავრობის ორგანოებს წარუდგინა ასეულობით მოხსენება, შუამდგომლობა თუ განცხადება, სადაც აღწერილია მრეწველობის ვითარება ჭიათურაში (სამწუხაროდ ეს მასალები დღემდე გამოქვეყნებული არ არის და არქივში ინახება).

გ. მაიაშვილს, რომელიც ღრმად იყო დაინტერესებული ქვეყნის სამეურნეო ცხოვრების გაუმჯობესებით, რაც ქართველი ხალხის სოციალური და ეროვნული განთავისუფლების ქვაკუთხედად მიაჩნდა, კარგად ესმოდა ამ მადნის მნიშვნელობა საქართველოს ეკონომიური აღორძინებისათვის.

შავი ქვის მოპოვება ჭათურაში მე-19 ს-ის 70-იან წლებიდან იწყება. ჭიათურის მეწარმეთა ძირითად მასას ქართველი თავადაზნაურობისა და გლეხთა წრიდან გამოსული საქმონები შეადგენდნენ, ხოლო მადნის შემსყიდველი-ექსპორტიორები კი უმთავრესად უცხოელები იყვნენ, ანუ სხვანაირად რომ ვთქვათ, აქ სამრეწველო ბურჟუაზია თითქმის მთლიანად ქართული იყო, ხოლო სავაჭრო უპირატესად უცხოური. ისინი ქართველი მრეწველებისაგან ჩალის ფასად იძენდნენ ურთულეს პირობებში მოპოვებულ მადანს და, შემდეგ კი, სპეკულანტურ ფასებში ჰყიდდნენ და მდიდრდებოდნენ. ამრიგად, უცხოური ფირმები მარგანეცის მადნის ადგილობრივ ბაზარზე თითქმის მონოპოლიურად ბატონობდნენ. რადგანაც მეფის ხაზინა კრედიტს არ იძლეოდა, წვრილი და

საშუალო მრეწველები იძულებულნი ხდებოდნენ მიემართათ: უცხოურ სავაჭრო-საექსპორტო ფირმებისათვის. ისინიც სესხს, თავისთვის მომგებიან პირობებში, უხვად იძლეოდნენ. სავსებით დაკაბალებული ადგილობრივი მრეწველები დამკრედიტებელი უცხოური ფირმების ტყვეობაში ვარდებოდნენ და იძულებულნი ხდებოდნენ მათთვის მეტად შეღავათიან ფასებში ეძლიათ მადანი, რითაც ეს ფირმები დიდ მოგებას ნახულობდნენ. გამკითხავი არავინ იყო. ადგილობრივმა ქართველმა წვრილმა და საშუალო მრეწველებმა არც უცხო ენა იცოდნენ, არც კაპიტალი გააჩნდათ და ვერც უცხოეთის ბაზრებზე არსებულ ფასებში ერკვეოდნენ. ამით კი ისევ და ისევ უცხოეთის ფირმები სარგებლობდნენ და ჯიბეებს ისჯელებდნენ.

კიდევ უფრო უარეს მდგომარეობაში იმყოფებოდნენ მუშები და გლეხები. სამუშაო დღის უმაგალითო ხანგრძლიობა. დაბალი ხელფასი, არაადამიანური საყოფაცხოვრებო პირობები მოსვენებისა და დახარჯული ენერჯიის აღდგენის საშუალებას არ აძლევდა, ფიზიკურად და მორალურად აუძლურებდა და აუარესებდა მათ მდგომარეობას. უცხოეთის ფირმები მარტო იმით არ კმაყოფილდებოდნენ, რომ მათგან მადანს თითქმის მუქთად იძენდნენ. ისინი სხვა მახინციებსაც მიმართავდნენ: შეძენილ მადანში მათ ხშირ შემთხვევაში ნაღდი ფულის ნაცვლად აძლევდნენ თამასუქებს, რომლებსაც შემდეგ როგორც წესი აღარ ანაღდებდნენ. ამას ემატებოდა ისიც, რომ მთებიდან ვირებითა და ცხენებით ვაი-ვაგლახით ჩამოზიდულ მადანს წონით ყიდულობდნენ, ხოლო მწონავები მშრომელებს ურცხვად ატყუებდნენ მადნის წონაში. მადნის მომტანს დამატებით უქვითავდნენ ამ მადნის

ღირებულების 10%-ს ვითომდა ჩამოზიდვისას დაბნეული შადნის საფასურად.

როგორც აღვნიშნეთ, ასეთი მაქინაციების წყალობით შადნის ქართველი მომპოვებლები კოტრდებოდნენ, იქმნებოდა რეალური საფრთხე მარგანეცის მოპოვების მთელი წარმოება უცხოელებს ჩაეგდოთ ხელში.

მუშების უფლებრივი და ეკონომიური მდგომარეობა აუტანელი იყო. მათ მუშაობა უხდებოდათ ჯოჯოხეთურ პირობებში, არ იყო დაწესებული ნორმირებული სამუშაო დრო, მუშები მუშაობას იწყებდნენ გათენებისას და ამთავრებდნენ, როდესაც შებინდებოდა. არ იყო საბინაო პირობები. ვინც ახლო-მახლო სოფლებში ცხოვრობდა, კიდევ შეძლო ღამე სახლში გაეტარებინა, მაგრამ დაქირავებული მუშების უმრავლესობას უხდებოდა ღამე ნესტიან გვირაბებში გაეტარებინათ. უსაფრთხოების ტექნიკის დაცვაზე არავინ ფიქრობდა, ამის გამო ხშირი იყო მუშათა შორის დასახიჩრებანი და უბედური შემთხვევები. მართალია, არსებული წესის თანახმად, დამქირავებელი, ჩვენს შემთხვევაში მრეწველი, ვალდებულია კისრულობდა დასახიჩრებისა და უბედური შემთხვევების დროს, თუ იგი მისი ბრალით მოხდებოდა, ეკისრა მკურნალობის ხარჯები, აენაზღაურებინა მუშისათვის გაცდენილი სამუშაო დრო, ხოლო დასახიჩრებულის სიკვდილის შემთხვევაში უზრუნველყო მისი ოჯახის წევრები პენსიით ან მიეცა მათთვის საკმაო რაოდენობით ერთდროული დახმარება, მაგრამ ასეთი რამ, ცხოვრებაში თითქმის არასოდეს არ ტარდებოდა. მრეწველები სულ სხვადასხვა ზრიკებს მიმართავდნენ პასუხისმგებლობის თავიდან აცილების მიზნით. ისინი მძიმედ დაშავებულს, თუ ეს მოსახერხე-

ბელი იქნებოდა, აგდებდნენ მთიდან, მერე კი განაცხადებდნენ, რომ უბედური შემთხვევა თვითონ მუშის დაუდევრობით მოხდაო, ანდა პოლიციის მოხელეს აძლევდნენ ქრთამს, რომ მას ყალბი აქტი შეედგინა, ვითომ უბედური შემთხვევა მუშას თავისი დაუდევრობით მოუვიდა, ანდა, დაბოლოს, თვითონ დასახიჩრებულს მიუგდებდნენ უმნიშვნელო თანხას, რომ მას ამის შესახებ ხმა არ ამოელო და სასამართლოსთვის არ მიემართა.

სასმელი წყალი რა არის, ხშირად ისიც კი არ ჰქონდათ მუშებს. არ იყო ონკანები, ქები. ხშირად მუშები კვირაობით ვერ იბანდნენ პირს უწყლობის გამო. საბინაო საკითხი, როგორც აღვნიშნეთ, სავსებით მოუწყესრიგებელი იყო. არსებული საცოდავი ქოხმახები ანტისანიტარიისა და ეპიდემიების გავრცელების კერებს წარმოადგენდა. ქიათურის მთელ სამრეწველო რაიონში მხოლოდ ერთი პატარა და აბსოლუტურად მოუწყობელი საავადმყოფო არსებობდა, რომელიც ვერ ასრულებდა თავის დანიშნულებას. ხშირი იყო ეპიდემიები და ამის გამო სიკვდილიანობა მუშათა შორის.

კიდევ უფრო ცუდ მდგომარეობაში იყო სახალხო განათლების საქმე. ქიათურაში არ იყო არცერთი სკოლა. წერაკითხვის მკოდნენი თითზე ჩამოსათვლელი იყო. კულტურისა და განათლების საკითხებს არავითარი ყურადღება არ ექცეოდა. სამაგიეროდ ბევრი იყო ბნელი და ნესტიანი სამიკიტნო, სადაც მუშები უკანასკნელ გროშებს ტოვებდნენ, რომ თუნდაც დროებით ალკოჰოლში ჩაეხრჩოთ თავიანთი ღუხჭირი ცხოვრების მოგონება. ლოთობა და ჩხუბი ჩვეულებრივ მოვლენად ითვლებოდა.

დაახლოებით ასეთი იყო ვითარება ქიათურაში, როდესაც

გ. მაიაშვილი სათავეში ჩაუდგა მარგანეცის მრეწველთა, ყრილობას და პრაქტიკულად შეუდგა იმ სამოქმედო პროგრამის განხორციელებას, რის შესახებაც იგი ლაპარაკობდა ჩვენს მიერ ზემოთ განხილულ წერილში.

მარგანეცის მრეწველთა წარმომადგენლობითი ორგანოს — ყრილობის დაარსების ინიციატორი და ამ საქმის ორგანიზატორი გ. მაიაშვილია. ასეთი ორგანოს შექმნა მიზნად ისახავდა მარგანეცის მრეწველობაში ჩაბმული ეროვნული ბურჟუაზიის გაერთიანებას, რომ მას უკეთ მოეგერიებინა უცხოური კაპიტალის შეშოტევა, მარგანეცის მრეწველობის გაფართოებას, საბადოთა ექსპლოატაციის პირობების გაუმჯობესებას, მთელი სამრეწველო რაიონის კეთილმოწყობასა და მშრომელთა აუტანელი მდგომარეობის, შეძლებისდაგვარად, შემსუბუქებას, მათ მიერ მოპოვებული მადნის მსოფლიო ბაზარზე უშუალოდ, უცხოური სავაჭრო კომპანიების დაუხმარებლად, გატანის ორგანიზაციას. ამ დროისათვის უცხოური სავაჭრო კაპიტალი თითქმის მონოპოლიურად ფლობდა მარგანეცის მადნის ადგილობრივ ბაზარს და მრეწველობაშიც გაბატონებას ჩემულობდა.

ქართველი საზოგადოების მოწინავე წარმომადგენელთა და გ. მაიაშვილის ხანგრძლივი მეცადინეობის შედეგად, რასაც ადგილობრივი მრეწველებიც უჭერდნენ მხარს, 1894 წელს აღიძრა უუამდგომლობა მთაერობის წინაშე ქიათურის მარგანეცის მრეწველთა წარმომადგენლობითი — თვითმმართველი ორგანიზაციის დაარსებისათვის ნებართვის მიცემის

შესასებ¹. 1896 წელს მეფის მთავრობა იძულებული გახდა და-
თანხმებულაყო ამაზე. 1896 წლის 15 აპრილს, საქმის ხანგრძ-
ლივი მომზადების შემდეგ, ქ. ქუთაისში შედგა „შორაპნის მაზ-
რის მარგანეცის მრეწველთა პირველი (დამფუძნებელი) ყრი-
ლობა“. რომელმაც საფუძველი ჩაუყარა მრეწველთა წარმომ-
დგენლობითი ორგანიზაციის დაარსებას. ყრილობის დებუ-
ლების პროექტ² შეადგინა გ. მაიაშვილმა, რომელიც შემდეგ
ყრილობამ. ზოგიერთი ცვლილებებით, ერთხმად მიიღო. დებუ-
ლება დეტალურად განსაზღვრავდა ამ ორგანოს შექმნის მიზ-
ნებსა და ამოცანებს, მისი წევრების უფლებებსა და მოვალე-
ობებს, გამკვებლობის საგნებს და ა. შ. ყრილობა იკრიბებოდა
წელიწადში ერთხელ. მის მუდმივმოქმედ აღმასრულებელ ორ-
განოს წარმოადგენდა ყრილობის საბჭო, რომელიც ირჩეოდა
ფარული კენჭისყრიით 3 წლის ვადით. შესდგებოდა თავმჯდო-
მარის, მოადგილის, ოთხი წევრისა და სამი კანდიდატისაგან
საბჭოს სსდომება იწარმოებოდა თვეში ერთხელ.

მრეწველთა ყრილობის საბჭოს ფუნქციებში შედიოდა
1) მრეწველობისათვის ხელის შეწყობა, 2) ეროვნული კაპიტა-
ლისათვის მხარის დაჭერა, 3) მუნიციპალური საქმიანობა სამ-
რეწველო რაიონში და 4) სამრეწველო აუზში კულტურულ-
საგანმანათლებლო და ყოფაცხოვრებითი მუშაობისათვის ხე-
ლის შეწყობა. ყრილობის მუდმივმოქმედი აღმასრულებელი
ორგანოს—საბჭოს თავმჯდომარედ ერთხმად აირჩიეს გ. მაიაშ-
ვილი, რომელიც 1896—1917 წწ. უცვლელად ირჩეოდა ამ თა-

¹ აღსანიშნავია, რომ ნ. ნიკოლაძეს ჰიათურაში მრეწველობის საქმის სა-
ერთო ხელმძღვანელობისა და ხელშეწყობისათვის უფრო მიზანშეწონილად
მოიხსნა „ჰიათურის საერობო-სამოქალაქო თვითმმართველობის“ დაწესება,
ცდილ. ბლა კიდევ მიეღწია ამისათვის, მაგრამ არაფერი გამოუვიდა.

ნამდებობაზე. მისი მოადგილე იყო ცნობილი მოღვაწე და გამოჩენილი ლიტერატორი კიტა აბაშიძე.

1896 წელს, გ. მაიაშვილის 'შავი-ქვის მრეწველთა საბჭოს თავიჯდომაოდ არჩევასთან დაკავშირებით, ცნობილი მწერალი და აუბლიცისტი გ. წერეთელი გაზ. „კვალის“ (1896 წ. №19) მკითხველებს აუწყებდა: „ქუთაისს... მოხდა ფრიად შესანიშნავი კრება შავი-ქვის მრეწველთა, ამ კრებით აღინიშნა ახალი ხანა სამრეწველო მოძრაობისა... დასავლეთ საქართველოს მწარმოებელნი, სამართლიანი მოსაზრებით, წინ დადგომიან უცხო ქვეყნის კაპიტალისტების წარმომადგენლებს: უკაცრავად ნუ ვიქნებით და რადგან ბუნებრივი სამდიდრე ჩვენი ქვეყნისაა, ჩვენსავე წარმოებაში უნდა დარჩეს, კეთილი ინებეთ და ოქვენს ტყავში დაეტიეთო.

ზდანოვიჩსა ჩინებულად გარკვია ეს საგანი იმ მხრით, რომ შემთხვევილ აქონდას მყიდველს და უცხო ქვეყანაში გამტანს ის უფლება არ უნდა მიენიჭოს, რაც მადნის პატრონს და მის მომუშავეს ეკუთვნისო გ. ზდანოვიჩს აღუძრავს კითხვა სამთო სკოლის დაარსებაზე ქუთაისის გუბერნიაში. მოსაწონი აზრია“.

თვით ეს ფაქტი ნათლად მოწმობს გ. მაიაშვილის უსაზღვრო ავტორიტეტს და იმ ღვაწლის აღიარებას, რომელიც მან დაიძსახურა თავისი თავდადებული და უანგარო მოღვაწეობით. მთელი ამ ხნის მანძილზე არ ყოფილა არც ერთი ქმედითი ღონისძიება, იქნებოდა ეს მუნიციპალური საქმიანობის ხაზით. მშრომელთა მდგომარეობის შემსუბუქებისა თუ კულტურულ-საგანმანათლებლო საქმიანობის ხაზით, რომ მის აღძვრაში თუ ცხოვრებაში გატარებისათვის ყველაზე აქტიური მონაწილეობა გ. მაიაშვილს არ მიეღო.

მრეწველთა ყრილობამ და მისმა საბჭომ გ. მაიაშვილის ხელმძღვანელობით ფართოდ გაშალა მუშაობა მუშათა მდგომარეობის შესამსუბუქებლად, სახალხო განათლების გასავრცელებლად. იგი დიდ ყურადღებას აქცევდა სამრეწველო ექსპლოატაციის საკითხის მოწესრიგებას, ახალი გზების გაყვანას, ძველების გაუმჯობესებას, ყვირილაზე ხიდების აგებას, დიდ ზრუნვას იჩენდა საბაგირო გზების გაყვანაზე. მისი ინიციატივით დაიწყო ლა გადაიჭრა საწარმოო პროცესებისა და მადნის გადანიღვაში ტექნიკური სიახლეების დანერგვის რიგი პრობლემები, გაატარა ღონისძიებები მადნის უცხოელ შემსყიდველ-ექსპორტიორთა მოქმედების შესაზღუდავად და მარგანეცის მრეწველობაში უცხოური კაპიტალის მომძლავრების წინააღმდეგ. რაც განსაკუთრებით შესამჩნევი გახდა ჰიათურაშა რკინიგზის შტოს შეყვანის შემდეგ. ბევრი რამ გაკეთდა მისი ხელმძღვანელობით მადნის გადანიღვის საშუალებათა ევროპულად მოწყობისა“ და მარგანეცის მრეწველობისათვის ეროვნული სულის ჩადგმისათვის. ყველგან და ყველადღერში იგრძნობოდა გ. მაიაშვილის, როგორც გამჭრიახი და ნიჭიერი ხელმძღვანელი-ორგანიზატორის, როლი.

აქვე გვინდა შევნიშნოთ, რომ მრეწველთა ყრილობა ძირითადად საქართველოს ეროვნული ბურჟუაზიის, მისი ინტერესების დამცველი ორგანო იყო, მაგრამ მან თუ მაინც ესოდენ ბევრი რამ გააკეთა, როგორც ამას ქვემოთ დავინახავთ. ეს უპირველეს ყოვლინა, გ. მაიაშვილის (ზდანოვიჩის) და მის ირგვლივ შემოკრებილი პროგრესული მამულიშვილების უდიდესი დამსახურებაა, რომლებსაც არა ერთი და ორი წინააღმდეგობის გადალახვა უხდებოდათ, რომ მშრომელ-

თავის, და საერთოდ, ეროვნული საქმისათვის, სასარგებლო და მნიშვნელოვანი ღონისძიებანი გაეტარებინათ ცხოვრებაში.

როდესაც გ. მაიაშვილი მარგანეცის მრეწველთა საბჭოს თავმჯდომარედ არჩევას დათანხმდა, იგი ვარაუდობდა, რომ შეიძლებოდა ამ ადგილის გამოყენება ხალხის სასარგებლოდ და უცხოელ კაპიტალისტთა წინააღმდეგ... თავის მხრივ ისინიც, რომლებიც მას ამ თანამდებობაზე ირჩევდნენ, დარწმუნებული იყვნენ, რომ გ. მაიაშვილი თავის მაღალ ადამიანურ ღირსებებს, სისპეტაკესა და ეკონომიური საკითხების ცოდნას მთლიანად ამ ეროვნულ საქმეს მოახმარდა და როდესაც გ. მაიაშვილი ამ თანამდებობას იკავებდა, მას არ ამოძრავებდა პირადი გამდიდრება. მისი მიზანი მხოლოდ ის იყო, რომ ეკონომიურად ძლიერი ეს უწყება გამოეყენებინა საერთოეროვნული ინტერესებისათვის და უცხოელი კაპიტალისტების განსაღვენად. შეძლებისდაგვარად მან ერთიც შეძლო და მეორეც. გ. მაიაშვილმა მრეწველთა საბჭო აქცია ფართო მნიშვნელობის კულტურულ დაწესებულებად, რომელიც დიდ დახმარებას უწევდა როგორც ცალკეულ პირებს სწავლა-განათლების მიღების საქმეში (სტიპენდიების დანიშვნით), ასევე ქართველთა შორის წერა-კითხვის გამავრცელებელ საზოგადოებას (რომელიც ქუთაისის განყოფილების თავმჯდომარეც თვითონ იყო), მთელ რიგ ღონისძიებათა დაფინანსებით. უდავოა ისიც, რომ მან თავის გარშემო შემოიკრიბა არა საქმოსნები, არამედ ქართველი პატრიოტი მოღვაწეები და ინტელიგენციის წარმომადგენლები, მწერლები და ჟურნალისტები, რის გამოც ამ თავისთავად სულ სხვა დანიშნულების დაწესებულებაში ფართო კულტურული და ლიტერატურული მუშაობაც მიმდინარეობდა.

თეატრმცოდნე ს. გერსამია იგონებს: „შავი ქვის მრეწველ-

თა საბჭო მან გადააქცია ქართველ პოლიტიკურ და საზოგადო მოღვაწეთა საკრებულოდ... აქვე ხდებოდა შეკრებები სხვადასხვა საკითხების განსახორციელებლად სათათბიროდ მოწვეულ პირთა. აქვე წყდებოდა სხვადასხვა კულტურულ-საგანმანათლებლო ორგანიზაციების გამგეობათა სხდომები და სხვ. არცერთი საზოგადო საქმე ოფიციალურად არ აღიძვრებოდა ისე, რომ გ. ზდანოვიჩს არ შეკითხოდნენ. მისი რჩევა არ მოესმინათ“.

გ. მაიაშვილის ინიციატივით მრეწველთა ყრილობას საბჭოსთან დაარსდა სტატ-ბიურო, რომელსაც ევალეზოდა ცნობების შეკრება-გამოქვეყნება ჩვენში და საზღვარგარეთ მარგანეცზე მოთხოვნილებისა და ფასეულობის შესახებ. მან სპეციალურად შეისწავლა ბრაზილიისა და კუბის მარგანეცის მრეწველობის მდგომარეობა, შეადგინა მეტად საინტერესო მოხსენება, რომელიც შემდეგ ცალკე წიგნადაც გამოიცა. ინგლისურ ენიდან ათარგმნინა საყურადღებო ნაშრომი ინდოეთის შავი ქვის მრეწველობის შესახებ, ზრუნავდა მდინარე ყვირილის გაბინძურებისაგან დასაცავად, რომ ახლო-მახლო სოფლებს ჰქონოდათ სუფთა წყალი.

საყურადღებოა გ. მაიაშვილის მუნიციპალური საქმიანობა. იგი დიდ ყურადღებას აქცევდა სამრეწველო რაიონის ცენტრის — ჭიათურის კეთილმოწყობას. მისი დაუცხრომელი ზრუნვის შედეგად, წინათ მიყრუებულნი სოფელი ჭიათურა თანდათანობით სამრეწველო ქალაქის სახეს ღებულობდა. ჩაისახა და განეთარდა მრეწველობის დამხმარე სახელოსნოები, გაიხსნა სავაჭრო და საკრედიტო დაწესებულებები. მადნის შესანახი ფარდულები, ბაქნები, საცხოვრებელი სახლები და სხვ. მარგანეცის მრეწველთა III ყრილობაზე მან

მკაცრად გაილაშქრა იმათ წინააღმდეგ, რომლებიც მიზანშეუწონლად მიიჩნევდნენ ჭიათურის ქალაქის ტიპის დასახლებად გარდაქმნას და მისთვის ჩვეული მგზნებარებით დაასაბუთა ამისი აუცილებლობა, იქ თვითმმართველობის დაწესების აუცილებლობა. მრეწველთა ყრილობის სახსრების ნაწილს იგი ახმარდა ჭიათურაში გზების, ქუჩების, ხიდების, სასწავლებლების, ბიბლიოთეკის, სამკითხველოს, მუშათა თეატრის, რაფფასიანი სასადილოს, აბანოს, წყალსადეხის, საკანალიზაციო სისტემის და სხვათა მშენებლობას. აგებული იქნა 150—250 ცხენის ძალიანი ელექტროსადგური. 1907 წლიდან ჭიათურის მოსახლეობა ელექტროგანათებით სარგებლობდა. გაყვანილი იქნა სატელეფონო ხაზები. 1906 წელს ჭიათურაში აიგო მუშათა თეატრის ახალი შენობა, აგრეთვე მრავალი კაპიტალური ნაგებობა. მათ შორის აღსანიშნავია საქალაქო სასწავლებლის შენობა, სარემონტო სახელოსნო, ტექნიკური ბიურო და სხვ. დაარსდა სახელმწიფო ბანკის განყოფილება. გაიხსნა მომრიგებელი სასამართლო, მოეწყო სახანძრო რაზმი, ხელოვნური ყინულის დასამზადებელი სახელოსნო და სხვა მრავალი.

მუშათა შრომისა და ყოფაცხოვრების გასაუმჯობესებლად გ. მაიაშვილის ინიციატივითა და უშუალო ხელმძღვანელობით მრეწველთა ყრილობისა და მისი საბჭოს მიერ საგრძნობი მუშაობა ჩატარდა. იგი ყოველნაირად ცდილობდა გამოენახა სახსრები მუშათა სამედიცინო მომსახურებისათვის, სანიტარული დაწესებულებების მშენებლობისათვის, მუშათა დაზღვევის მოსაწესრიგებლად.

როგორც აღვნიშნეთ, ჭიათურაში მშრომელთა შრომისა და ყოფაცხოვრების პირობები თავიდანვე აუტანელი იყო.

1900 წელს მრეწველთა ყრილობამ სპეციალურად განიხილა მუშათა ყოფაცხოვრების გაუმჯობესებისა და დამზღვევის საზოგადოების დაარსების საკითხი. გადაწყდა, რომ ხელფასი დაერიგებინათ შაბათობით, ხოლო კვირა დასვენების დღედ ცხადდებოდა (აქამდე მუშებს ხელფასს კვირა დღეს აძლევდნენ ხოლმე, რითაც მათი დასვენების დღე საგრძნობლად იზღუდებოდა). ქიათურაში აიგო შესანიშნავი აბანო, სამრეცხაო მექანიკური საშრობით. გადაწყდა დაწესებულ იყო მაღაროებში იაფფასიანი სასაღილოები. შემოღებული იქნა მუშათა დაზღვევა. მართალია, იგი მხოლოდ იმ მუშებს შეეხებოდა, რომლებიც უშუალოდ მაღაროებში მუშაობდნენ, ე. წ. სამთო მუშები, მაგრამ ეს მაინც საგრძნობი წინგადადგმული ნაბიჯი იყო. სამთო მუშათა დაზღვევის ფონდი იქმნებოდა ნახევარკაპიტიანი საფუთო გამოსაღებისაგან. იზრდებოდა მეწარმის პასუხისმგებლობა და უბედური შემთხვევის დროს დაშვებულ მუშაზე გასაცემი თანხის რაოდენობა. არსებული წესის თანახმად უბედური შემთხვევისას მუშას გასამრჯელო ეძლეოდა თუ ის 3 დღეზე მეტი ხნით დაკარგავდა შრომის უნარს. მეწარმე მხოლოდ მაშინ თავისუფლდებოდა პასუხისმგებლობისაგან, თუ დაამტკიცებდა, რომ უბედური შემთხვევა განზრახ ან მუშის უხეში დაუდევრობით მოხდა. მუშის სიკვდილის შემთხვევაში მეწარმეს უნდა გადაეხადა დასაფლავების ხარჯები 15-30 მანეთის რაოდენობით. ეს დამოკიდებული იყო გარდაცვლილის ასაკზე; ყოველწლიურად უნდა მიეცა პენსია გარდაცვლილის ოჯახისათვის ხელფასის 2/3-ის რაოდენობით. დასახიჩრების შემთხვევაში ვალდებული იყო აღმოეჩინა მისთვის უსასყიდლოდ საექიმო დახმარება ან აენაზღაურებინა მკურნალობის ხარჯები. მკურ-

ნალობის პერიოდში უნდა მიეცა მუშისათვის მისი საშუალო ხელფასის 50%-ტი. მუშის მიერ შრომის უნარის სრულად დაკარგვის შემთხვევაში, მას უნდა მისცემოდა პენსია, ხელფასის 2/3-ის რაოდენობით.

პროფესიონალი მუშის საშუალო წლიური ხელფასი 260 მანეთით განისაზღვრებოდა¹. ცხადია, ბევრი მრეწველი არ ასრულებდა ამ წესს და ათასგვარ მახინჯატიებს მიმართავდა. ამის გამო იყო, რომ მრეწველთა VIII ყრილობაზე გ. მაიაშვილი თავის მოხსენებაში პენსიების შესახებ აღნიშნავდა: ბევრი მრეწველი სრულიად არ ასრულებს მე-6 ყრილობის გადაწყვეტილებას. მრეწველები დაზარალებულ მუშებს ქრთამს თხოვენ საბჭოში დაზღვევის თანხის 9/10 ნაწილის მისაღებად წარსადგენი ცნობების გაცემისთვისო. გ. მაიაშვილის წინადადებით ამ ყრილობამ მიიღო ახალი გადაწყვეტილება, რომლის თანახმადაც პენსია უნდა გაეცა მრეწველთა საბჭოს იმ მეწარმეთა ხარჯზე, რომელთა საბადოშიც უბედური შემთხვევა მოხდებოდა².

მუშათა ყოფაცხოვრების გაუმჯობესების საკითხი განიხილა მე-5 ყრილობამაც. საამისოდ გამოიყო სპეციალური კომისია. მაღაროებში აშენდა ქვითკირის სახლები და ხის ყაზარმები უბინაო მუშებისათვის. 1905 წელს ჭიათურაში, ხოლო 1906 წელს ჭიქოურში გაიხსნა იაფფასიანი სასადილო მუშებისათვის.

1897 წელს ჭიათურაში გაიხსნა საავადმყოფოს ტიპის

¹ Труды VI съезда Шоропанских марганценпромышленников, Кутаиси, 1904 г., стр. 14—16.

² Труды... VIII съезда, 1906., стр. 45.

საექიმო პუნქტი 6 საწოლითა და პატარა აფთიაქით. მ.შ.ნ. მას მხოლოდ ერთი ექიმი ემსახურებოდა. შემდეგში მდგომარეობა კიდევ უფრო გაუმჯობესდა, აიგო ახალი საავადმყოფო 80-100 საწოლით. მას 26 თანამშრომელი ემსახურებოდა, მათ შორის ორი ექიმი და 5 ფერშალი. ავადმყოფებს ისეთი კვება ჰქონდათ, როგორც იმდროინდელ საქართველოში არცერთ საავადმყოფოში არ ყოფილა. ჩამოყალიბდა სამედიცინო-სანიტარული განყოფილება, სანიტარულ-ვეტერინარული განყოფილება და სხვ. სამრეწველო რაიონის ზოგიერთ სოფელშიც შეიქმნა საექიმო პუნქტები. მათ ევალეობოდათ მაღალ-მთიან ადგილებში და მაღაროებში პირველადი საექიმო დახმარების აღმოჩენა.

სოფელ ადგილებში, სადაც უწყლობას განიცდიდნენ, გაყვნილ იქნა წყალსადენები. ტარდებოდა ღონისძიებები მაღაროების, სადაც ეს საჭირო იყო, წყაროს წყლით მოსამარაგებლად.

როგორც აღვნიშნეთ, მუშები მოპოვებულ მადანს წონით აბარებდნენ. ამ დროს მათ ძალიან ხშირად ატყუებდნენ მწონავები. გ. მაიაშვილის ინიციატივით შეიქმნა მუდმივი საკონტროლო კომისია, რითაც მრეწველებსა და უცხოეთის ფირმის წარმომადგენლებს საგრძნობლად შეეზღუდათ მუშების წონაში მოტყუების შესაძლებლობა.

იყო განზრახვა მაღაროებში უფასო ქასადილოების გახსნის შესახებ, მაგრამ ამ კარგი ღონისძიების გატარებას პირველი მსოფლიო ომის დაწყებამ შეუშალა ხელი.

არანაკლებ მნიშვნელოვანი ღონისძიებები იქნა გატარებული გ. მაიაშვილის თაოსნობითა და თავკაცობით სახალ-

ხო განათლებისა და კულტურულ-საგან-
მანათლებლო საქმიანობის ხაზით.

უპირველეს ყოვლისა, მრეწველთა ყრილობამ და მისმა
საბჭომ იზრუნეს მარგანეცის მრეწველობისათვის სამთო-ტექ-
ნიკური კადრების მოსამზადებლად, სამრეწველო რაიონში
განათლების გასავრცელებლად. გაიხსნა სახალხო სკოლები
სოფელ მღვიმეში, ზედა-არგანში და შუქრეთში. ჭიათურაში
გაიხსნა ორწლიანი სამთო სასწავლებელი. დიდი ყურადღება
ექცეოდა ჭიათურის სასულიერო სამრეწველო სკოლას. მის
შესანახად ყოველწლიურად საბჭო 600 მანეთს ხარჯავდა.
1897 წლიდან ჭიათურასა და ქუთაისში (ყრილობის საბჭოს
წინააღმდეგობაში) გაიხსნა საერთო სარგებლობის სამკითხველო.
ჭიათურაშივე დაარსდა საკმაოდ მოზრდილი ბიბლიოთეკა.
საბჭო დიდ მატერიალურ დახმარებას უწევდა ქართველთა
შორის-წერა-კითხვის გამავრცელებელი საზოგადოების ჭია-
თურის განყოფილებას. აშენდა საკვირაო სკოლა, სახალხო
სამკითხველო და სახალხო თეატრი. ძალე გაფართოვდა ჭია-
თურის დაწყებითი სასწავლებელი და სამკითხველო. ახალი
სამკითხველო დაარსებული იქნა აგრეთვე სოფ. ჭიქოურში.
1904 წელს შეიქმნა „ჭიათურის საზოგადოებრივი კრება“.
რომელიც მიზნად ისახავდა მუსიკისა და დრამატული ხელოვნების
მოყვარულთა გაერთიანებას.

1911-1914 წწ. ჭიათურაში არსებობდა ჭიათურის საქალა-
ქო სასწავლებელი, ჭიათურის ვაჟთა უმაღლესი დაწყებითი
სასწავლებელი, ჭიათურის დაწყებითი სასწავლებელი, ქალთა
უმაღლესი დაწყებითი სასწავლებელი, ჭიათურის ქალთა და-
ბალი დაწყებითი სასწავლებელი, ჭიათურის სამთო-ტექნიკუ-
რი განყოფილება და სხვ.

გ. მაიაშვილის ინიციატივით მრეწველთა საბჭო დიდ ყურადღებას აქცევდა მოსწავლეთა და სტუდენტთა სტიპენდიებით უზრუნველყოფის საკითხს. 1900 წელს მრეწველთა III ყრილობის გადაწყვეტილებით სამთო სკოლებში დაწესებული იქნა სტიპენდია წელიწადში 300-500 მანეთის ოდენობით, ხოლო უმაღლესი სამთო სასწავლებლის სტუდენტთათვის სტიპენდიის რაოდენობა განისაზღვრა წლიურად 800 მანეთის ოდენობით. 1905-1906 წწ. საბჭო სტიპენდიების ხაზით იხდიდა 30 000 მანეთს წლიურად, სტიპენდიანტთა რიცხვი 165 — 185 კაცს აღწევდა. სტიპენდიები მოსწავლეებს ენიშნებოდათ მათი ნიჭისა და აკადემიური მოსწრების მიხედვით. დაბალი ტიპის სასწავლებლებში სტიპენდიანტთა რიცხვი შეადგენდა 78, საშუალო ტიპის სასწავლებლებში — 65-ს, ხოლო უმაღლესში — 28-ს. ისინი სწავლობდნენ დაწყებით საშუალო და უმაღლეს სასწავლებლებში როგორც ჩვენში, ასევე რუსეთსა და უცხოეთში. როგორც ვხედავთ საბჭოს დახმარებას მრავალი მოსწავლე ღებულობდა. ამ სტიპენდიებით მრავალი მოსწავლე აღიზარდა როგორც ადგილობრივ, ისე რუსეთში და საზღვარგარეთ. ბევრი მათგანი შემდგომში მეცნიერების, ხელოვნებისა და მრეწველობის გამოჩენილი მუშაკი გახდა. მათ შორის აღსანიშნავია: პროფ. ს. ყიფშიძე, პროფ. ნიკოლაიშვილი, ინჟინრები — ხუნდაძე, გრ. წულუკიძე, ჩხეიძე, კომპოზიტორი კ. ფოცხვერაშვილი, მხატვარი დ. კაკაბაძე. მწერალი ა. ჭუმბაძე, და სხვ. მრავალი.

საკითხთა ასეთი უბრალო ჩამოთვლაც კი ნათლად გვიჩვენებს, თუ რაოდენ ნაყოფიერი და შინაარსიანი იყო გ. მაიაშვილის მოღვაწეობის ჭიათურის პერიოდი.

ცხადია ასეთი საქმიანობა არ მოსწონდათ ცარიზმის მოხე-

ლევებსა და ბევრ არაქართველ სპეციალისტს, მაგრამ სამაგიეროდ გამოჩენილი ქართველი მოღვაწენი მხარს უჭერდნენ და ეხმარებოდნენ გ. მაიაშვილს ამ კეთილშობილურ საქმიანობაში.

გ. მაიაშვილის დამსახურებაა ისიც, რომ უცხოეთის ფირმებმა ვერ შეძლეს ხელში ჩაეგდოთ და გაბატონებულიყვნენ მარგანეცის მრეწველობაში.

გ. მაიაშვილთან საბჭოში ხშირად იკრიბებოდნენ ცნობილი საზოგადო მოღვაწენი და განიხილავდნენ ერის საჭირობოტო საკითხებს, მსჯელობდნენ ცარიზმის კოლონიურ პოლიტიკაზე და მის მძიმე შედეგებზე ქართველი ხალხისათვის, სახავდნენ ღონისძიებებს თუ როგორ დაეღწიათ თავი ასეთი მდგომარეობისაგან და სხვ. ამას დიდი მნიშვნელობა ჰქონდა საქართველოში ეროვნულ-განმათავისუფლებელი მოძრაობის შემდგომი გაღრმავებისა და განვითარებისათვის. გ. მაიაშვილი ყოველთვის ცხოველ მონაწილეობას ღებულობდა ასეთ განხილვებში, მსჯელობებში, გამართულ დისკუსიებში. იგი მისთვის ჩვეულა პირდაპირობითა და გამბედაობით იბრძოდა იდეისათვის, არსებული სოციალურ-პოლიტიკური უკუღმართობათა წინააღმდეგ.

დ. კლდიაშვილი თავის მემუარებში (1932 წ.) იგონებს: „ქალაქის გამგეობაში სამი წლის სამსახურის შემდეგ გადავედი შავი-ქვის მრეწველთა საბჭოში... საბჭოში ყოფნა უკვე იმით იყო კარგი, რომ საბჭოს შემადგენლობა იყო პირველხარისხოვანი ჩვენი საზოგადო მოღვაწეებისა. თავმჯდომარედ იყო გიორგი ზდანოვიჩი, მის მოადგილედ — კიტა აბაშიძე, ზდანოვიჩის ავტორიტეტი აქ უსაზღვრო იყო... მაგრამ თავდაპირველი იყო და ყველას სადად და სრული კეთილგანწყობილებით ეპყრობოდა... ოცნებობდა ჭიათურა გადაექცია სამა-

გალითო საჩვენებელ პუნქტად... მისი შუყაითობით იმ მოგებრს თანხიდან, რომელიც საბჭოს ქონდა, მოწყობილი იყო სასწავლებლები, მშვენიერი საავადმყოფოები, საფერშლო პუნქტები ოცდახუთი ათასი მანეთი ყოველწლიურად გადადებული იყო მოსწავლეთა სტიპენდიებისათვის... მშვენიერი სანახავი იყო იგი მუშების წარმომადგენელთა შორის, მისი მუსაიფი მათთან, მუსაიფი გულწრფელი და მისთვის მზრუნველი ადამიანის“...

გ. მაიაშვილს ბევრი მოწინააღმდეგე ჰყავდა, ბევრი ედგა ოპოზიციაში, ცდილობდნენ სახელი გაეტეხათ მისთვის და დაეცათ მისი ავტორიტეტი, რომ ხელში ჩაეგდოთ საქართველოს მარგანეცის მრეწველობის სადავეები და გამოეყენებინათ იგი ბურჟუაზიის ინტერესებისათვის მშრომელთა საწინააღმდეგოდ. მაგრამ ასეთი ოპოზიცია ყოველთვის მარცხით მთავრდებოდა, რადგანაც ხალხმა კარგად იცოდა თუ ვინ იყო გ. მაიაშვილი (ზდანოვიჩი) და ვისი ინტერესებისათვის იღწვოდა იგი. შემთხვევითი არ არის, რომ მას 1896-1917 წწ. უცვლელად ირჩევდნენ მრეწველთა ყრილობის საბჭოს თავმჯდომარედ.

ცნობილია დავა გ. მაიაშვილსა და ნ. ნიკოლაძეს შორის, მაგრამ აქვე გვინდა შევნიშნოთ, რომ იგი არ ატარებდა ღრმად პრინციპიალურ და იდეურ ხასიათს. საქმე შეეხებოდა საფუთო გამოსაღებს ნახევარი კაპიკის ოდენობით. ნ. ნიკოლაძე, რომელიც მაშინ ფოთის ქალაქის თავი იყო, ფოთის მშენებარე ნავსადგურის ინტერესებიდან გამომდინარე, მოითხოვდა, რომ ყოველი ფუთი მარგანეცის გაზიდვაზე მარგანეცის მრეწველთა ყრილობას გაეღო ნახევარი კაპიკი, რომელიც ამ მშენებლობის საქმეს უნდა მოხმარებოდა. გ. მაიაშვილი ამის წინააღმდეგ იყო იმ მოტივით, რომ ფოთის ნავსადგურის მშენებლობა ისედაც საკმარისად იყო დაფინანსებული, ხოლო ასეთი გამოსაღე-

.ბის დაწესება მძიმე ტვირთად დააწვებოდა მრეწველთა ყრილობის ბიუჯეტს, რომელიც ძირითადად ჩვენს მიერ ზემოდაღ: ანიშნულ ღონისძიებებს ხმარდებოდა.

ეს დავა საკმაოდ დიდხანს გაგრძელდა, ბევრი იწერებოდა შაშინ პრესაში ამის შესახებ. ამ საკითხს მიეძღვნა ცალკეული ზროშურებიც კი, იმართებოდა კამათი, რაც ბოლოს მაინც უშედეგოდ დამთავრდა.



დაბოლოს გვიჩნდა ზოგი რამ აღვნიშნოთ გ. მაიაშვილი-ზდანოვიჩის პირადი ცხოვრებიდან¹. მან თავიდანვე გადაჭრით უარყო პირადი ოჯახური ცხოვრება. ცოლ-შვილი არ ჰყოლია. მიუხედავად იმისა, რომ მეგობრები დაუინებით ურჩევდნენ გადაედგა ასეთი ნაბაჯი. როგორც გ. მაიაშვილთან ახლო ურთიერთობაში მყოფი ერთ-ერთი პიროვნება იგონებს, თვით გ. მაიაშვილის გადმოცემით, ახალგაზრდობაში, როდესაც იგი პეტერბურგში სწავლობდა და რევოლუციურ საქმიანობას ეწეოდა, მას შეჰყვარებია ერთი რიოლოჟიკონიერი ქალიშვილი. ცოლად შერთვასაც უპირებდა თურმე, მაგრამ დაპატიმრებას შეუშლია ხელი. შემდეგ ის ქალიშვილი სხვას გაჰყოლია ცოლად. ამას გ. მაიაშვილზე წარუშლელი შთაბეჭდილება მოუხდენია. მეგობრები გ. მაიაშვილის უკოლობას ამ ფაქტით ხსნიდნენ.

საერთოდ გ. მაიაშვილს არ უყვარდა თავის თავზე წერა და ლაპარაკი, თუმცა საწერიც და სალაპარაკოც ძალიან ბევრი

¹ ცხოვრები გ. მაიაშვილის პირადი ცხოვრებისა და მისი პიროვნების ზოგიერთი მხარის შესახებ მოგაწოდა პედაგოგმა ე. დ. ნაზარაშვილმა, რისთვისაც მადლობას მოვასხენებთ.

ჰქონდა. სძულდა გარეგნული ბრწყინვალეობა და თეატრალობა. იყო უბრალო და მეტად გულისხმიერი, ბევრს ეხმარებოდა, განსაკუთრებით ახალგაზრდობას. მის პირად არქივში დაცული მასალებიც ადასტურებენ ამას.

იყო გულუხვი და სტუმართმოყვარე მასპინძელი, თუმცა პირადად ალკოჰოლიან სასმელებს არ ეტანებოდა. თავის მხრივაც ხშირად დადიოდა სტუმრად. განსაკუთრებით უყვარდა დ. ნაზარაშვილის, კ. ნიკოლაძის, ნ. ფურცელაძის ოჯახებში სიარული, სადაც ხშირად იკრიბებოდა მოწინავე ინტელიგენციის წარმომადგენლები და მსჯელობდნენ საზოგადოებრივ საკითხებზე, ლიტერატურაზე, ხელოვნებაზე და სხვ.

გ. მაიაშვილი იყო შესანიშნავი მოსაუბრე, კარგი ორატორი, მისი სიტყვები გამოირჩეოდა სიმწყობრითა და ლოგიკურობით, ტემპერამენტითა და მგზნებარებით. ჰქონდა განსაცვიფრებელი მეხსიერება.

შესანიშნავი მოგონება დაგვიტოვა გ. მაიაშვილზე გამოჩენილმა რევოლუციონერმა ალ. წულუკიძემ, რომელიც 1907 წელს დაესწრო შავიქვის მრეწველთა მე-5 ყრილობას. „...დაუყურებელი ძირს მღელვარე კრებას, მის წინაშე მომქერმეტყველე თავმჯდომარეს და უნებურად მომაგონდა ის დრო, როცა გაფაციცებით დავეძებდი მაიაშვილს და როცა პირველად ახლად დაბრუნებული გიორგი შორი-ახლო მოლაპარაკე დავინახე. რაღაც არაჩვეულებრივი სიამოვნება ვიგრძენი. აჰ, სადაც ქალაქუნობისა და სიკვდილის მეტს ვერას ვხვდებოდით... ვინილე ადამიანი, რომელიც ეს არის ბრძოლის ველიდან დაბრუნებულა, სიმართლისათვის პატიოსნად მღელვარებდა, მოძმეს ამხნევებდა და თავგამოდებით სახიფათო ბილიკზე შეუფერხებლად მიაბიჯებდა. ენერგიული სახე, მოუდრეკელი ქედი,

გაბედული აზრი, ყველაფერი თავში ამერია. ვიდექი და ვუმ-
ზერდი სიამოვნებით, ვუმზერდი დიდხანს და ყოველი წამი
ჩემთვის გამამხნეებელი, გამაძლიერებელი რამ იყო“.

ბინაჯე გ. მაიაშვილს ჰქონდა მდიდარი ბიბლიოთეკა, მათ
შორის გამოირჩეოდა კ. მარქსის, ფ. ენგელსის, გ. პლენანო-
ვისა და სხვათა თხზულებანი. მარქსისადმი ინტერესი მასში დი-
დი იყო. იერ კიდევ ვადასახლებაში მყოფი ხშირად მიმართავ-
და მეგობრებს წერილობით გაეგზავნათ მისთვის მარქსის
თხზულებანი. ამ მხრივ ყურადღებას იპყრობს გ. მაიაშვილის
წერილი ცნობილ რუსი მწერლის, ვ. კოროლენკოსადმი
(1989 წ.) რომელშიც თხოვდა გაეგზავნა მისთვის კ. მარქსის
ნაწერები, რადგანაც მათ ქ. ტომსკში ვერ შოულობდა.

გ. მაიაშვილმა არ იცოდა რა იყო პირადი ცხოვრება და
პირადი ბედნიერება. მან ყველაფერი, რაც კი გააჩნდა, ხალხის
ნათელი მომავლისათვის თავდადებულ ბრძოლას შესწირა. მის-
თვის უცხო იყო ყოველგვარი ეგოიზმი, ძალიან აფასებდა ადამი-
ანში ალტრუიზმის გრძნობას. მთელი მისი შინაარსიანი სი-
ცოცხლე ამის ყველაზე უტყუარი დადასტურება იყო. იგი არა-
სოდეს ყოფილა დაინტერესებული მომხვეჭელობითა და პი-
რადი ქონების შექენით. რაც კი ქონება გააჩნდა, ყოველივე
ხალხის სამსახურს მოახმარა.

გ. მაიაშვილი დიდი ალტრუიზმით მიეგება თებერვლის რევო-
ლუციის გამარჯვებას 1917 წელს. ქუთაისში ეწყობოდა მოს-
წავლე ახალგაზრდობისა და მშრომელთა გრანდიოზული დე-
მონსტრაციები. დემონსტრანტები, რომელთაც კარგად იცო-
დნენ გ. მაიაშვილის რევოლუციური წარსული და მისი უან-
გარო თავდადება ხალხისათვის, კოლონებად გაემართნენ იმ
სახლისაკენ, რომელშიც ცნობილი რევოლუციონერი გ. მაია-

შვილი-ზდანოვიჩი ცხოვრობდა. ისინი მიდიოდნენ დროშებითა და რევოლუციური სიმღერებით, რომ მიელოცათ მისთვის სანატრელი და ბედნიერი დღის დადგომა.

გ. მაიაშვილი ამ დროს მძიმე ავადმყოფი იყო და ლოგინად იყო ჩავარდნილი. იგი, მიუხედავად ავადმყოფობისა, წამოდგა, ფანჯარასთან მივიდა და მხურვალედ მიესალმა მოზეიმე ხალხს. თვალებზე სიხარულის ცრემლები უკიაფობდა.

ხანგრძლივი და მძიმე ავადმყოფობის შემდეგ 1917 წლის 30 ივლისს (ძვ. სტ.), 62 წლის ასაკში, გარდაიცვალა გამოჩენილი რევოლუციონერი და საზოგადო მოღვაწე, ცნობილი ჰუმბლიცისტი და მწერალი გ. მაიაშვილი-ზდანოვიჩი.

მისი გარდაცვალების ამბავი ელვის სისწრაფით მოედო მთელ ქვეყანას. იბეჭდებოდა ნეკროლოგები, სტატიები, მოგონებები. თითქმის ყველა მიმართულების ჟურნალ-გაზეთებში. როგორც ადგილობრივ, ასევე სატანტო ქალაქში. უწყვეტ ნაკადით მოდიოდა კერძო პირებისა და ორგანიზაციების დეპეშები. ყველა ღრმა მწუხარებას გამოთქვამდა ამ შესანიშნავი ადამიანის გარდაცვალების გამო.

გაზეთები მას ახასიათებდნენ როგორც უშიშარ რევოლუციონერს, რომელმაც მთელი თავისი ტალანტი, გონება და რკინისებური ნებისყოფა საკაცობრიო იდეალებს, ხალხის კეთილდღეობისთვის ბრძოლის კეთილშობილურ საქმეს შესწირა. ადარებდნენ ხალხისათვის ტანჯულ გმირს, უწოდებდნენ ხალხისათვის წამებულს, რომელმაც მთელი პირადი ცხოვრება მათ ბედნიერებას მოახმარა. ახასიათებდნენ მის ორგანიზატორულ ტალანტს, მის როლს რუსეთში რევოლუციური ორგანიზაციების შექმნის საქმეში. იგონებდნენ მის გმირობასა და შეუღრეკელობას, მის დაუვიწყარ სიტყვას „50-ის

პროცესზე“, აღინიშნა მისი, როგორც ქართველი ხალხის ღირსეული შვილის დაუცხრომელი ბრძოლა ცარიზმისაგან განთავისუფლების საქმეში, მისი მაღალი პუბლიცისტური ნიჭი და ისიც, რომ გ. მათაშვილი-ზდანოვიჩის ეკონომიური პროგრამა რომელსაც იგი ასე დაუცხრომლად ატარებდა ცხოვრებაში შედგენილი იყო მარქსის ღიდი მოძღვრების გავლენით.

გ. მათაშვილი დაკრძალეს 1917 წლის 9 აგვისტოს (ძვ. სტ.) არქელის გორაზე ბაგრატიის ტაძრის გალავანში. შემდეგ ქუთაისში ცნობილ საზოგადო მოღვაწეთა პანთეონის გახსნასთან დაკავშირებით, მისი ნეშტი გადმოასვენეს მწვანე ყვავილაზე პანთეონში.

შ ი ნ ა ა რ ს ი

წინასიტყვაობა	3
I ბიოგრაფიული ცნობები გ. მაიაშვილის (ზდანოვიჩის) ცხოვრებიდან	5
II სტუდენტობის წლები. რევოლუციური მოღვაწეობის დასაწყისი	12
III „სრულიად რუსეთის სოციალ-რევოლუციური ორგანიზაცია“ და მისი „რევოლუციური მოქმედების პროგრამა“	22
IV „50-ის პროცესი“. გ. ზდანოვიჩის სიტყვა	35
V გ. მაიაშვილის (ზდანოვიჩის) მოღვაწეობა საქართველოში	62
VI მარგანეცის მრეწველთა ყრილობა და გ. მაიაშვილი (ზდანო- ვიჩი) (1896—1917 წწ.)	81